

Rabila Majjaanawa k'Isa Matiye yi riije

Enj urzi k'ono don kun t'oone adda mattup ettiyo

Ette Rabila Majjaanawa k'Isa, Matiye yi riije. Matiye gen yon wede sedfu jibaaye, Isa yi y' wiike kono y'a t'ise sanallusizi.

Adda mattupadi ette Matiye yi kaza t'urzi mummino an ehe Isa me, naabadi ere y'ize a siido, dooyiso ere yi duuye duwo wo urzi k'untadi ti baldiyadi pay. Isa y'an di gizite urzi Raa a duwo ti togo, y'an d'eliyo beeko a don k'eeni, yi-lommitte siitandani wo yi d'isiyo suldi baadan don i-ceeriyo ekki duwo.

Matiye yi riije Rabila Majjaanawa ette a zembadi Yawudiyagi, kono y'an di kize ki kotto Isa yon Wede k'Uttiyo wede nebiyagi an ruutite ti kaaga adda mattup ki Raa. Gen yon Almasi Raa yi biire, wo mozigo goole wede a etto.

Wo de ti poone Isa y'an ti'n gize a don k'Izirayel suldi don ki Moziko Raa me, injino ton kane don dokkiyadan batum an di y' giigira. Kane an d'ele urzi Isa an di y'ide, wo yon y'a bilde ti diine don unto, y'a injile k'awwa ki kandaane.

*Ita mongidagi k'Isa Almasi
(Lik 3.23-38)*

¹ Kun ollo, enj sumbiyagi k'ita mongidagi k'Isa Almasi, yonj ti biza bumbu mozigo Dawut, wo yode Dawut batum ti biza bumbu k'Ibirayim.

² Ibirayim y'a t'ehe Isaaka, Isaaka y'a t'ehe Yakup, Yakup y'a t'ehe Ziida kane ti zembadi.

³ Ziida y'a t'ehe Pares ti Zara, kane geñ meedan Tamar. Pares y'a t'ehe Eziron, Eziron y'a t'ehe Aran. ⁴ Aran y'a t'ehe Aminadap, Aminadap y'a t'ehe Nason, Nason y'a t'ehe Salmo. ⁵ Salmo y'a t'ehe Booz, Booz meedi Raahap. Booz y'a t'ehe Ibet, Ibet meedi Riit. Ibet y'a t'ehe Zeese, ⁶ wo Zeese y'a t'ehe mozigo Dawut.

Mozigo Dawut y'a t'ehe Salamon, Salamon meedi ere ki Iri. ⁷ Salamon y'a t'ehe Robowan, Robowan y'a t'ehe Abbiya, Abbiya y'a t'ehe Aza. ⁸ Aza y'a t'ehe Zozapat, Zozapat y'a t'ehe Zoram, Zoram y'a t'ehe Oziyas. ⁹ Oziyas y'a t'ehe Yotam, Yotam y'a t'ehe Akaz, Akaz y'a t'ehe Ezekiyas. ¹⁰ Ezekiyas y'a t'ehe Manase, Manase y'a t'ehe Amon, Amon y'a t'ehe Zoziyas. ¹¹ Zoziyas y'a t'ehe Yekoniyas ti zembadi, a ozzine geñ donj k'Izirayel an ti'n ziki buliko ki siido Babiloon.

¹² Aame donj k'Izirayel an ti'n ziki buliko ki siido Babiloon man, Yekoniyas y'a t'ehe Salatiyel, Salatiyel y'a t'ehe Zorobabel. ¹³ Zorobabel y'a t'ehe Abbiyut, Abbiyut y'a t'ehe Eliyakim, Eliyakim y'a t'ehe Azor. ¹⁴ Azor y'a t'ehe Sadok, Sadok y'a t'ehe Asim, Asim y'a t'ehe Eliyut. ¹⁵ Eliyut y'a t'ehe Eliyazar, Eliyazar y'a t'ehe Matan, Matan y'a t'ehe Yakup. ¹⁶ Yakup y'a t'ehe Yusup kule ki Mariyam, tode ere t'a ehe Isa, yonj an di y' waaku Almasi Raa yi biire.

¹⁷ Injino maŋ an di gize ita moŋgidfagi koomat makumu pide, iise ti Ibirayim bini Dawut. Saŋ ita moŋgidfagi koomat makumu pide, iise ti Dawut bini sokiyo doŋ k'Izirayel ki siido Babiloon. Saŋ ita moŋgidfagi koomat makumu pide, iise ti sokiyadaŋ ki siido Babiloon bini ehiyo k'Almasi Raa yi biire.

Ehiyo k'Isa Almasi

¹⁸ Kun ollo t'urzi tuuku an d'ehe Isa Almasi me. Mariyam ere t'a yi t'eha gette tod' t'ibire Yusup. Wo ki poone an di koona boy botto geŋ, ti-ti ziida mahuwe ti toogo k'Unde Kamileŋ ki Raa. ¹⁹ Yoŋ Yusup kule k'ebiratú geŋ yoŋ wede ki diine, yi ki dehu y'a ki ti waare ye, injino maŋ y'a dihe y'a t'arga ti tuddutú kaŋ mookiko. ²⁰ Aame y'ilke injino maŋ, maaleeka ki Galmeega Raa y'a y'uuna kaŋ suniye wo yi di ruute, y'ede: «K'ollo, Yusup kee wede ti biza bumbu Dawut, kee k'orgide ye, ki ti soodo ere k'ebirayá Mariyam te, kono ulo wede ti t'eha geŋ yoŋ y'ettiyo t'urzi toogo k'Unde Kamileŋ. ²¹ Tod' t'a t'eha ulo wo k'a yi waaka sundí Isa*, kono yoŋ geŋ y'a utta doŋzí ti oldikadaŋ.»

²² Suldfi pay geŋ a iina kono a-t'ette a ono doŋ Galmeega Raa yi ruute ti kaaga ti bize nebi, y'ede:

²³ «Kun ollo, uto koŋso t'a seeda mahuwe wo t'a t'eha ulo,
an di y' waaka sundí Emanuwel†.»
Suma gette i-kaza «Raa ti kine».

* **1:21** 1.21 Isa ti ono Yawudiyagi, Zozuwe, i-kaza «Raa y'elo uttiyo.» † **1:23** 1.23 Kun wollo adda mattup ki Ezayi 7.14.

²⁴ Aame Yusup yi t'inne mañ, y'a t'ize munda wede maaleeka ki Galmeega Raa yi-ruute y'aase, y'a ti ziidfa eddî Mariyam te. ²⁵ Wo yi k'iide tuddutú ye bini t'a t'ehe ulo wede Yusup y'a yi wiike sundí Isa.

2

Doñ suuniyo moldali

¹ Isa an y'ehe a Betilehem geeger ki siido Ziide, aame geñ Erod yoñ mozigo. Isa an ti y'ehe mañ, doñ suuniyo moldali an d'iido ti kese peedo ge-koliyo, an d'iiney a geeger Zeruzalem ² wo an tunde d'uwu, an'de: «A too me mozigo Yawudiyagi wede an ehe me? Kaye ay wullo moolayí ti kese peedo ge-koliyo wo ay iido ay i d'ottille.» ³ Aame mozigo Erod y'illiga rabila gettiyo mañ, y'a iddira ti doñ geeger Zeruzalem pay a itadí. ⁴ In'kino mañ y'a-tusse kane deero doñ sedefe ti doñ suuniyo k'oogoro doñ adda siido gette pay, wo y'anni tunde, y'ede: «A too me Almasi Raa yi biire, an di y' t'ehey me?» ⁵ Kane an i di ruute, an'de: «A Betilehem siido Ziide, kono enno ono doñ nebi yi riije ti kaaga adda mattup kí Raa, y'ede: ⁶ “Wo kune doñ ki geeger Betilehem siido Ziide, derec geegirgun tod'te ñen'ko a ki jiire ye ti diine geegiryagi ki Ziide me”, kono ti tode i d'adfa mozigo y'a dokka doñzó Izirayel*.» ⁷ In'kino mañ mozigo Erod y'anni wiike doñ suuniyo moldali geñ kañ ombide, kono y'a se'dfe

* **2:6** 2.6 Kun wollo adda mattup ki Mise 5.1.

mekk'ono, y'ede: «T'ume muno moole y'udfo, kun yi wulle me?» ⁸ Maṅ y'an di'n igibe ki Betilehem, y'an di ruute, y'ede: «Kun'do, ulo'ṅ kun yi dehiti ki koduwo, wo aame kun y'uuno maṅ, kun o d'agibi kono nuṅ toṅ maṅ n'a etta ni d'ottiley kay.»

⁹ Aame mozigo Erod y'an ti ruutite inḱino maṅ, doṅ suuniyo moldali an d'ingile, wo geṅ an di y' wulle sey moole wede an wullo ti kese peedo ge-koliyo geṅ me. Yoṅ ki daanadaṅ yi d'ettiyo d'ettiyo bini y'iiney t'ekki boy wede ulo adda maṅ, y'a t'ihira. ¹⁰ A wolliso ki moole wede an wullo geṅ, addaṅ a ûune t'unṣuwo baadaṅ. ¹¹ Kane an iiney maṅ, an t'iide k'adda boy an d'uuney ulo ti meedí Mariyam wo an di dikke an t'uttile a daana k'ulo. Saṅ maṅ sandupiyagaṅ an t'ihinte, an t'udfo suldī doṅ an ziko, aakede: dap, suldī koddiyo eediyadaṅ unṣe wo dunnu sundí mirr zooyayí ooṅe geṅ, an i d'ele a ulo. ¹² Saṅ maṅ Raa y'an di tuuke kuudaṅ kaṅ suniye, y'ede: «Kun kima ye ki tukk' Erod me.» Inḱino maṅ kane an di-gime siidadaṅ t'urzi doolo.

Okko ki siido Misir

¹³ Aame doṅ suuniyo moldali an ingile maṅ, maaleeka ki Galmeega Raa y'a y'uuney Yusup kaṅ suniye wo yi di ruute, y'ede: «Yusup kesiko ki t'oozo, ki t'ambo ulo ti meedí, kun t'ombo ki siido Misir. Kun di lekki bini onniyo ere n'a di roota, kono mozigo Erod yi y' deha ulo ki tōwwadí.» ¹⁴ Inḱino maṅ a didfo gettiyo batum Yusup y'a t'iiziga, y'a t'umbe ulo ti meedí, an t'umbe ki siido Misir. ¹⁵ A siido Misir gette an di

likko bini unto ki mozigo Erod, geŋ a iina kono a-t'ette a ono doŋ Galmeega Raa yi ruute ti kaaga ti bize nebi, y'ede: «Uló'ŋ n'a ti y' wiiko y'a t'udfo ti siido Misir me†.»

Tôwwo k'inŋni a geeger Betilehem

¹⁶ Aame Erod yi zuune doŋ suuniyo moldali an ti y' mibilde maŋ, y'a gulkuwe baadaŋ. Maŋ y'an di ruute a asigiryagi an di-t'ide a Betilehem ti illiyagi doŋ i ti duule geŋ, inŋni kuuli pay doŋ k'ozzine sire a diigo. Ozzinagi sire geŋ a-t'ide t'ume wede doŋ suuniyo moldali an i ruute moole y'udfo. ¹⁷ Geŋ inŋkino a iina kono a-t'ette a ono doŋ Raa yi ruute ti kaaga ti bize nebi Zeremi, y'ede:

¹⁸ «Duwo an d'illiga tarkuuse ki dollite môolo baadaŋ a geeger ki Rama‡.

To Rasel§ ti môolo k'inŋnitú, wo an ti selliyi toŋ ti k'oyyiso ye, kono inŋnitú an t'inda*.»

Kama ki siido k'Izirayel

¹⁹ Saŋ mozigo Erod y'inda maŋ, maaleeka ki Galmeega Raa y'a y'uuney Yusup kaŋ suniye a siido Misir, yi di ruute, ²⁰ y'ede: «Ki t'oozo, ki t'ambo ulo ti meedí, kun di kama ki siido

† **2:15** 2.15 Kun wollo adda mattup ki Oze 11.1. ‡ **2:18** 2.18 Rama, tod'te geeger ki doŋ biza bumbu k'Epirayim yoŋ ulo Yusup mogadí Rasel ere Yakup, tod'te t'awwa Zeruzalem suma kubbaara koomat makumu sire goppoŋ ti Betilehem. § **2:18** 2.18 Rasel, gette tod'te moga k'Epirayim, wo aa meede ki doŋ k'Izirayel pay. Wo inŋkino a onniyo ere doŋ pay an môolo k'inŋnizaŋ i t'inda geŋ aa i môolo tode Rasel batum. * **2:18** 2.18 Kun wollo adda mattup ki Zeremi 31.15.

k'Izirayel kono donj i dehu tôwwo k'ulo geŋ an t'inda.» ²¹ Injino maŋ Yusup y'a t'iiziga, y'a t'umbe ulo ti meedí, an di-gime ki siido k'Izirayel. ²² Aame Yusup y'iiney a siido k'Izirayel maŋ, y'a illiga rabila ki mozigo wede i gili a siido Ziide geŋ, yoŋ ulo ki Erod sundí Arkeleyus. Aame geŋ orgiso t'a yi ziida k'ettiyo k'adda siido Ziide me. Maŋ Raa yi di tuuke kuudí kaŋ suniye, t'ume geŋ y'a ingile ki siido Galile. ²³ Y'iide'ŋ y'a-guune a geeger sundutú Nazaret. Geŋ a iina kono a-t'ette a ono donj Raa yi ruute ti kaaga ti bize nebiyagi, y'ede: «Yoŋ an di y' waaka wede ti geeger Nazaret.»

3

Kazita ki Zaŋ Batis

(Markus 1.2-6; Lik 3.1-6; Zaŋ 1.19-23)

¹ Saŋ ozzinagi k'ita maŋ, Zaŋ Batis geŋ y'a t'iide k'adda balda ki siido Ziide wo y'a iise kazita, yi d'eesiyo: ² «Kun ti kama lekkiyagun kono Moziko Raa t'iina goppon.» ³ Zaŋ geŋ yoŋ wede nebi Ezayi y'a ruute taayadí ti kaaga, y'ede: «Donj an d'ollige golla ki wedusu yi d'ollite adda balda, yi d'eesiyo:

Kun i t'okkoŋ urzi Galmeega,

erkiyagi kun i ti'n okkoŋ ki diine d'elele*.»

⁴ Zaŋ geŋ kallayí y'ossiyo an indigo k'ilali zinzo, wo ser a tooni ki golmodo. Ombadí gannoori ti madde. ⁵ Injino maŋ donj baadaŋ ti geeger Zeruzalem, ti siido Ziide gette pay, wo ti siido ere

* **3:3** 3.3 Kun wollo adda mattup ki Ezayi 40.3.

a biza k'ooye Zurden gette pay an d'ettiyo tukki Zaŋ. ⁶ An t'oodibe addaŋ a urzi k'oldikadaŋ a d'aana d'uwo pay, wo yoŋ yi-ti'n suyyiso batem adda k'ooye Zurden.

⁷ Aame Zaŋ yi wulle kane Pariziyen ti Saduseyen baadaŋ an'tiyo tuddi kono y'a ti'n suyye batem maŋ, y'an di ruute, y'ede: «Kune doŋ ulpi aakede maŋkikagi! Wee wee un gize urzi wede kun t'alda ti booro ki Raa ere ettiyo goppon te? ⁸ Inkinno maŋ kun iso naabo ere beehiye, geŋ a kize kun ti gime lekkiyagun. ⁹ Wo kun roote ye adda k'addugun: "Kaye mugiyey Ibirayim me", kono kun t'alda ti booro Raa te. Wo kun ollo n'un di rooto: Ti moŋgali en miŋ, Raa y'aane yi d'adde d'uwo a t'ise ita k'inŋi k'Ibirayim me. ¹⁰ Ankenŋno booro Raa i guute goppon, tod'te aa wede yi t'umbe ulpaasi y'adokkida inda ti sondayzaŋ pay: Undumu tuuku yi k'ehiyo inŋi beehiye ye maŋ, an di-dokka an di sefda adda k'uwwo mendí. ¹¹ Nuŋ n'unni suyyiso batem t'ahu kono a kize kun ti gime lekkiyagun, wo de wede ettiyo k'itadó geŋ yoŋ toogo yi jiiire nuŋ, wo nuŋ ni k'iide n'a ki t'oddiipe tobiyagi ye. Yoŋ y'unni suyya batem t'Unde Kamilen wo ti uwwo†. ¹² Wo yoŋ y'aokka booro aakede wedusu yi t'umbo munda ki solde a beezí, y'a silda koduwo, inŋi yi-t'oba giiye, wo odfo y'a t'ogga mentú adda k'uwwo ere i k'unto ye.»

† **3:11** 3.11 Uwwo: I-kaza ise yi'n di'n ise kamilen, ise booro Raa.

Suyyiso batem k'Isa

(Markus 1.9-11; Lik 3.21-22; Zaṅ 1.29-34)

¹³ Injino maṅ ti siidfo Galile Isa y'a iide ki tukki Zaṅ a biza k'ooye Zurden kono Zaṅ y'a ti y' suyye batem. ¹⁴ Aame geṅ Zaṅ y'a dihe y'a-tooge, wo yi di ruute, y'ede: «Nuṅ miṅ a ni suyye batem kee, de mummino kee ki d'ettiyo ki tukki nuṅ n'a ki suyye batem me?» ¹⁵ Wo de Isa yi di'n gime onamí, y'ede: «Ankenṅo kee k'ooyyo ki ti'n suyyi batem, kono t'urzi enṅo kine in d'ise suldi d'ofṅ pay ki diine a-t'ette a naabo ere aa Raa yi dehu.» Injino maṅ Zaṅ y'a iyye y'a ti y' suyye batem. ¹⁶ Aame Isa yi ti y' zuyye batem wo y'adḍiya t'adda k'ahu maṅ, a kaamiki kandaane a t'ihina wo y'a wulle Unde Raa ti deegu ti kandaane aa deere t'a di guune a tuddí. ¹⁷ Wo d'uwu an d'illiga golla ettiyo ti kandaane t'a ruute, t'ede: «Eṅ Ulo nuuno ni y' giyye baadaṅ, ulbó unse ti yode me.»

4

Naamiya daggiya k'Isa

(Markus 1.12-13; Lik 4.1-13)

¹ Saṅ maṅ Unde Raa t'a-di t'iide Isa k'adda balda kono Meeda siitandani t'a yi naame daggiya. ² Y'a likke didfo ada pide onṅu ada pide daa k'ombo, maṅ mosogo t'a yi ziida. ³ Meeda siitandani t'a d'iide sirpadí kono t'a yi naame daggiya, wo ti di ruute, t'ede: «Aame kee Ulo Raa kotto maṅ, k'elo urzi a moṅgali eṅ a-kime ombo.» ⁴ Wo Isa yi di'n gime onamtú, y'ede: «Koṅ te m'ollo, ono eṅ an riine ti kaaga adda mattup ki Raa, an'de: "Lekkiyo wedusu tod'te

t'urzi k'omfo bizí ñanñal ye, wo t'urzi k'ono ñon pay addiya ti bize Raa*.”»

⁵ Tinj geñ Meeda siitandani t'a-di t'iide Zeruzalem geeger ere kamilen, t'a-ti y' ziipe t'ekki Boy Raa a ume wede awwa, ⁶ wo ti di ruute, t'ede: «Aame kee Ulo Raa kotto mañ, t'awwa geñ k'oldi k'a zamba siido, kono ono eñ an riije ti kaaga adda mattup ki Raa, an'de:

“Raa y'an di roota maaleekiyagi kono kee, wo an gi di seeda beezan

kono k'a t'alda zondá a ki t'oggo ekki mukkolo ye†.”»

⁷ Isa yi di ruute, y'ede: «M'ollo, ono eñ an riije sey ti kaaga adda mattup ki Raa, an'de: “Kee Galmeega Raazá ki y' naame ye‡.”»

⁸ Sañ mañ Meeda siitandani t'a-di t'iide sey k'ekki mukkolo sohero a jiiire, wo ti di gizite moziko duniya pay ti laalatú, ⁹ wo ti di ruute, t'ede: «Suldi eñ n'a di t'ela pay a kee, aame kidikka wo k'o uttila mañ.» ¹⁰ Injino mañ Isa yi di ruute, y'ede: «Meeda siitandani, mi ledfo ti tuddó me! M'ollo, ono eñ an riije ti kaaga adda mattup ki Raa, an'de: “Kee k'ottilo a Galmeega Raazá, wo geñ a yode ñanñal ki naabo me§.”»

¹¹ Aame geñ Meeda siitandani t'a y'iili. Sañ mañ maaleekiyagi an a d'iide sirpadí wo an i di naabiya.

* **4:4** 4.4 Kun wollo adda mattup ki Deeterenom 8.3. † **4:6** 4.6 Kun wollo adda mattup ki Soom 91.11-12. ‡ **4:7** 4.7 Kun wollo adda mattup ki Deeterenom 6.16. § **4:10** 4.10 Kun wollo adda mattup ki Deeterenom 6.13.

Eesiyo naabo k'Isa a siido Galile
(Markus 1.14-15; Lik 4.14-15)

¹² Isa y'illiga Zan Batis an ti y' ziida dangay man, aame gen y'a t'iide ki siido Galile. ¹³ Y'iiney man y'a ki likke ye a Nazaret me, y'a ingile y'a likke a Kapernayim, geeger ere a biza bar ki Galile adda siido Zabilon ti Nepitali. ¹⁴ Gen a iina kono a-t'ette a ono don nebi Ezayi yi ruute ti kaaga, y'ede:

¹⁵ «Kune don siido Zabilon ti Nepitali, goppon ti biza bar ki Galile, ti dar k'ooye Zurden ki kese peedo k'ooriyo, siido Galile gette, i lekkiyo kane don Yawudiyagi ye.

¹⁶ Kane don i lekkiyo adda zimolo gen an wulle toore Raa. Kane don i lekkiyo adda k'undiso k'unto gen toore Raa y'an da t'an gili*.»

¹⁷ T'ume gen Isa y'a iise kazita k'ono, yi d'eesiyo: «Kun ti kama lekkiyagun kono Moziko Raa t'iina goppon.»

Sanalliyagi don ki poone
(Markus 1.16-20; Lik 5.1-11)

¹⁸ Onniyo soo Isa yi sooru a biza bar ki Galile, man yi d'uune zemba sire, Simo wede an yi waaku sundi soo te Piyer, ti leemadi Andire. An kakkiya lebidu k'adda bar kono kane naabadan sawwiya puuni. ¹⁹ Man Isa y'an di ruute, y'ede: «Kun ni daani, wo nun n'un di'n isa don dehutu duwo kono an d'etto k'urzizo.» ²⁰ A kaamiki lebidagan an d'ili, an di y' diine. ²¹ Tin gen Isa

* **4:16** 4.16 Kun wollo adda mattup ki Ezayi 8.23; 9.1.

y'a iide ki d̄aana maŋ, yi d'uuney zemba sire ti doolo, Zak ti leemadí Zan in̄ni Zebede, kane adda tooko ti meegaŋ Zebede an okkime lembidagaŋ. Maŋ Isa y'a ti'n wiike. ²² A kaamiki, tooko ti meegaŋ an d'iili wo kane an di y' diine.

Isa ti d̄oŋ duuru

(Markus 1.39; Lik 4.44; 6.17-18)

²³ Saŋ maŋ Isa yi soorutu adda siido Galile gette pay, yi dooyisito d̄uwo adda boyd̄i d̄oŋ Yawudiyagi ge dooyiso, y'an kazita Rabila Maj-jaanawa ki Moziko Raa wo y'an d'eliyo beeko a d̄oŋ pay eeni wo a d̄oŋ pay an d'ede ita k'eeni tuuku toŋ maŋ. ²⁴ A naabadí gette, Isa sundí t'a iile adda siido Siiri gette pay, in̄kino maŋ d̄uwo an i-d'ettiyo ti kane d̄oŋ pay an d'ede ita k'eeni tuuku toŋ maŋ wo ti d̄oŋ eeni yi ti'n dabirsa baadaŋ, aakede: d̄oŋ an d'ede siitandani a eedaŋ, ti d̄oŋ an d'ede amputput wo d̄oŋ run̄guyun̄. Geŋ Isa y'an d'eliyo beeko. ²⁵ D̄oŋ duuru baadaŋ an di y' daaniya, wo kane geŋ an iido ti siido Galile, ti siido sundutú Geegiryagi Koomat, ti geeger Zeruzalem, ti siido Ziide wo ti dar k'ooye Zurden ki kese peedo ge-koliyo.

5

Uŋsuwo ere ki kotto

(Markus 3.13; Lik 6.12-13,20)

¹ Aame Isa yi wulle d̄oŋ duuru baadaŋ geŋno maŋ, y'a di gili eego kesse y'a-guune. Kane sanalliyagí an a-t'iide k'ume yode, ² maŋ y'a t'ihina bizí, y'an di'n iise dooyiso, y'ede:

- 3 «Uᅇsuwo a kane dᅇᅇ i ki t'ᅇide an ki t'ambe eedaᅇ a dᅇaana Raa ye, kono Moziko Raa tod'te ki kane.
- 4 Uᅇsuwo a kane dᅇᅇ i mᅇolo, kono kane geᅇ Raa y'a ti'n sella.
- 5 Uᅇsuwo a kane dᅇᅇ biza k'ulbaᅇ tasse, kono kane geᅇ an t'ooney siidᅇ ere Raa yi ruute y'an t'eley.
- 6 Uᅇsuwo a kane dᅇᅇ mosogo wo ᅇrme a urzi lekkiyo ere ki diine aa Raa yi dehu, kono kane geᅇ mosigadaᅇ ti ᅇrmayaᅇ Raa y'an ti'n t'ᅇda.
- 7 Uᅇsuwo a kane dᅇᅇ an isiyo adde koduwo a dᅇwo, kono kane geᅇ Raa y'an d'isa adde koduwo kay.
- 8 Uᅇsuwo a kane dᅇᅇ ele tuddaᅇ pay a Raa, kono kane geᅇ Raa an di y' wolley.
- 9 Uᅇsuwo a kane dᅇᅇ i dehu urzi toose y'a koone a diine dᅇwo, kono kane geᅇ Raa y'anni waaka iᅇᅇizi.
- 10 Uᅇsuwo a kane dᅇᅇ an i dabirsa kono an isiyo munda wede ki diine aa Raa yi dehu, kono Moziko Raa tod'te ki kane.
- 11 Uᅇsuwo a kune aame dᅇwo an unni kalᅇᅇa, an unni dabirsa wo an lohito ita k'ono dᅇᅇ pay ulpi a egguᅇ, kono kun ziipe adduguᅇ a nuᅇ. 12 Kune ulbuguᅇ un iso uᅇse, kun lekko t'uᅇsuwo kono munda wede Raa yi dehu y'un t'eley geᅇ, yoᅇ baadaᅇ y'unni delliyo a kandaane. Geᅇ iᅇkino kay an'ni dibire nebiyagi dᅇᅇ ti kaaga i t'iᅇgile ti kune me.»

*Sumade wo toore**(Markus 9.50; 4.21; Lik 14.34-35; 8.16; 11.33)*

¹³ «Kune aakede sumade ki duniya, wo de aame sumade geŋ unṣuwadaŋ i t'ize umbo maŋ, kaŋ mummino k'an ise unṣe sey me? Kane geŋ unṣe ye, ki sebbiyo mendaŋ a disse, d'uwō an d'onṣilse.

¹⁴ Kune aakede toore ki doŋ duniya. Aame an iiziga geeger eego kesse maŋ, i ki t'ombida ye.

¹⁵ Wo aame k'a t'uyye pitila maŋ, k'a ki t'ossibe bogoro ye. Ki too maŋ k'a ti dodɔde t'awwa, kono tod' t'a toore a kane doŋ pay adda boy. ¹⁶ Geŋ inṣkino kay, kune toŋ kun di toore a daana d'uwō me, kono aame an wulla naabagaŋ ere beehiye kun isiyo gettiyo maŋ, an di t'imma Meegugaŋ Raa a kandaane.»

Dooyiso a urzi k'oogoro

¹⁷ «Kun elkiyo miŋ nuŋ n'iido kono oogoro Muusa ti dooyiso nebiyagi, n'a ti'n t'ide ko? Aha! Nuŋ n'iido kono n'a ki ti'n t'ide ye, wo n'iido n'a-t'ise itadaŋ a t'adɔde kereŋ. ¹⁸ Derec inṣkino wo n'un di rooto: Ki poone kandaane ti siido an t'eŋgila geŋ, t'adda k'oogoro ette ise arku raaniya soo wede neŋku a jiire, ise guttiye soo toŋ i ki dagga ye, geŋ inṣkino bini suldi pay geŋ an t'eŋgila. ¹⁹ Kono kamo, wede tuuku urzi k'oogoro wede neŋku a jiire geŋ yi ti y' diipida wo yi duuya d'uwō an d'ise inṣkino maŋ, yode geŋ Raa y'a ti y' deega neŋku a ceera a Mozikadi me. Wo de wede tuuku urziyagi k'oogoro geŋ yi ti'n sooru eego wo yi dooyiso d'uwō an d'ise inṣkino kay maŋ, yoŋ geŋ Raa y'a y'isa goole a

Mozikadí me ²⁰ Kono kun ollo, n'un di rooto: Aame lekkiyaguṅ ere ki diine gette, ti ki jiira ere ki dɔṅ suuniyo k'oogoro ti Pariziyen ye maṅ, ki kotto Moziko Raa kun ki t'etta ye.»

Dooyiso a urzi kulkuwo

(Markus 11.25; Lik 12.57-59)

²¹ «Kune kun illiga an ruute a moṅgidagiṅ ti kaaga, an'de: “Ki tōwwo wedusu mirsi ulu*”, soṅ an'de: “Wede y'iida bakadí mirsi maṅ, yoṅ geṅ an di-t'etta k'ume booro†.” ²² Wo kun ollo, nuṅ n'un di rooto: Wede tuuku yi ti kulkuwa ti leemadí maṅ, yoṅ geṅ an di-t'etta k'ume booro. Wede yi gilda leemadí: “Ulsu!” maṅ, yoṅ geṅ booradí a daana deero dɔṅ booradiṅ. Wede yi gilda leemadí: “Maade!” maṅ, yoṅ geṅ an ti y' seɗɗa adda k'uwwo ere ki dabar. ²³ Aame ɗe kee k'ette eliyo seɗeɗe k'adda Boy Raa, wo a ume seɗeɗe geṅ k'ilke leemadá i-d'ede kulkuwo ti kee maṅ, ²⁴ seɗikadá ki oolo a ume geṅṅo, k'okko ki y'oonoy leemadá me, kun t'okkiyi ɗoo miṅ, saṅ k'a-kami k'a t'ela seɗikadá a Raa kollo.

²⁵ Aame ti leemadá un ede ono, wo kune a urzi kun ette k'ume wede booro ɓotto geṅ, ti yode ono kun ti'n ôodo. Para maṅ leemadá geṅ y'a-da t'iida k'ume wede booro maṅ, wede booro y'an gi di t'eley a bey k'asigiryagi, wo kane an ki ti t'eley daṅgay. ²⁶ Derec inḱino wo n'a di rooto: T'ume geṅ ki ki t'adɗa ye, daa ki munda wede an dehu k'an ki y'ela pay ye maṅ, tammiyagi dɔṅ sunni sunni toṅ an a-k'oola ye.»

* **5:21** 5.21 Kun wollo adda mattup ki Egzod 20.13. † **5:21** 5.21 Kun wollo adda mattup ki Deeterenom 17.8.

Dooyiso a urzi moone t'ere bakadá ise ti kule bakatú

(Matiye 18.8-9; Markus 9.43,47-48)

²⁷ «Kune kun illiga an ruute ti kaaga, an'de: “Ki moone t'ere bakadá ise ti kule bakatú ulu‡.”
²⁸ Wo kun ollo, nuñ n'un di rooto: Wede tuuku yi wulla ere bakadí wo addí i íba a tode mañ, yoñ geñ adda k'addí aa yi-t'udige baa. ²⁹ Aame de ersadá k'ammade t'a-da t'ettiyo k'adda k'oldíko mañ, k'a t'oodo mentú k'a sefdo dokki ti kee. Beehiye i jiire a kee, moka soo ki tuddá i digge bee miñ, tuddá pecek an ki ti sefdey adda k'uwwo. ³⁰ Wo aame de beezá wede k'ammade y'a-da t'ettiyo k'adda k'oldíko mañ, k'a-efekko mendí k'a sefdo dokki ti kee. Beehiye i jiire a kee, moka soo ki tuddá i digge bee miñ, tuddá pecek ti-t'ettye k'adda k'uwwo.»

Dooyiso a urzi peeriyo

(Matiye 19.7-9; Markus 10.4-5,10-12; Lik 16.18)

³¹ «Soñ an ruute ti kaaga, an'de: “Aame wede yi-peere eddí mañ, yi di dekke mattup ki peeriyo yi di t'ele a beytú i-kaza tod'te peeriyo§.” ³² Wo kun ollo, nuñ n'un di rooto: Ki peeriyo k'erewo ulu, wo wede yi peere eddí geñ, aame ti moone ti kule bakatú danñal! Para mañ yi ti peeriyo geñ, yi ti t'eliyo a moone ti kule bakatú, aame tod' ti ziida mañ. Wo wede i seeda erewo ere peeriyo gette, Raa yi yi wolliyo yoñ wede i moone t'ere bakadí.»

‡ 5:27 5.27 Kun wollo adda mattup ki Egzod 20.14 wo Deeterenom 5.18. § 5:31 5.31 Kun wollo adda mattup ki Deeterenom 24.1.

Dooyiso a urzi nâamiya tudde

³³ «Kune kun illiga sey an ruute a mongidagin ti kaaga, an'de: "Mundá wede k'a ti nîime tuddá geñ, ki t'oodíiba eedá ye, k'a ti y' d'ango mundá wede k'a ti nîime tuddá a daana Galmeega Raa geñ me*." ³⁴ Wo kun ollo, nuñ n'un di rooto: Kun nâama tuddugun ye tak: Ti kandaane kun nâama tuddugun ye, kono yon geñ kaakido moziko Raa. ³⁵ Ti siido kun nâama tuddugun ye, kono tod'te ume yi d'obe zonđí. Ti Zeruzalem kun nâama tuddugun ye, kono tod'te geeger ki Raa mozigo goole. ³⁶ Ti eggun ton kun nâama tuddugun ye, kono wedusu geñ ililso k'eedí soo ton yi k'aane yi ki t'ise tuwarwa ye gammilawa ye. ³⁷ Aame mundá kun isa mañ, kun'de "Eyye, ay isa" d'añjal, wo mundá kun k'isa ye mañ, kun'de "Aha, ay k'isa ye" d'añjal. Ono don kun rootiyo ti doolo geñ ettiyo t'urzi Mohita k'oldfiko.»

*Dooyiso a urzi kama k'oldfiko ere an a ize
(Lik 6.29-30)*

³⁸ «Kune kun illiga an ruute ti kaaga, an'de: "Wede yi tuuka ersa bakadí mañ, ki yode an i di tooka kay, wede yi t'iira sinta bakadí mañ, ki yode an i di t'oorá kay†." ³⁹ Wo kun ollo, nuñ n'un di rooto: A wede y'a ize ulsu geñ, kee ki-ti dooze ye. Aame wede yi ki diiñe a tobbisadá k'ammade ki bita mañ, ki kama tobbisadá ere ki geelo ton y'a ki ti daaña. ⁴⁰ A wede i dehu

* **5:33** 5.33 Kun wollo adda mattup ki Lebitik 19.12 wo Nombire 30.3. † **5:38** 5.38 Kun wollo adda mattup ki Lebitik 24.19-20.

y'a-di t'ette k'ume wede d'ekkiyo booro kono y'a t'amba kallayá wede ñenku t'adda mañ, ki-oolo kallayá wede goole toñ y'a t'ambo pây. ⁴¹ Aame wede yi-k'isiyo ki toogo i-d'ede attidí yi dehu k'a di y' t'igibo suma kuɓɓaara soo mañ, k'a y'agiba kuɓɓaara sire. ⁴² Wede yi tonɗiyo munda ti beezá mañ, ki eelo, wo wede yi tonɗiyo see ti beezá mañ, ki-tooge ye.»

Kun geyyo d'oj k'adugun
(*Lik 6.27-28,32-36*)

⁴³ «Kune kun illiga an ruute ti kaaga, an'de: “Ki geyyo bakadá‡ wo aduzá ki koogor.” ⁴⁴ Wo de kun ollo, nuñ n'un di rooto: Kun geyyo kane d'oj ti kune adu, wo kun tondo Raa ki d'oj unni dabirsa. ⁴⁵ Aame kun isiyo in'kino mañ, kun t'isa in'ni ki Meegugun Raa a kandaane. Derec, yoñ yi koliyo peedadí a tukki d'oj bundidí wo a tukki d'oj beehiye pây, yi koppiyo mizzi a d'oj ki diine wo a d'oj ki diine ye pây. ⁴⁶ Aame kun geyyiso d'oj unni geyyiso d'añjal mañ, munda wede Raa yi dehu y'un t'eley geñ kun di y' t'ooney dey ko? Derec, d'oj sed'fu jibaaye kane batum toñ an isiyo in'kino kay. ⁴⁷ Aame kun eesiyto zembagun d'añjal mañ, geñ munda wede ki kune i t'ihina siidí too me ti d'oj ongo me? Derec, kane d'oj Yawudiyagi ye batum toñ an isiyo in'kino kay. ⁴⁸ In'kino mañ kun t'iso d'oj derec ki diine baa, aakede Meegugun Raa a kandaane toñ yoñ derec ki diine.»

‡ 5:43 5.43 Kun wollo adda mattup ki Lebitik 19.18.

6

Dooyiso a urzi k'eliyo a d'of an k'ede munda ye

¹ «Kun koonaa mentikagi kono a urzi daaniya Raaguŋ geŋ, kun ise bitin bitin a d'aana duwo an un gi di'n wolle ye. Para maŋ munda wede Meeguguŋ Raa a kandaane yi dehu y'un t'ele geŋ, kun ki y' t'oone ye. ² Injino aame ki-t'ele munda a wede i-k'ede munda ye geŋ, ki koppe darru ye, aakede d'of bizaŋ sire sire ge d'isiyo a urziyagi geeger wo adda boydi d'of in di dooyiso. An isiyo injino kono duwo an di'n t'imme. Derec injino wo n'un di rooto: Kane geŋ munda wede an dehu an t'oona a naabadaŋ, an y'uune baa. ³ Wo ki kee, aame ki-t'ele munda a wede i-k'ede munda ye ti beezá wede k'ammade maŋ, beezá wede ki geelo batum y'a ki suune ye. ⁴ Injino maŋ munda wede k'ele geŋ y'a lekke ombide, wo Meegá Raa yi wolliyo munda wede k'isiyo kaŋ ombide geŋ me. Injino munda wede Raa yi dehu y'a di t'ele geŋ, k'a yi t'ooney.»

Dooyiso a urzi ton-diyo Raa

⁵ «A urzi ton-diyo Raa geŋ, kun ise aakede d'of bizaŋ sire sire ge d'isiyo ye. Kane an geyyiso ton-diyo Raa kaŋ ohire adda boydi d'of in di dooyiso wo a urziyagi k'okkime, kono duwo an di'n wolle. Derec injino wo n'un di rooto: Kane geŋ munda wede an dehu an t'oona, an y'uune baa. ⁶ Wo ki kee, aame ki dehu k'a tonde Raa maŋ, ki t'odo adda biino moonizá, biza k'a-t'appa wo k'a tondo Meegá Raa yoŋ ede

a ume ombide geŋ me. Wo Meegá Raa yi wolliyoo munda wede k'isiyo kaŋ ombide me. Injino munda wede Raa yi dehu y'a di t'ele geŋ, k'a yi t'ooney.

⁷ Aame kun tonduyo Raa maŋ, ono kun'ni doolite ye, aakede kane doŋ Yawudiyagi ye ge d'isiyo me, kono an elkiyo an bobbiso baadaŋ geŋ Raa y'an olliga. ⁸ Injino kun dooze kane ye, kono Meegugun Raa yi suune munda wede kun dehu a urzi lekkiyagun, ki poone kun di y' tonda geŋ me. ⁹ Injino maŋ kun tondo Raa kino:

Meegey wede a kandaane,

kee k'iso duwo pay an di suune kee Raa kamilen,

¹⁰ Mozikadá k'a-di t'edi.

Munda wede addá i dehu k'aase a siido ette, ki y'iso aakede ki d'isiyo a kandaane.

¹¹ Anki kee k'ay eeli ombadey ere ay di t'ide.

¹² K'ay t'isi tambobino a munda wede ulsu ay ize a kee,

aakede kaye toŋ ay an t'ize tambobino a kane doŋ ay ize munda ulsu kay.

¹³ K'ayn'ooli adda naamiya daggiya i ceera eeday ay t'etta adda k'oldiko ye,

wo de k'ay ti'n addi ti bey Mohita k'oldiko.

[Geŋ moziko, toogo wo tamma, kane pay ki kee ki daayum. Eyye.]

¹⁴ Injino maŋ, aame a doŋ a ti doopide a onamgun geŋ tambobino kun an t'isiyo maŋ, Meegugun Raa a kandaane toŋ, y'un t'isa tambobino kay a munda wede kun a ti doopide me.

¹⁵ Wo de aame a doŋ a ti doopide a onamgun geŋ tambobino kun an k'isiyo ye maŋ, Meegugun

Raa toŋ y'un k'isa ye kay tambobino a munda wede kun a ti doopide me.»

Dooyiso a urzi lekkiyo daa k'ombo

¹⁶ «A lekkiyagun onniyo muno kun lekkiyo daa k'ombo geŋ, kun ti y'ise ume k'edagun zimolo aa don bizaŋ sire sire ge d'isiyo ye. Kane an ti'n neeriyo edayan kono duwo an di'n wolle kane onniyo muno an lekkiyo daa k'ombo. Derec inkiwo wo n'un di rooto: Kane geŋ munda wede an dehu an t'oona, an y'uune baa. ¹⁷ Wo kee aame onniyo muno ki lekkiyo daa k'ombo maŋ, edaya ki t'opilo wo eeda k'a t'assigo egey, ¹⁸ kono duwo an ki di suune ye kee onniyo muno ki lekkiyo daa k'ombo me. A suune Meega Raa danjal yon ede a ume ombide geŋ me, wo yon Meega Raa yi wolliyo munda wede k'isiyo ombide me. Inkiwo munda wede Raa yi dehu y'a di t'ele geŋ, k'a yi t'ooney.»

Laale wede a kandaane
(Lik 12.33-34)

¹⁹ «Kun t'okume ye laale a siido ette, kono a en amma ti dibe an t'ooma pay, a en don k'oogire an di tooka ti boy wo an di sika. ²⁰ Ki too maŋ kun okumo laale a kandaane, a ummey amma ti dibe umbo, a ummey don k'oogire umbo a-tooka boy wo an di sika me. ²¹ Derec, a ume wede laalayá yi lekkiyo geŋ, adda'ŋ toŋ angeŋno.»

Toore ki tudde
(Lik 11.34-36)

²² «Eda kane aa pitila ki tudde. Aame edaya kane bee maŋ, tudda pay gette adda toore. ²³ Wo aame edaya geŋ kane bee ye maŋ, tudda pay

gette adda zimolo. Injino aame toore wede a-d'ede geŋ i t'ize zimolo maŋ, geŋ kee adda zimolo ere dil baa.»

Naabo a galmaawi sire umbo
(Lik 16.13)

²⁴ «Wenda soo toŋ umbo a aane a naabe ti galmaawi sire me, ise maŋ soŋ y'a y'olmida wo y'a-geyye soo me, wo ise maŋ y'a di kette ti wede soo me wo soŋ y'a yi kiigira. Kun k'aane kun ki ti daane ye, urzi Raa wo urzi soŋko sirwan pay me.»

Zaapu k'adde a Raa
(Lik 12.22-31)

²⁵ «Geŋ kono k'injino n'un di rooto: Kune a lekkiyaguŋ ulbuguŋ un t'oode ye a urzi k'ombo wo a urzi sobo me, ise a urzi k'ossiyo ere ki tudduguŋ toŋ maŋ. Ki kotto lekkiyaguŋ ere kun lekkiyo ette ti jiire ombo, wo tudduguŋ ti jiire ossiyo. ²⁶ Kun wollo embi, an ki korso ye, an k'aydu ye wo an k'okimso mudu adda giiyagi ye, wo Meeguguŋ Raa a kandaane yi di'n moddiyo. Wo kune ki kotto kun i jiire kane geŋ taŋ baadaŋ! ²⁷ Wee wee ti diinaguŋ, ti ulbe k'oodiyo wede i-d'ede geŋ, y'aane y'a d'aagila ti kedise soo onniytagi d'oŋ ki lekkiyadi a duniya eŋ me?

²⁸ Wo de ki moo me ulbuguŋ un d'oodiyo a ossiyo me? Kun wollo bobbo soole adda balda gette, ti d'ohire, ti ki naabiya ye, ti k'isiyo kallagi ye. ²⁹ Wo kun ollo, n'un di rooto: Mozigo Salamoŋ toŋ ti laale wede pay i-d'ede geŋ, yi k'usse ye kalle wede majjaane aakede bobbo soole soo toŋ maŋ. ³⁰ Injino Raa yi-ti y'ossiyo

soole wede adda balda anki kuti kutiñ, wo soggo an t'oggiyo adda k'uwwu mendí. Geñ tañ miibi a ceere Raa y'un di'n osse kune batum me! Ki kotto kune zaapu k'addugun a Raa baata. ³¹ Injino mañ kune ulbugun un t'ooode ye, adda k'addugun kun roote ye: "Ay d'ooma moo me?", "Ay sifa moo me?" wo "Ay d'ossa moo me?" me. ³² Suldi pay geñ, daayum i'ni dehotu kane don pay i ki suune Raa soo danjal ye geñño. Wo Meegugun Raa a kandaane geñ, yon yi suune suldi geñ kun'ni dehu a urzi lekkiyagun me. ³³ Ki too mañ kun deho ki poone Moziko Raa wo urzi lekkiyo ere ki diine aa Raa yi dehu, wo sañ suldi pay geñ y'un di'n t'ela kay. ³⁴ Injino mañ kune ulbugun un t'ooode ye a munda wede ki soggo me, kono onniyo ere ki soggo gette tod'te t'onniyatú. Onniyo ere soo dabaratú i-tôwwu k'ettú k'ettú.»

7

Ki ðekke booro a tukki bakadá ye (Lik 6.37-38,41-42)

¹ «Kun ðekke booro a tukki wede tuuku ton mañ ye, geñ Raa ton yi ki ðekka booro eggun ye. ² Derec, t'urzi wede kun ðekkiyo booro a tukki don ongo geñ, Raa ton y'a ðekka booro eggun, wo dooziyo ere kun dooziyo a duwo gette, Raa ton y'un ti dooza a kune injino kay. ³ Ki moo me ki wolliyo unumu wede adda k'ersa leemadá, wo undumu wede adda k'ersadá ki gi di y'owwiyo ye me? ⁴ De mummino k'a aane ki di roote a leemadá, k'a t'eese: "K'oolo n'a di t'ambo unumu wede adda k'ersadá enño", wo kacinj kee

a-d'ede undumu adda k'ersadá me? ⁵ Kee wede biza sire sire, ki t'ambo undumu wede adda k'ersadá doo, in̄kino k'a wolla kereñ, sañ k'a t'amba unumu wede adda k'ersa leemadá kollo.

⁶ Munda wede kamileñ a ðaana Raa geñ a gede ki-t'ele ye, para mañ y'aa kima ki tuddá y'a ki ti k'ahita. Dogoro ere zooyatú ooñe gette kun sedda a ðaana kinzir ye, para mañ tode gette y'a-t'on̄yilsa mentú.»

Kun tondo ti bey Raa kun t'oon
(*Lik 11.9-13*)

⁷ «Kun tondo wo munda an un t'eela, kun de hito wo kun t'oon, kun koppo biza wo an un di-t'ihina. ⁸ Wede tuuku yi ton̄diyo mañ, munda an i-d'eliyo, wede yi de hitu mañ, yi d'ooniyo, wo wede yi koppo biza mañ, an i di t'ohine. ⁹ Wee wee ti diinagun̄ aame ulí yi tunde ombo mañ, yi di t'ele moko me? ¹⁰ Koo yi tunde puuniso mañ, yi di t'ele miipo me? Aha umbo! ¹¹ In̄kino mañ kune ðon̄ addugun̄ ulpi ton̄, kun suune eliyo suldi ðon̄ majjandani a in̄nigun̄. Wo geñ tañ miibi a ceere Meegugun̄ Raa a kandaane y'aane y'an t'ele suldi ðon̄ majjandani a ðon̄ i yi ton̄diyo me!

¹² Suldi ðon̄ pay kun de hu ðuwo an un d'ise geñ, a kane ton̄ kun an iso in̄kino kay. Geñ in̄kino ita k'ono ðon̄ pay an riñe ti kaaga adda mattup k'oogoro Muusa ti ðon̄ ki nebiyagi me.»

Urzi sire
(*Lik 13.23-24*)

¹³ «Kun t'odo ti biza peryeye. Derec, biza goole geñ yon̄ urzi wede sooruzi i k'ooñe ye,

y'a-da t'ette k'ume daggiya, wo don baadan an addiya t'urzi genno. ¹⁴ Ki kotto biza peryeye gen, yon urzi sooruzi oone, y'a-da t'ette k'ume lekkiyo ere ki daayum, wo don baata addiya t'urzi gen me.»

Undumu ti inñizi

(Matiye 7.16-17; Lik 6.44-45)

¹⁵ «Kun koona mentikagi ti duwo don an ti t'isiyo tuddan aa nebiyagi. An'tiyo tuddugun kane tasse aa dambami, wo kacin t'adda k'addan kane bundifi aa sullibagi. ¹⁶ Gen kane kun di'n suune a urzi sooruzan. Inñi k'inda bin ekk'undumu k'ahimagi ki ki rakke ye, ise inñi tormo ton ekki woskani ki ki rakke ye. ¹⁷ Inkin undumu tuuku beehiye y'a t'ehe inñizi ton beehiye, wo undumu wede ulsu y'a t'ehe inñizi ton ulpi. ¹⁸ Undumu wede beehiye yi k'aane yi ki t'ehe inñi ulpi ye, wo undumu wede ulsu yi k'aane yi ki t'ehe inñi beehiye ye. ¹⁹ Undumu tuuku yi k'ehiyo inñi beehiye ye man, yon gen an di dekka an di sefda adda k'uwwu mendi. ²⁰ Gen inkin duwo don an ti t'isiyo tuddan kane nebiyagi kacin nebiyagi ye gen, kun di'n suune a urzi sooruzan.»

Don etta daana Raa

(Lik 6.46; 13.27)

²¹ «Kane don an ni waaku: “Galmeegay, Galmeegay” gen, pay an ki t'etta ye k'adda Moziko Raa te. Wo etta kane don isiyo munda wede Meego Raa a kandaane yi dehu danñalan. ²² A onniyo booro gette don baadan an o di roota, an t'eesa: “Galmeegay, Galmeegay, ki kotto ti

sundá ay ruutito ono dɔŋ Raa y'igibo, ti sundá ay d'ilmito siitandani, ti sundá ay d'izito sulɔi k'armika baadan ɔe me!" ²³ Injino man n'an di roota kereŋ, n'a t'eesa: "Kune toc aŋ wenda n'un ki'n zuune ye. Kun ti ledɔo dokki ti tuddó me, kune dɔŋ isiyo sulɔi dɔŋ ulpi!"»

Boyɔi sire
(*Lik 6.47-49*)

²⁴ «Injino wede tuuku y'ollige ono dɔŋ ni rootiyo enno wo yi sooru eego man, yoŋ geŋ yi deeyiso aa wede i-d'ede elkiso y'a t'iiziga boozí eego paŋgiragi. ²⁵ Mizzi y'a guppe ti maaye baadan, oyɔayi an d'ûunite i palɔita waawiye. Maaye ti bormo geŋ an di ŋiia boy geŋno wo y'a k'iire ye, kono yoŋ itadí an ziipe ekki paŋgiragi. ²⁶ Wo ɔe wede tuuku y'ollige ono dɔŋ ni rootiyo enno wo yi ki sooru eego ye man, yoŋ geŋ yi deeyiso aa wede elkisadí umbo y'a t'iiziga boozí a dolso. ²⁷ Mizzi y'a guppe ti maaye baadan, oyɔayi an d'ûunite i palɔita waawiye. Maaye ti bormo geŋ an di ŋiia boy geŋno wo a ruuge pay.»

Isa yi dooyiso t'urzi k'aaye?
(*Markus 1.22; Lik 4.32*)

²⁸ Isa y'a ti dinge dooyiso gettiyo man, kane dɔŋ duuru dooyisadí gette t'an di'n ziida, ²⁹ kono yoŋ yi dooyiso ti toogo suuniyo ere ki yode batum, wo aakede ki dɔŋ suuniyo k'oogoro ge ki dooyiso ye.

8

*Eliyo beeko a wede bitide**(Markus 1.40-44; Lik 5.12-14)*

¹ Isa yi ti d̄iige t'ekki kesse mañ, d̄oñ duuru baadañ an di y' diine. ² In̄kino mañ i d'ede wede bitide y'a d'iide sirpa k'Isa, y'a-dikke a d̄aanadí wo y'a yi tunde, y'ede: «Galmee'ki nuñ, ki dehu mañ, k'o eli beeko n'a t'ise kamileñ a d̄aana Raa.» ³ Mañ Isa y'a igibe beezi y'a yi butte, wo y'a ruute, y'ede: «Nuñ ni dehu, ki t'iso kamileñ!» A kaamiki bitidayi a ñukkide, y'a t'ize kamileñ. ⁴ Wo Isa yi di ruute, y'ede: «K'ollo koduwo, a munda wede ize eñ a wenda soo toñ ki rootey ye! Wo d̄e k'odo deddet ki-ti kazoy tuddá a wede sedefeke y'a ki ti wolley, wo k'a eloy munda ki sedefeke aa Muusa y'a ruute adda k'oogoro in d'ise*, kono d̄oñ pay an di wolle kee k'uune bee.»

*Zaapu k'adde ki goole k'asigiryagi**(Lik 7.1-10; Zañ 4.46-54)*

⁵ Isa y'ette k'adda geeger Kapernayim gen, i d'ede goole k'asigiryagi meeda ki Romen, y'a d'iide sirpa k'Isa wo yi-d'obe bey, y'ede: ⁶ «Galmee'ki nuñ, wede naabadó eeni, tuddi i t'inda moone a boy, yi dabirsa baadañ.» ⁷ Mañ Isa yi di ruute, y'ede: «Nuñ n'a etta ni-t'eley beeko te.» ⁸ Wo goole k'asigiryagi yi di'n gime onamí, y'ede: «Galmee'ki nuñ, nuñ ni k'iide ye k'a ette ki boozó me. Wo t'eñ miñ ki rooto munda soo kono wede naabadó y'a t'oone bee. ⁹ In̄kino nuñ batum n'ottilso a d̄oñ deero t'eedó

* **8:4** 8.4 Kun wollo adda mattup ki Lebitik 14.1-32.

wo i d'ede asigiryagi don nun goole t'eedan. Aame ni rootiyo a wede soo: "K'odo!" man, gen yi d'engilso. Aame ni rootiyo a wede doolo: "K'edi!" man, gen yi d'ettiyo. Wo aame ni rootiyo a bulayó: "Naabo ette ki-t'iso!" man, gen yi-ti t'isiyo.» ¹⁰ Aame Isa y'illiga ono genno man, y'a ziida gígíri wo y'an di ruute a don duuru don i yi daaniya gen, y'ede: «Derec inkino wo n'un di rooto: Adda siido k'Izirayel ette wenda soo ton ni k'uune ye, wede a zaape addi a Raa aa yode kino en me. ¹¹ Wo kun ollo, n'un di rooto sey: Don baadan an d'etto ti kese peedo ge-koliyo wo ti kese peedo k'ooriyo, an di kooney an d'oomey kan soo adda Moziko Raa ti Ibirayim, Isaaka wo Yakup. ¹² Wo de kane Yawudiyagi don toc ooma Moziko Raa gen, don ongo an ti'n sebbey ti paate adda zimolo, ume wede ki dollite molo wo k'aadumu sina.»

¹³ Man Isa yi di ruute a goole k'asigiryagi, y'ede: «Ki-kama ki boozá. Kono ki ziipe adda a nun gen, wede naabadá y'oono bee.» A peedo gettiyo batum wede naabo ki goole k'asigiryagi gen y'a uune bee.

*Eliyo beeko a don k'eeni baadan
(Markus 1.29-31; Lik 4.38-39)*

¹⁴ San man Isa y'a t'iide dan Piyer. Aame y'iiney man yi-t'uuney ande Piyer ekk'onngali i-ti d'iire. ¹⁵ Man Isa yi ziida beytú, wo a kaamiki ooriyo t'a t'iili, t'a t'iiziga wo ti di naabiya.

¹⁶ A peedo t'a t'iire man, tin gen duwo an i di ziko don baadan an d'ede siitandani a eedan. T'urzi toogo k'onami Isa y'an ilmiti siitandani

me, wo dɔŋ k'eeni pay geŋ y'an d'ele beeko. ¹⁷ Y'ize suldi inkiŋo kono a-t'ette a ono dɔŋ nebi Ezayi yi riinje ti kaaga adda mattup ki Raa, y'ede: «Yode batum y'a iyye y'a t'umbe dabaradiŋ ti endanziŋ a eedí.†»

Doŋ i dehu daaniya k'Isa
(Lik 9.57-60)

¹⁸ Onniyo soo Isa yi wulle dɔŋ duuru baadan an i di-t'ugiye maŋ, y'an di ruute a sanalliyagi an di doopida ti yode ti dar bar ki Galile ti nee. ¹⁹ Aame geŋ wede suuniyo k'oogoro y'a d'iide sirpa k'Isa wo yi di ruute, y'ede: «Wede dooyisadey, n'a ki daana k'ume wede tuuku kee k'etta geŋ me.» ²⁰ Wo Isa yi-ti'n gime onamí, y'ede: «Boo ti boydfutú wo embi toŋ ti boydzan, wo de nuŋ wede an n'ehe aa ulo wede eŋ, oo k'ede ume ni ki ti t'ele eedó n'a ki puuke ye.»

²¹ I d'ede wede doolo ti diine sanalliyagi yi di ruute Isa, y'ede: «Galmee'ki nuŋ, k'o eeli urzi n'a ette n'a t'ottibo meegó dɔ.» ²² Wo de Isa yi di ruute, y'ede: «Ki ni daani, wo ki'n oolo kane dɔŋ aa unto an d'ottiba tuddan.»

Isa toogo i jire maaye baadan
(Markus 4.31-41; Lik 8.23-25)

²³ Maŋ Isa yi ti gili adda tooko, wo kane sanalliyagi an a di gili ti yode. ²⁴ An a iide maŋ, a kaamiki i d'iiziga maaye baadan adda bar. Ahu geŋ i-kolzite kolzite i d'obite k'adda tooko, wo yo Isa geŋ y'a udige kuy. ²⁵ Kane sanalliyagi an a d'iide sirpadi an di y'inne kan

† **8:17** 8.17 Kun wollo adda mattup ki Ezayi 53.4.

dollite, an'de: «Galmeegey k'in utti, para'ŋ in ti t'inda!» ²⁶ Maŋ Isa y'an di ruute, y'ede: «Kun orgiso inokino moo me? Ki kotto kune zaapu k'addugun a Raa baata!» Inokino maŋ Isa y'a t'iiziga, y'an id'dise maaye ti ahu bar geŋ me, wo a kaamiki an d'inniga d'ed'dek. ²⁷ Kane d'on pay ti yode geŋ an ziidfa giggiraŋ wo an di rootiyo, an'de: «Yode eŋ moo wede me, kono aŋ maaye ti ahu bar toŋ an d'ollige onami me!»

Isa toogo i jüre siitandani
(Markus 5.1-20; Lik 8.26-39)

²⁸ Aame Isa y'iiney a siido Gadara ti dar bar Galile ti nee maŋ, i d'iide d'on sire t'ume muuziyagi, an iide'ŋ an a y'ikkima. Kane d'on geŋ an d'ede siitandani a eedaŋ, kane bundidi wenda soo toŋ yi k'aane yi k'ad'de t'urzi geŋno ye. ²⁹ Wo a kaamiki an d'iise dollite, an'de: «Kee Isa Ulo Raa no, ki dehu moo me a tukki kaye me? Kee k'iido keŋno k'ay di'n dabire ki poone onniyo booro t'a aana ko?»

³⁰ Goppon tiŋ geŋ i d'ede tor'do meeda ki kinzir an elso. ³¹ Kane siitandani geŋ an i d'obe bey a Isa, an'de: «Kee k'ay ti'n lomme maŋ, k'ay ti'n agibi ay t'ette adda tor'do kinzir ettiyo.» ³² Isa y'an di ruute, y'ede: «Kun t'ad'do!» Inokino t'ekki d'on sire geŋ an t'ud'de, an t'iide adda kinzirdari. A kaamiki t'awwa t'ekki kesse geŋ, tor'do pay t'a zide okko, kinzirdari an t'ibi adda bar, an t'inda adda k'ahu. ³³ Kane d'on k'elso geŋ an d'ukke k'adda geeger, an an t'iide taaya a suldi pay d'on ize wo a munda wede ize a tukki d'on sire an d'ede siitandani a eedaŋ geŋ me. ³⁴ Inokino maŋ

dɔŋ pay t'adda geeger an t'uddo, an t'ette k'ume k'Isa. Aame an iiney a sirpadí maŋ, an i d'obe bey kono ti siifadaŋ y'a eŋgile.

9

Eliyo beeko a wede ruŋguyun
(Markus 2.1-12; Lik 5.17-25)

¹ Saŋ maŋ Isa yi ti gili adda tooko, y'a diipida bar sey wo y'a t'iide k'adda geeger ere yi-lekkiyo. ² Doŋ miibi an i d'umbo wede ruŋguyun kaŋ moone a zaade. Isa yi wulle kane an ziipe addaŋ a yode maŋ, aame geŋ yi di ruute a wede ruŋguyun, y'ede: «Ulo ki nuŋ ki t'oofo addá, oldikadá n'a y' t'ize tambobino.» ³ Injino maŋ i d'ede dɔŋ suuniyo k'oogoro miibi an di rootiyto t'adda k'addaŋ, an'de: «Wede eŋ yi kalda suma Raa!» ⁴ Isa elkisadaŋ y'a ti zuune wo y'a ruute, y'ede: «Ki moo me un d'ede elkiso ere oldo adda k'addugun me? ⁵ Ise laylay a jiire miŋ too me a nuŋ n'a roote: “Oldikadá Raa y'a y' t'ize tambobino” kunuŋ, n'a roote: “Ki t'oozo wo k'a oziro” me? ⁶ Wo ni dehu kun di suune, nuŋ wede an n'ehe aa ulo wede eŋ, adda duniya ette o d'ede toogo k'isiyo tambobino a oldiko.» Maŋ yi di ruute a wede ruŋguyun, y'ede: «Ki t'oozo, ki t'ambo zaadaya, k'a aaho boozá!» ⁷ Wede geŋ y'a t'iiziga wo y'a aahe boozí. ⁸ Aame dɔŋ duuru an wulle munda wede ize geŋno maŋ, orgiso t'anni ziiɗa wo an di tamma Raa wede ele toogo injino a d'uwu.

Waaku Matiye
(Markus 2.13-17; Lik 5.27-32)

⁹ Tin geŋ Isa y'a iide daana maŋ, a urzi yi wulle wedusu sundi Matiye yi guune a ume naabadí yi seŋdu jibaaye. Isa yi di ruute, y'ede: «Ki ni daani!» Maŋ yoŋ y'a t'iiziga wo y'a yi diine. ¹⁰ Isa y'iide'ŋ y'a guune ombó ti sanalliyagí adda boy ki Matiye. Aame an di-guune maŋ, doŋ seŋdu jibaaye baadaŋ ti doŋ k'oldiko oŋgo pây an di guune ti kane kaŋ soo. ¹¹ Kane Pariziyen an wulle inŋino maŋ, an an di ruute a sanalliyagí, an'de: «Ki moo me wede dooyisagun yi d'ombó ti doŋ seŋdu jibaaye wo ti doŋ k'oldiko oŋgo me?» ¹² Isa yi'n illiga maŋ, y'a ruute, y'ede: «Kane doŋ waaliŋ an ki y' dehe ye wede daawiya me, wo i y' dehe doŋ k'eeni. ¹³ Kun'do, kun ti dooyi ono doŋ Raa yi ruute ti kaaga, y'ede: "Ni dehu kun d'ise adde koduwo ti duwo, geŋ i jiire sedefe ere kun isiyo ki seydi*." Derec, nuŋ ni k'iido'ŋ waaku kane doŋ ki diine ye, wo de n'iido'ŋ waaku kane doŋ k'oldiko.»

*Ono ombóde a urzi lekkiyo daa k'ombó
(Markus 2.18-22; Lik 5.33-39)*

¹⁴ Inŋino maŋ kane sanalliyagi ki Zaŋ Batis an d'iide an tunde Isa, an'de: «Ki moo me kane sanalliyagá onniyo muno an ki lekkiyo daa k'ombó ye, wo kacin kaye ti kane Pariziyen onniyo muno ay di lekkiyo daa k'ombó me?» ¹⁵ Isa y'an di'n gime onamaŋ, y'ede: «Kun elkiyo miŋ doŋ an'ni wiiko a tarnaape seŋdu, an di lekke sommagi dondoŋ koo, aame kule k'ere yoŋ a diinayaŋ maŋ? Aha, inŋino ye! Wo saŋ onniytagi an d'aana, aame kule k'ere ti diinayaŋ

* **9:13** 9.13 Kun wollo adda mattup ki Oze 6.6.

an ti y'umba maŋ. Aame geŋ kane onniyo muno an di lekka daa k'ombo kollo.

¹⁶ Beehiye ye wenda yi d'ambe buude kalle aware y'a-t'obbira ekki kalle mazzini me, para maŋ buude geŋ y'a t'aadi kalle geŋŋo, a di sittite a ceere sey. ¹⁷ Wo soŋ beehiye ye wenda yi-t'eepe toote k'inŋi biŋ wede oozige botto adda riitile wede mazzini me, para maŋ riitile a batte, toote geŋ a t'obi siido wo riitile a latte pây. Ki too maŋ yi-t'eepe toote wede oozige botto adda riitile wede aware, wo geŋ a lekke beehiye.»

*Eliyo beeko a erewo wo
baldîya k'uto ki wede i-d'ede gooliko
(Markus 5.21-43; Lik 8.40-56)*

¹⁸ Aame Isa y'an ti rootiyto inŋino geŋ, i d'iina wede inŋino i-d'ede gooliko. Y'a d'iide sirpa k'Isa, y'a-dikke a daanadí wo yi di ruute, y'ede: «Ankenŋo eŋ miŋ uto nuŋ t'a t'ihe. Wo de k'a ette maŋ, ki zaapey beezá a tuddutú wo t'a baldîy.» ¹⁹ Maŋ Isa y'a t'iiziga, wo ti sanalliyagí an di diine wede geŋŋo.

²⁰ Aame an eŋgile geŋ i d'ede erewo soo inŋino ti dabirsa, puuzo obite t'itatú iide ozzine koomat makumu sire. Inŋino ti-t'iide ti dar k'Isa, t'a-butte bize kallayí, ²¹ kono t'a ruute t'adda k'addutú, t'ede: «Aame n'iina n'a butta a kallayí d'anjâl toŋ maŋ, n'a utta t'eenizó me.» ²² Maŋ Isa y'a gilde, yi di wolleiyo wo y'a ruute, y'ede: «Uto ki nuŋ, mi t'oofo addí! Kono koŋ mi ziipe addí a nuuno geŋ, m'utte.» A kaamiki, erewo t'a uune bee.

²³ Aame Isa y'iiney a boy ki wede i-d'ede gooliko geṅṅo maṅ, yi'n uuney duwo an isiyo unto ti siriryagi. ²⁴ Maṅ Isa y'a ruute, y'ede: «Kun t'adḍo t'adda boy me, kono uto ti k'inda ye, ti moone moone.» Wo kane duwo geṅ an di y'okko maade. ²⁵ Aame doṅ duuru geṅ an ti'n uḍḍe maṅ, Isa yi-t'iide k'adda biino, yi ziida bey k'uto wo t'a t'iiziga. ²⁶ Rabila gette i di tiipe adda siido gette pay.

Eliyo beeko a koṅzayi sire

²⁷ Tinṅ geṅ Isa y'eṅgile maṅ, i d'ede koṅzayi sire inḱino an di y' daaniya, an di ḍollite an d'eesiyo: «Kee Wede ti biza bumbu Dawut, k'iso adde koḍuwo, k'iso adde koḍuwo!»

²⁸ Isa y'iiney boy wo yi t'iide adda maṅ, kane koṅzayi geṅṅo toṅ an a-t'iide, wo an a d'iide sirpadí. Maṅ Isa y'anni tunde, y'ede: «Kun ziipe addugun ko, nuṅ n'aane n'un t'ele beeko me?» Maṅ kane an i ti'n gime onamí, an'de: «Eyye Galmeegey, ay ziipe addey.» ²⁹ Inḱino maṅ y'an buttite a edayan wo y'a ruute, y'ede: «Munḍa geṅ Raa y'un ti y'iso kono kun ziipe addugun a nuuno geṅ me.» ³⁰ Wo edayan a t'ihina an di wolliyo. Maṅ Isa y'an di ruute ti golla zakidí, y'ede: «Kun ollo koḍuwo, a wenda soo toṅ kun roota ye a munḍa wede ize eṅ me.» ³¹ Wo kane aame an t'udḍe maṅ, an d'iise rootiyto sundí adda siido gette pay.

Isa ti wede i k'orbe ye

(Lik 11.14-15)

³² Aame kane an eṅgile geṅ, duwo an i d'irkido wede soo inḱino bizí i t'ippe yi k'orbe

ye, kono i-d'ede siitan a eedí. ³³ Isa y'a-t'ilmi siitan gette, wo aame ti t'udfde maŋ, wede bizí i t'ippe geŋ y'a iise ono. Maŋ kane d'ofŋ duuru geŋ an ziidfa giggiraŋ, wo an di ruute, an'de: «A siido k'Izirayel ette, munda kino'ŋ kaŋ soo toŋ ay ki wulle ye.» ³⁴ Wo miŋ kane Pariziyen an di ruute, an'de: «Geŋ Meeda siitandani i eliyoo toogo ki lommite siitandani me!»

*Isa yi wolliyoo sommagi d'ofŋ duuru
(Markus 6.6,34; Lik 10.2)*

³⁵ Adda siido gette Isa yi d'ettiyo geeger ti geeger wo ille ti ille, yi dooyisito duwo adda boydfi d'ofŋ Yawudiyagi ge dooyiso, y'an kazita Rabila Majjaanawa ki Moziko Raa, y'an d'eliyo beeko a d'ofŋ pay eeni wo d'ofŋ pay an d'ede ita k'eeni tuuku toŋ maŋ. ³⁶ A d'ofŋ duuru pay a d'aanadí geŋ i di t'ize sommagi, kono kane geŋ an urme wo eedaŋ ti digge aakede dambami daa wede k'elsadaŋ. ³⁷ In'kino maŋ y'an di ruute a sanalliyagi, y'ede: «Kane d'ofŋ duuru en aa doome goole y'ize k'aydu, wo d'ofŋ naabo baata. ³⁸ In'kino kun tondo wede doome kono y'a-t'igibo d'ofŋ naabo k'aydu.»

10

*Naabo sanalliyagi kane koomat makumu sire
(Markus 3.16-19; Lik 6.14-16)*

¹ Isa y'a-wiike sanalliyagi kane koomat makumu sire, y'an d'ele toogo ki lommite siitandani d'ofŋ an t'ooney a d'aanadaŋ, an di t'eley beeko a d'ofŋ an d'ede ita k'eeni tuuku toŋ maŋ wo a aadumutu tudde pay. ² Kun ollo en

sumbiyagi dɔŋ zina k'Isa kane koomat makumu sire: ki poone Simo wede sundí soo te Piyer, wo leemadí Andire; Zak ti leemadí Zaŋ, kane sirwan pay inŋi Zebede; ³ Pilip ti Bartelemi; Toma wo Matiye wede sedɔdu jibaaye; Taade wo Zak ulo k'Alpe; ⁴ Simo wede addí wehini kono siidadí me, wo Ziidas Iskariyot wede saŋ y'an di y' t'ela Isa a bey dɔŋ k'olmidayí.

*Agisa ki sanalliyagi kane koomat makumu sire
(Markus 6.7-11; Lik 9.2-5; Lik 10.3-12)*

⁵ Kane dɔŋ koomat makumu sire geŋ, Isa y'an agisa k'isiyo naabadí wo y'an di ruute munda wede an d'isey, y'ede: «Kun ettey ye ki tukki kane dɔŋ Yawudiyagi ye me, wo k'adda geeger ki siidɔ Samari soo toŋ kun ettey ye. ⁶ Ki too kun d'ettey ki tukki dɔŋ k'Izirayel kane aa dambami i digge. ⁷ A urzi kun di kazitoy, kun d'eesoy: “Moziko Raa t'iina goppon.” ⁸ Dɔŋ k'eeni kun an d'eloy beeko, dɔŋ unto kun ti'n baldɔy, dɔŋ bitide kun an d'eloy beeko an t'isoy kamileŋ, siitandani kun di'n olmitoy. Kune suldi pay kun uune ki waawiye, wo kun an eloy toŋ ki waawiye. ⁹ Ki torguwagun dap kun amba ye, ise sonko, ise tammiyagi sunŋi sunŋi adda poosagun me, ¹⁰ ise eese, ise kalle ki sirwe, ise tobiyagi zoŋ ki sirwe, ise dalka toŋ maŋ. Derec, wede yi naabiya'ŋ i-d'ede urzi y'a oomi ti bey dɔŋ y'an naabiya.

¹¹ Aame kun t'iidey adda geeger ere tuuku ise adda k'ille tuuku toŋ, kun di tonditoy wede beehiye ede wo y'unni seeda bey sire maŋ, kun di deegoy di yode bini engilsagun. ¹² A ettiyagun

ki boy wede kun ettey geɲ, kun d'eesoy: “Toose Raa ti koono eggun.” ¹³ Aame dɔŋ boy geɲ an unni ziidɛy maɲ, toose kune t'a koonoy eedaɲ, wo aame an un ki'n ziidɛy ye maɲ, toose kune t'a-kamoy ki tuddugun. ¹⁴ Aame an un ki'n ziidɛy ye wo onamgun an k'illigey ye maɲ, a engilsagun ti boy geɲno ise ti geeger gettiyo geɲ, odde zongun toɲ kun an ti y' tottigoy, geɲ i-kaza Raa ulbɪ unse ye ti kane me. ¹⁵ Derec inkinno wo n'un di rooto: Onniyo ere Raa yi deƙka booro gette, kane dɔŋ siido Sodom ti Gomor ti kaaga Raa y'an igge pay* geɲ, booradaɲ t'a koono soodo ti dɔŋ ki geeger gettiyo.»

Dabar ere etto a dɔŋ k'Almasi

(Markus 13.9-13; Lik 12.11-12; 21.12-19)

¹⁶ «Kun ollo, nuɲ n'un agisa eɲ aakede dambami k'adda diine sullibagi. Inkinno maɲ kun koonoy mentikagi aakede mimbayi, wo tasse aakede deere. ¹⁷ Kun koonoy mentikagi, kono duwo an un ti'n sedɛy, an un di'n t'ettey k'ume dɔŋ booro wo an un di'n gorpipay ti marpa adda boyɛ dɔŋ an di dooyiso. ¹⁸ Kono kune dɔŋzɔ geɲ, an un di'n t'ettey daana dɔŋ deero siido wo daana mozagi. Aame geɲ, a daanadaɲ wo a daana kane dɔŋ Yawudiyagi ye, kun t'ooney urzi kun di rootey a sulɛ dɔŋ kun wulle wo kun illiga a tukki nuuno geɲ me. ¹⁹ Aame an un di'n t'iidey k'ume dɔŋ booro maɲ, ulbugun un t'oodey ye a maana k'ono dɔŋ kun di rootey, ise a munda wede kun di rootey me. A ume geɲ miɲ Raa y'un

* **10:15** 10.15 Kun wollo adda mattup ki Zenez 18.16–19.29.

t'eley ono dɔŋ kun di rootey. ²⁰ Inƙino maŋ aame kun rootey geŋ, ono ettey ti suuniyo kune ye, wo unni dokkey Unde ki Meegugun Raa.

²¹ Leema y'an di y' t'ela leemadí a bey d̄uwo ki t̄owwadí, wo meege toŋ inƙino kay a in̄nizí me. In̄ni an di-kima adu ki maawaŋ, an deha urzi, d̄uwo an di sedfa maawaŋ ki t̄owwadaŋ.

²² Kune dɔŋ duniya pay an un di'n olmidfa kono kun umbe a sundó, wo de wede y'a ziidfa zakidí a urzizó bini danƙu maŋ, yode geŋ Raa y'a y'utta.

²³ Aame adda geeger tuuku an unni dabirsa maŋ, kun t'omboy ki geeger ti doolo. Derec inƙino wo n'un di rooto: Kune geegiryagi ki siidfa k'Izirayel geŋ kun ki ti'n ozira pay ye, ki poone nuŋ wede an n'ehe aa ulo wede eŋ, n'a kimo me.

²⁴ Sanallusu geŋ yoŋ t'ekki wede dooyisadí ye, wo wede naabo toŋ yoŋ t'ekki galmeegi ye. ²⁵ Sanallusu geŋ, i dehu y'a t'ise aa wede dooyisadí danƙal, wo wede naabo toŋ inƙino y'a t'ise aa galmeegi. Aame nuŋ wede boy d̄uwo an ni kaldfa an'de nuŋ Belzebul maŋ, kune dɔŋ boozó an un di'n kildfa a ceera sey.»

*Wedusu wede kun i-d'orgide
(Markus 8.38; Lik 9.26; 12.2-9)*

²⁶ «Kune a d̄uwo kun an orgide ye. Suldi dɔŋ pay ombide'ŋ, saŋ onniyo soo a t'oodiba ita, wo ono dɔŋ i ki dehu d̄uwo an k'olliga ye geŋ, saŋ onniyo soo dɔŋ pay an di'n olliga.

²⁷ Munda wede n'un rootiyo a zimolo geŋ, kun ti y' rooto kereŋ, wo munda wede an un melinso a kuudugun geŋ, kun yi rooto aa kun a ti gili t'ekki biino kun d̄olle. ²⁸ Kun an orgide ye a dɔŋ i

tôwwo tudde wo an k'aane tôwwo k'unde ye me. Ki too mañ kun d'orgide a Raa, yode wede aane i t'ide tudde ti unde pây adda k'uwwo. ²⁹ Kun suune ooyo sire doo miñ in t'owile ti soñko soo kollo, wo ti diinayan soo toñ a siido i k'oore ye, daa ki Galmeegugun Raa yi ki suune ye me. ³⁰ Wo ki kune, ilali k'eggun genno toñ Raa yi ti'n kaza pay. ³¹ In kino kun orgide ye, kono kune zooyagun yi jiire ooyo baadan!»

Rootiyo a daana duwo ki daaniya k'Isa

³² «Wede tuuku yi ruuta a daana duwo yon ki nuuno mañ, nuñ toñ n'a rootey kay yon ki nuuno, a daana Meegó Raa a kandaane me. ³³ Wo de wede tuuku yi ruuta a daana duwo yi ki n' suune ye mañ, nuñ toñ n'a rootey ni ki y' suune ye kay, a daana Meegó Raa a kandaane me.»

Isa y'iido ki moo me?

(Lik 12.51-53)

³⁴ «Kun elke ye, nuñ n'iido n'un t'ela toose adda duniya me. N'a k'iido ti toose ye, wo de n'a iido ti deyyiso. ³⁵ Eyye, nuñ n'iido ulo ti meegí n'an ahinte, uto ti mettú n'an ahinte, erewo ti andutú n'an ahinte. ³⁶ Wede tuuku toñ i di t'isa don k'aduzi miñ, don adda boozí genno.

³⁷ Wede yi geyyiso meegí ise meedí a jiire nuuno mañ, yon gen yi k'iide ki daaniyadó ye. Wede yi geyyiso ulí ise utí a jiire nuuno mañ, yon gen yi k'iide ki daaniyadó ye. ³⁸ Wede yi k'iyya y'a ki t'inda kono nuuno wo y'a ki n' daane ye mañ, yon gen yi k'iide ki daaniyadó ye. ³⁹ Wede yi diha boohiyo tuddí k'aggadí mañ,

y'a ti dagga, wo wede y'iila tuddí kono nuuno maɲ, y'a t'utta.»

Wede eliyó geɲ, aggadí y'a ti t'ooney

(Markus 9.37,41; Lik 9.48; 10.16; Zaɲ 13.20)

⁴⁰ «Wede unni seedu bey sire maɲ, geɲ aa yi seedu nuɲ batum, wo wede yi ni seedu bey sire maɲ, geɲ aa yi seedu wede i n'igibo. ⁴¹ Wede i seedu nebi ki Raa kono yoɲ nebi maɲ, munda wede Raa yi dehu yi-t'eley a nebi geɲ, y'a yi t'ooney kay, wo wede yi seedu wede ki diine kono yoɲ ki diine maɲ, munda wede Raa yi dehu yi-t'eley a wede ki diine geɲ, y'a yi t'ooney kay. ⁴² Derec injino wo n'un di rooto: Wede tuuku yi eela ahu ɲoyoyo a kulso daɲɲal, a wede soo duwo an yi wolliyó yoɲ ɲeɲku kono yoɲ ti diine sanalliyagó maɲ, munda wede Raa yi dehu yi-t'eley geɲ, y'a yi t'ooney.»

11

Doɲ zina ki Zaɲ Batis ti Isa

¹ Aame Isa y'a ti dɲiɲge ti rootiyto a munda wede kane sanalliyagí koomat makumu sire an d'isey maɲ, tiɲ geɲ y'a inɲile dooyiso duwo wo yi kazita adda geegiryagi ki siido gettiyo.

² Wo Zaɲ Batis yi lekkiyo dangay geɲ, y'a illiga doɲ an tôwwo taaya a naabo k'Almasi Raa yi biire. Injino maɲ yi d'igibe doɲ miibi ti diine sanalliyagí ki tukk'Isa. ³ An iide'ɲ an di y' tunde, an'de: «Kee miɲ Almasi Raa yi biire, saɲ a etto ko? Kunuɲ ay di dello wede doolo ko?» ⁴ Isa y'an di'n gime onamaɲ, y'ede: «Kun'do a Zaɲ, kun i-t'ôdoy taaya a munda wede kun ollige wo kun

wolliyo eŋ me: ⁵ Konzayi an di wolliyo kereŋ, doŋ jekese an sooru beehiye, doŋ bitide an t'ize kamileŋ, dunjiyagi an d'ollige, doŋ unto an di bilde wo Rabila Majjaanawa an an gizite a doŋ an k'ede munda ye. ⁶ Wo unŋsuwo a wede y'a ziida zakidi kono nuuno bini doŋaŋ!»

Rootiyo k'Isa a tukki Zaŋ Batis

⁷ Sanalliyagi ki Zaŋ Batis an t'ingile maŋ, aame geŋ Isa y'a iise rootiyto a doŋ duuru a tukki Zaŋ, y'ede: «Kun iide k'adda balda wolliyo ki moo me? Ki wedusu wede aa alala ere maaye yi t'agisa gettiyo ko? Aha. ⁸ De inŋkino kun iide wolliyo ki moo me? Ki wedusu yi t'usse kallagi majjandani ko? Wo de kane doŋ ossiyo kallagi majjandani geŋ, an lekkiyo adda boydi mozagi. ⁹ De kun iide wolliyo ki moo me? Ki nebi ko? Eyye, wo kun ollo n'un di rooto, yoŋ geŋ yi jiire nebi sey. ¹⁰ Yoŋ geŋ wede an riŋe ti kaaga adda mattup ki Raa, an'de: "Kun ollo, nuŋ n'a t'igiba wede zindó y'a ooguma ki poone ti kee, y'a di t'okkimey urzizá*."» ¹¹ Isa y'a ruute sey, y'ede: «Derec inŋkino wo n'un di rooto: Ti diine duwo doŋ pay erayi an ehe geŋ, wede aase goole a ceere Zaŋ Batis umbo. Wo inŋkino toŋ maŋ, wede yoŋ neŋku a jiire adda Moziko Raa geŋ, yoŋ goole yi jiire Zaŋ. ¹² T'ume Zaŋ Batis y'iise naabo Raa bini ankenno geŋ, duwo an d'eliyo gotono kono an t'ette adda Moziko Raa, wo kane doŋ i ŋaayu ki toogo geŋ, an dehu an di-t'oobe. ¹³ Raa y'an di ruute a duwo a tukki Mozikadi ere

* **11:10** 11.10 Kun wollo adda mattup ki Malasi 3.1.

a etto, t'urzi k'ono dɔŋ an riije ti kaaga adda mattup k'oogoro Muusa ti dɔŋ pay ki nebiyagi, bini aaniya Zaŋ Batis. ¹⁴ Aame kun dehu kun ambe maŋ, geŋŋo Zaŋ yode wede nebiyagi an ruute, an'de: "Saŋ Eli y'a etto me†." ¹⁵ Wede i-d'ede kuwwa k'ollige maŋ, y'ollo koduwo!

¹⁶ Doŋ aŋkenŋo eŋ n'a t'eese kane aa wee wee? Kane an deeyiso aa inŋi an ti guune a bere dɔŋ duuru, an di waakutu eebaŋ, an d'eesiyo:

¹⁷ "Kaye ay un di biiha siraro toŋ maŋ, kun ki d'immira ye!

Ay un d'ûure ôoro k'unto toŋ maŋ, kun ki d'iile ye!"

¹⁸ Inŋino Zaŋ y'iina geŋ, onniyo muno yi lekkiyo daa k'ombo, toote k'inŋi biŋ yi k'iibe ye, wo duwo an di rootiyo, an'de: "Yoŋ i-d'ede siitan a eedí!" ¹⁹ Wo nuŋ wede an n'ehe aa ulo wede eŋ, n'iina maŋ ni d'ombo ni sobo, wo an di rootiyo, an'de: "Kun wollo, wede eŋ y'elkiyo miŋ a ombo ti sobo toote k'inŋi biŋ daŋŋal, yoŋ lanze ki dɔŋ sedfu jibaaye wo ti dɔŋ k'oldiko oŋgo." Wo Raa'ŋ, suuniyo k'ono ere i d'ede, duwo an ti zuune tod'te ki diine t'urzi naabatú.»

*Geegiryagi dɔŋ i-tuuge k'ambu a Isa
(Matiye 10.15; Lik 10.12-15)*

²⁰ Adda geegiryagi dɔŋ Isa y'a ize suldi k'armika dɔŋ a ise baadaŋ geŋ, dɔŋzaŋ an ki ti gime lekkiyadaŋ ye. Inŋino maŋ y'an di'n iise aapufu, y'ede: ²¹ «Dabar a kune dɔŋ geeger Korazen! Dabar a kune dɔŋ geeger Betsayda! Derec, aame suldi k'armika dɔŋ Raa y'ize di

† **11:14** 11.14 Kun wollo adda mattup ki Malasi 3.23.

kune geɗ geɗ aŋki y'aase a geeger Tir ti Sidon maɗ, aŋki ti kaagine donzan an t'ossite kallagi molo wo tuddan an aa di kosse puure, wo an di-kime lekkiyadan. ²² Eyye, wo kun ollo n'un di rooto, onniyo ere Raa yi deƙka booro gette, kane don geeger Tir ti Sidon geɗ booradan t'a koonaa soodo ti ere ki kune. ²³ Wo kune don geeger Kapernayim, kun elkiyo min Raa y'un ti'n sika k'awwa ki kandaane ko? Aha, Raa y'un ti'n deega adda diine don unto. Derec, aame suldi k'armika don ize di kune geɗ, aŋki aase a geeger ki Sodom maɗ, geeger gette ankenno ton t'a lekke sey. ²⁴ Kono kamo n'un di rooto, onniyo ere Raa yi deƙka booro gette, kane don siido Sodom geɗ booradan t'a koonaa soodo ti ere ki kune.»

Meega Raa ti Ulo
(*Lik 10.21-22*)

²⁵ Aame geɗ Isa y'a ruute, y'ede: «Mee'ki nun, kee Galmee'ki kandaane ti siido, ni ki tamma kono suldi en k'an di'n umbida a don suuniyo k'ono wo a don eedan soodo a elkiso geɗ me, wo k'an t'iidiba ita a don aa inni sunni. ²⁶ Eyye Mee'ki nun, geɗ ki dihe suldi a t'ise inkinoo.»

²⁷ Suldi pay Meego Raa y'o n'ele a beezo, wenda soo ton a suune Ulo umbo, i y' suune Meega danjal. Wo wenda soo ton a suune Meega umbo, i y' suune Ulo wo ti kane don Ulo yi dehu y'an t'oodiba itadi danjal.»

Isa ume puukiyo k'undiyagun

²⁸ «Kune don pay i sarkiya attidi wede ki don dooyiso k'oogoro an zaapu eggun wo kun urme

geɲ, kun'di k'ume nuuno, wo nuɲ n'un ti'n puuka. ²⁹ Kun t'ambo talgayó‡ wo kun d'oziro a urzi dooyisadó, kono nuɲ addó tasse ni ki koliyo tuddó ye, wo kune kun t'oona puukiyo k'undiyaguɲ. ³⁰ Derec, talgayó yon i k'oone ye k'ambu me, wo attidizó wede n'un t'ela yon soodo ki sarkiya me.»

12

*Isa ti onniyo ere ki puukiyo
(Markus 2.23-28; Lik 6.1-5)*

¹ Saɲ maɲ a onniyo ere ki puukiyo Yawudiyagi maɲ, Isa yi doopide t'adda dombi dɔɲ ki geme ti sanalliyagí. Aame geɲ kane sanalliyagí mosogo, maɲ an d'iise sattita geme an di doydiso. ² Kane Pariziyen an wulle in kino maɲ, an i di ruute Isa, an'de: «Ki wollo sanalliyagá an d'isiyo munda wede oogiradiɲ ti k'ele urzi k'isiyo ye a onniyo ere ki puukiyadiɲ te!» ³ Wo de Isa y'an di ruute, y'ede: «Ki kotto kun gire munda wede ti kaaga onniyo soo yode Dawut y'ize ti dɔɲ a itadí, aame mosogo ti'ni ziida geɲ me. ⁴ Yi-t'iide adda Boy Raa wede an ikkima ki golmodo, y'a ziki mappa wede an i ele sedefe a Raa, wo yode ti dɔɲ a itadí an d'iimi. Wo Raa y'an k'ize munda ye, ki too maɲ kane an k'ede ye urzi an d'oomi me, oogiradiɲ t'ele urzi a dɔɲ sedefe d'anjal. ⁵ Ki kotto kun gire adda mattup k'oogoro Muusa me a onniyo ere ki puukiyadiɲ ton, dɔɲ sedefe i naabiya adda Boy Raa geɲ, an ki daaniya urzi

‡ **11:29** 11.29 Ambo talgayó: I-kaza dooyiso k'Isa kun d'oziro eego.

k'oogoro k'onniyo gettiyo ye, an di naabiya, ton maŋ booro t'an ki'n seedu ye. ⁶ Wo kun ollo, n'un di rooto: a enno i d'ede wede ede i jiire 'Boy Raa! ⁷ Kune'ŋ duwo eŋ munda ulsu an k'ize ye ton, kun'de booro ti'ni ziida. Inkiŋo maŋ kun ki'n zuune ye ita k'ono doŋ an riine ti kaaga adda mattup ki Raa, an'de: "Ni dehu kun d'ise adde koduwo ti duwo, geŋ i jiire sedeke ere kun isiyo ki seydi*." ⁸ Isa y'a ruute sey, y'ede: «Nun wede an n'ehe aa ulo wede eŋ, o d'ede urzi k'isiyo munda wede aa addo i dehu ekk'onniyo ere ki puukiyadiŋ te.»

Wedusu beezí unto
(Markus 3.1-6; Lik 6.6-11)

⁹ Tin geŋ Isa y'a ingile yi-t'iide adda boy wede Yawudiyagi ge dooyiso. ¹⁰ Adda boy geŋ i d'ede wedusu soo inkiŋo beezí unto. Kane Pariziyen an dehu an t'oone urzi an di sakiya Isa, kono kamo an di y' tunde, an'de: «Oogiradiŋ urzi t'ele ko, k'eliyo beeko a onniyo ere ki puukiyadiŋ te?» ¹¹ Wo yo Isa y'an di'n gime onamaŋ, y'ede: «Ti diinaguŋ eŋ wee wee, aame i-d'ede damsadi soo danjal ti t'iire adda k'old'e sohuru a onniyo ere ki puukiyadiŋ maŋ, y'a k'ette, t'adda k'old'e y'a ki t'adde ye me? Eyye, y'a-t'adde! ¹² Wo wedusu geŋ yi jiire dama taŋ baadaŋ! Geŋ inkiŋo oogiradiŋ urzi t'ele a wedusu ki-d'ise beehiye a onniyo ere ki puukiyadiŋ te.» ¹³ Inkiŋo maŋ Isa yi di ruute a wede geŋ, y'ede: «Beezá ki y'ondo.» Maŋ y'a y'unde, wo beezí a t'ikkima aakede bakadi soo me. ¹⁴ Saŋ kane Pariziyen

* **12:7** 12.7 Kun wollo adda mattup ki Oze 6.6.

tiŋ geŋ an t'udde, an iide'ŋ an t'ugiye, an t'ïide onamanŋ kaŋ soo a tukk'Isa, an di dehe urzi ki tôwwadí.

Wede naabo wede Raa yi biire

¹⁵ Isa y'a ti zuune elkiso Pariziyen te, inŋkino maŋ tiŋ geŋ y'a t'irga, wo ñonŋ baadaŋ an di y' diine. Ti diinayaŋ ñonŋ pay eeni y'an d'ele beeko.

¹⁶ Wo y'an di ruute ti golla zakidi a ñuwo, kono an ki roote ye a munda wede y'ize me. ¹⁷ Geŋ inŋkino a iina kono a-t'ette a ono ñonŋ Raa yi ruute ti kaaga ti bize nebi Ezayi, y'ede:

¹⁸ «Enno wede naabadó wede ni biire me, nunŋ ni y' giyye baadaŋ, wo ulbó pay unŋe ti yode me.

Undó t'a koona a eedí,
wo a ita ñuwo pay y'an kizita urzi wede ki diine ki Raa.

¹⁹ Yi ki deha niikiyto k'ono ulpi ti wenda ye, yi ki ñillita ñollite ye,
wo an k'olliga golladí a bere ñonŋ duuru ye.

²⁰ Yoŋ y'a koona tasse ti kane ñonŋ toogadaŋ umbo me, geŋ aakede alala ere i-guudfite gette yi ki ti damba ye,
wo rippinso k'uwwu ti koddiyo botto gette, yi ki ti t'ïda ye.

Y'aasa inŋkino bini munda wede ki diine geŋ y'a ceera oldfiko.

²¹ Wo ita ñuwo pay an zaapa elkiyadaŋ a sundí†.»

Isa ti Belzebul

(Markus 3.22-30; Lik 11.14-23; 12.10)

† **12:21** 12.21 Kun wollo adda mattup ki Ezayi 42.1-4.

²² Saɗ maɗ Isa an i d'irkido wede soo inƙino koosiyo wo yi k'orbe ye, kono i-d'ede siitan a eedí. Wede geɗ Isa yi-d'ele beeko, bizí a t'ihina y'a iise ono wo yi wolliyo kereɗ. ²³ Kane ɗoɗ duuru geɗ an ziiɗa giggiraɗ wo pay an di ruute, an'de: «Yode eɗ wede an yi waaku Wede ti biza bumbu Dawut ye ko?» ²⁴ Wo kane Pariziyen an illiga inƙino maɗ, an di ruute, an'de: «Wede eɗ, tode Belzebul Meeda siitandani i eliyo toogo ki lommite siitandani me!» ²⁵ Wo Isa y'a zuune elkisadaɗ, inƙino maɗ y'an di ruute, y'ede: «Moziko ere tuuku ɗoɗtu an ɗeyyiso ti tuddaɗ maɗ, mozikadaɗ a latte. Geeger ere tuuku ɗoɗtu an ɗeyyiso ti tuddaɗ, wo adda boy wede tuuku ɗoɗzi an ɗeyyiso ti tuddaɗ maɗ, kane geɗ an k'aane an ki ti lekke kaɗ soo ye. ²⁶ Geɗ inƙino kay, aame Meeda siitandani ti lommite siitandani eebutú maɗ, geɗ an ɗeyyiso ti tuddaɗ batum. Wo ɗe geɗ ki kotto mozikatú ti k'aane ti ki lekke ye! ²⁷ Kune kun'de ni lommite siitandani o eliyo toogo Belzebul. De inƙino maɗ, ɗoɗ a itagaɗ an lommite siitandani ti toogo k'aaye? Geɗ kane batum an un kaza munda wede kun rootiyo a tukki nuuno geɗ ɗerec ye. ²⁸ Wo ɗe geɗ, nuɗ o eliyo toogo Unde Raa ni lommite siitandani me maɗ, geɗ i-kaza Moziko Raa tod' t'iina di kune baa.

²⁹ Aame wede yi dehu yi-t'ette adda boy ki wede i-d'ede toogo wo y'a sikiti sulɗizí maɗ, wede geɗ ki poone y'a-kettite wede toogo ɗoo miɗ, y'a aane y'a sikiti sulɗi t'adda boy kollo. ³⁰ Wede yoɗ ki nuuno ye'ɗ, yoɗ aduzó. Wo wede y'a ki n' noogiyo ki tussiyo ye'ɗ, yoɗ yi teepiyo

ki teepiyo. ³¹ Geŋ kono k'inkino, n'un di rooto, ɗuwo Raa y'an t'isa tambobino a oldiko ere pay an isiyo, ti kaldita ere pay an kaldita suma Raa gette. Wo ɗe wede i kaldita Unde Raa maŋ, a oldikadí gette Raa yi-k'isa tambobino ye. ³² Wede tuuku yi ruuta munda ulsu a tukki nuŋ wede an n'ehe aa ulo wede enno maŋ, a oldikadí gette Raa yi-t'isa tambobino. Wo ɗe wede tuuku i ruutita munda ulsu a tukki Unde Kamileŋ maŋ, a oldikadí gette Raa yi-k'isa tambobino ye, ise adda duniya ere ankenno, ise adda duniya ere ki ɗaana toŋ maŋ.»

Undumu ti inñizí

(Matiye 7.16-17; Lik 6.44-45)

³³ «Aame undumu beehiye maŋ, inñizí toŋ beehiye pây. Wo aame undumu ulsu maŋ, inñizí toŋ ulpi kay. Inkinno maŋ undumu in yi suuniyo t'urzi k'inñizí. ³⁴ Kune ɗoŋ ulpi aakede maŋkikagi ɗe! Mummino kun d'aane kun di roote ono ɗoŋ beehiye me? Derec, munda wede ɗuwo an okumso adda k'addaŋ geŋno adɗiya ti bizaŋ me. ³⁵ Wedusu wede beehiye'ŋ, beehiyo t'ettiyo ti sulɗi ɗoŋ beehiye y'ukume adda k'addí, wo wedusu wede ulsu'ŋ, munda ulsu y'ettiyo ti sulɗi ɗoŋ ulpi y'ukume adda k'addí. ³⁶ Kun ollo, n'un di rooto: A onniyo ere Raa yi ɗekka booro gette, ɗuwo a ono ɗoŋ pay an ruutite daa k'urzizaŋ geŋ an d'oopey eedaŋ. ³⁷ Derec, t'urzi k'ono ɗoŋ adɗiya ti bizá, Raa y'a di roota kee ki diine a ɗaanadí, wo t'urzi k'ono ɗoŋ adɗiya ti bizá, Raa y'a di roota kee booro ti ki ziida me.»

Tondiyo ki munda k'armika

(Matiye 16.1-4; Markus 8.11-12; Lik 11.16,29-32)

³⁸ Injinko maɗ ɗon suuniyo k'oogoro miibi ti Pariziyen miibi an di tunde Isa, an'de: «Wede dooyisadey, ay dehu k'ay d'ise munda k'armika ay di wolle a kize kee Raa yi-k'igibo.» ³⁹ Isa y'an di'n gime onamaɗ, y'ede: «Ita duwo ɗon ankenno en, kane ɗon ulpi wo an ki seedu urzi Raa ye, an tondiyo munda k'armika a kize nun Raa yi n'igibo. Wo armika ti doolo Raa y'an k'isa ye, daa ki armika ere Raa y'ize ti kaaga a nebi Zonas ye maɗ. ⁴⁰ Kun suune Zonas geɗ y'a likke onnu ado wo diddo ado adda k'adde puuniso ere meeda. Injinko kay nun wede an n'ehe aa ulo wede en, an di n'ottiba wo n'a lekka onnu ado wo diddo ado adda muuzo. ⁴¹ A onniyo ere Raa yi deka booro gette, ɗon geeger ki Ninib an d'ooziga ki tukki duwo ɗon ankenno, wo an di roota: "Kune'ɗ booro t'unni ziida." An roota injinko kono aame ɗon geeger ki Ninib an illiga Zonas yi gizite urzi k'ono Raa maɗ, an di gime lekkiyadaɗ. Wo a enno i d'ede wede ede y'a jiire Zonas sey. ⁴² A onniyo ere Raa yi deka booro gette, mohita ere ti siido ki kese dandi t'a ooziga ki tukki duwo ɗon ankenno, wo t'an di roota: "Kune'ɗ booro t'unni ziida." Ti roota injinko kono tod' t'iizigo ti siidiyagi ɗon dokki t'ita Raa kono t'a olliga suuniyo k'ono ere ki Salamaɗ, wo a enno i d'ede wede ede y'a jiire Salamaɗ sey.»

Kama ki siitan ki tukki wedusu
(Lik 11.24-26)

⁴³ «Aame siitan gette ti tukki wedusu ti t'adfiya man, ti d'engilso k'adda balda dehutu k'ume wede t'a lekkey, wo ti ki d'ooniyo ye. ⁴⁴ Injino ti rootiyo adda k'addutú, ti d'eesiyo: "Ni-kime k'adda bindó ere an di n' ilmo." Wo a kamatú gette, t'iide'ŋ ti-t'uuney biino guguba, rookiyo kamilen wo suldfutú okkime beehiye. ⁴⁵ Injino man ti di kama k'adda balda, t'a waaku siitandani ti doolo sarat bundifí a jiire tode sey. An di-kama kan soo, an t'ettiyo adda biino gettiyo i-t'isiyo boozan. Injino yo wede gen, lekkiyadi ere k'ita i-t'isiyo ooŋe i ceeriyo ere ki poone. Wo gen aasa injino kay ki duwo don ankenno ulpi gen me.»

*Mekk'Isa ti zembadí
(Markus 3.31-35; Lik 8.19-21)*

⁴⁶ Isa adda boy, a don duuru y'an ti rootiyo botto, aame gen meedí ti zembadí an d'iina, wo an t'ihira ti paate, an dehu an i di roote. ⁴⁷ Man wede soo injino yi di ruute a Isa, y'ede: «K'ollo, meedá ti zembadá an t'ihira ti paate, an dehu an a-di roote.» ⁴⁸ Wo de a wede gen Isa yi di'n gime onamí, y'ede: «Ki kotto man, meedó ti zembadó an wee wee?» ⁴⁹ Man y'a d'uuye beezí ki tukki sanalliyagí wo y'a ruute, y'ede: «Kun wollo, kane enno an meedó ti zembadó me. ⁵⁰ Injino man wede tuuku y'isiyo suldi don pay Meegó Raa a kandaane yi dehu gen, yode genno leemadó, teemadó wo meedó me.»

*Ono ombide a tukki wede korso
(Markus 4.1; Lik 8.4)*

¹ A onniyo gettiyo batum, t'adda boy Isa y'a t'udde y'a ingile, y'iide'η y'a-guune a biza bar. ² Doη duuru baadan an di-t'ugiye, inkinno yi di gili adda tooko, y'a-guune wo kane doη duuru pay an t'ihira a biza bar. ³ Yoη y'an di ruutite suldi baadan t'ono ombide, y'ede: «I d'ede wedusu soo inkinno yi t'iide korso buzu k'adda doome. ⁴ Aame yi sakkisa geη, buzu ongoη a-zilditi a urzi, embi an iido'η an di-tibbe pay. ⁵ Buzu ongoη soη a-zilditi a ume wede t'adda'η paηgiragi, siifadadi baata. Kane geη a t'udde kesiko kono siifadan soodo. ⁶ Aame peedo tigilo wo t'ihina maη, kane geη a t'igge, a-biiha kono sondayzan i ki ti diige ye. ⁷ Doη soη a-zilditi adda k'ahimagi, kane geη a t'udde wo ahimagi an iiziga maη, an di'n ippe. ⁸ Doη ongoη soη a-zilditi a siido ere beehiye, kane geη a t'udde, an d'ihira wo an d'ehe: ulo muduso soo y'a ehe inni meeda, soη ada zoot wo soη ada g'ado. ⁹ Wede i-d'ede kuwwa k'ollige maη, y'ollo koduwo!»

*Ki moo me Isa yi rootiyto t'ono ombide me
(Markus 4.10-12; Lik 8.9-10)*

¹⁰ Inkinno maη kane sanalliyagi an aa d'iide ki sirpa k'Isa wo an di y' tunde, an'de: «De ki moo me k'an rootiyto a doη duuru t'ono ombide me?» ¹¹ Yoη y'an di'n gime onamaη, y'ede: «Ni rootiyto inkinno kono a kune'η Raa y'un ele suuniyo ki suldi doη ombide ki Moziko Raa te, wo a kane geη suuniyo gette Raa y'an k'ele ye. ¹² Derec, a wede i-d'ede suuniyo geη, an i-t'eela

t'eego i di t'isa baadaŋ a ceera, wo de a wede i-k'ede suuniyo ye geŋ, ere boolon i-d'ede toŋ an i-t'amba. ¹³ Kun ollo, nuŋ n'an orbe t'ono ombife me kono kane an aane an wolle toŋ, ki kotto munda an ki y' wolle ye, wo an aane an olliga toŋ, ki kotto munda an ki y'olliga ye wo itadi an ki ti suune ye. ¹⁴ Geŋ a kane geŋŋo a-t'iide a ono doŋ Raa y'igibo ti kaaga t'urzi nebi Ezayi, y'a ruute, y'ede:

“Kune kun d'olliga kereŋ, wo ono itadaŋ kun ki ti suuna ye,
kun di wolla kereŋ, wo munda kun ki y' wolla ye.

¹⁵ Derec, duwo eŋ kuwwagaŋ an a-ti ŋiyye daŋkila kono a k'olliga ye,
edayaŋ an a-t'ippe kono a ki wolle ye,
wo an t'ize tuusiyagi kono ono itadaŋ an gi di'n suune ye.

An ize iŋkino kono an ki dehu ye an di-kimo ki tukki nuŋ Raa, n'an t'ele beeko me*.”

¹⁶ Wo nuŋ n'a roote, unsuwo a kune kono edaguŋ i woliyo wo kuwwaguŋ ollige. ¹⁷ Derec iŋkino wo n'un di rooto: Nebiyagi baadaŋ ti doŋ ki diine baadaŋ an dihe an di wolle munda wede kun woliyo eŋŋo, wo an gi di y' wulle ye. An dihe an d'olliga munda wede kun ollige eŋŋo, wo an gi di y'illiga ye.»

Oodibe k'ita k'ono ombife a tukki wede korso (Markus 4.13-20; Lik 8.11-15)

¹⁸ «Iŋkino kun ollo, ette ita k'ono ombife a tukki wede korso. ¹⁹ Buzu wede i zilditi a biza

* **13:15** 13.15 Kun wollo adda mattup ki Ezayi 6.9-10.

k'urzi geɗ, i-kaza ɗuwo ɗoɗ ollige ono ki Moziko Raa wo an gi di'n seedu addaɗ ye. Aame geɗ Mohita k'oldiko t'ettiyo, ono ɗoɗ an illiga ti t'odɗipe t'adda k'addaɗ me. ²⁰ Buzu wede i zilditi a ume wede t'adda paɗgiragi geɗ, i-kaza ɗuwo ɗoɗ ollige ono Raa, kesiko ulbaɗ uɗse an d'ambu. ²¹ Wo ɗe ono sottadaɗ ti ki ti ɗeegu adda k'addaɗ, an aa ki seedu zakidɗi ye. Aame i ettiyo dabar ise ɗuwo an'ni dabirsa kono an umbe a ono Raa maɗ, kesiko an t'argu. ²² Buzu wede i zilditi adda k'ahimagi geɗ, i-kaza ɗuwo ɗoɗ ollige ono Raa, wo ɗe saɗ elkisito a sulɗi duniya ti dehuu k'urzi maala an di'n appiya ono geɗ me, an ki d'ohire ye a urzi Raa me. ²³ Ki ɗaɗgu buzu wede i zilditi a siidɗo ere beehiye'ɗ, i-kaza ɗuwo ɗoɗ ollige ono Raa wo an di suuniyo itadaɗ, an d'ohire a urzi Raa, an aa d'ooniyo eebaɗ ti doolo, aakede ulo muduso soo y'a ehe inɗi meeda, soɗ ada zoot, wo soɗ ada g'adɗo.»

Ono ombide a tukkiizi buɗgari

²⁴ A ɗoɗ duuru geɗ, Isa y'an d'iise rootiyo k'ono ombide ti doolo sey, y'ede: «Kun ollo, Moziko Raa tod' ti deeyiso aa wedusu yi giira buzu wede beehiye adda doomizi. ²⁵ Wo a didɗo ɗuwo pay an udige maɗ, aduzi y'a t'iide k'adda doome geɗɗo y'a di giira iizi buɗgari adda kay, wo tuddi yon y'a aahe. ²⁶ Aame mudu geɗ an t'udɗe wo an iise paɗita maɗ, iizi buɗgari geɗɗo toɗ an di biɗe kay. ²⁷ Inkiyo kane ɗoɗ naabo ki wede boy geɗ, an iido'ɗ an i di ruute, an'de: "Galmeegyey, para maɗ ki giira buzu wede beehiye adda doome me, ɗe iizi buɗgari geɗ an

iido ti too me?” ²⁸ Yoŋ y’an di’n gime onaman, y’ede: “Geŋ ize aduzó.” Injino maŋ kane doŋ naabo an di y’ tunde, an’de: “Ki dehu ay t’odo iizi buŋgari ay di’n od’oipoy ko?” ²⁹ Yoŋ y’an di ruute, y’ede: “Aha, kun’te ye, kono kun od’oipey iizi buŋgari geŋ, kun a t’od’oipey ti mudu pây. ³⁰ Kun oolo an d’ôhira ti mudu kaŋ soo bini onniyo k’aydu, aame geŋ n’an di roota doŋ k’aydu, ki poone an di kirba iizi buŋgari an di-kettita k’oggiyadaŋ doo miŋ, saŋ mudu an di’n t’aaha k’adda giyyayó kollo.”»

*Ono ombide ekk’ulo k’undumu sundi mutard
(Markus 4.30-32; Lik 13.18-19)*

³¹ Isa y’an rootiyo ono ombide ti doolo, y’ede: «Moziko Raa tod’ ti deeyiso aa ulo k’undumu soo sundi mutard wedusu y’a t’umbe, y’a-giira adda doomizí. ³² Wo de ulo k’undumu geŋ yoŋ neŋku a jiire ti diine k’inŋi k’inda pay. Aame yi t’ad’diya maŋ, yi d’isiyo goole i ceeriyo inda doŋ pay adda jineene geŋŋo, geŋ embi toŋ an d’appiyta boydi ekki laydayí.»

*Ono ombide a tukk’orme
(Lik 13.20-21)*

³³ Isa y’an rootiyo ono ombide sey ti doolo, y’ede: «Moziko Raa tod’ ti deeyiso aa orme erewo ti-sokiyo booloŋ, t’a-t’obe a moono baadaŋ lootiyo, wo saŋ orme geŋ moonno yi-ti t’oozige pay.»

*Ki moo me Isa yi naabiya t’ono ombide me
(Markus 4.33-34)*

³⁴ A onniyo gette, Isa a dooyisadi ere pay gette yi’ni duuye doŋ duuru t’ono ombide, wo munda

daa k'ono ombife y'an ki rootiyo ye. ³⁵ Yon y'ize injkino kono a-t'ette a ono don nebi yi ruute ti kaaga, y'ede: «Nuñ ni t'ihina bizó n'an rootita t'ono ombife, wo n'an di kizita suldi don Raa yi ti'n umbifa t'ume y'ikkima duniya†.»

Oodibe k'ita k'ono ombife a tukk'iizi bungari

³⁶ Injino man don duuru Isa yi'n iili wo y'a aahe boy. Man kane sanalliyagi an aa d'iide sirpadi an di y' tunde, an'de: «Kee k'ay t'oodibi ita k'ono ombife a tukk'iizi bungari don adda doome genno.» ³⁷ Isa y'an di'n gime onaman, y'ede: «Wede i korso buzu beehiye gen, nuuno wede an n'ehe aa ulo wede. ³⁸ Doome gen, duniya. Buzu wede beehiye gen, kane don ki Moziko Raa. Izi bungari gen, kane don ki Mohita k'oldiko. ³⁹ Adu wede i giira iizi bungari gen, tode Meeda siitandani. Onniyo k'aydu gette, onniyo ere ki dangu duniya. Wo don k'aydu gen, maaleekiyagi. ⁴⁰ Gen aakede iizi bungari duwo an t'oddipe an di zebbiyo adda k'uwo k'oggiyo gen, aasa injkino kay a onniyo ere ki dangu duniya te. ⁴¹ Nuñ wede an n'ehe aa ulo wede en, n'a t'igiba maaleekiyago an di sika t'adda diine don ki Mozikado, kane don pay i t'eliyo eeban adda k'oldiko wo don pay isiyo suldi don ulpi gen me, ⁴² wo an ti'n sebbey adda baala k'uwo t'oggiyo fala fala, ume wede ki follite molo wo k'aadumu sina. ⁴³ Wo kane don ki diine a daana Raa gen, an di rilitay aakede peedo adda Moziko ki Meegan Raa. Wede i-d'ede kuwwa k'ollige man, y'ollo koduwo!»

† **13:35** 13.35 Kun wollo adda mattup ki Soom 78.2.

Ono ombide a tukki laale wede an t'umbida

⁴⁴ «Kun ollo, Moziko Raa tod' ti deeyiso aa laale an t'umbida adda doome, wo wedusu y'iide'η y'a y'uune. Yoη wede geη laale yi di y'umbida sey, wo a un̄suwo ere i-d'ede baadaη gette y'a ingile, y'iide'η suldizí pay y'a t'iwilto, wo y'iido'η y'a t'iwila doome geηno.»

Ono ombide a tukki dogoro zooyatú oone

⁴⁵ «Kun ollo, Moziko Raa tod' ti deeyiso sey, aakede wede suuk yi dehuu dogoro majjaanawa tuwarwa kar. ⁴⁶ Aame dogoro zooyatú oone baadaη gette yi t'uune maη, y'a ingile, y'iide'η suldizí pay y'a t'iwilto, wo y'iido'η y'aa t'iwila dogoro gettiyo.»

Ono ombide a tukki lebidó

⁴⁷ «Kun ollo sey, Moziko Raa tod' ti deeyiso aa lebidó an ti sed'fiyo adda bar, ita puuni dōη tuuku toη pay, ti t'in sokiyo. ⁴⁸ Aame ôniyo maη dōη sawwiya an t'argu a zen̄ge, maη an di konso, an di beeriyo puuni dōη k'ombo k'adda k'eesayaη, wo dōη k'ombo ye ki sebbiyo mendaη. ⁴⁹ Geη a onniyo ere ki d'angu duniya toη aasa injino, maaleekiyagi an d'etta an di'n ooyey d'uwu dōη ulpi t'adda diine dōη ki diine me, ⁵⁰ kono an ti'n sebbey adda baala k'uwwo t'oggiyo d'ala d'ala, ume wede ki d'ollite môolo wo k'aad'umu sina.»

Dooyiso aware ti ere mazzini

⁵¹ Isa y'a tunde sanalliyagí, y'ede: «Ono ombide pay geη itadaη kun'ni zuune ko?» Kane an i-di'n gime onamí, an'de: «Eyye, itadaη ay ti zuune.» ⁵² Maη yoη y'an di ruute, y'ede:

«Geŋ inŋkino wede suuniyo k'oogoro tuuku toŋ yi daaniya urzi ki Moziko Raa maŋ, yoŋ geŋ yi deeyiso aa wede boy, t'adda laalayí wede y'ukume geŋ, yi d'ambu sulđi đoŋ aware wo sulđi đoŋ mazzini yi naabiya eego.»

*Doŋ Nazaret an koogire Isa
(Markus 6.1-6; Lik 4.16-24)*

⁵³ Aame Isa dooyisadí ere t'ono ombiđe gette y'a ti đinđe maŋ, tiŋ geŋ y'a t'iiziga. ⁵⁴ Wo y'a inŋgile ki Nazaret geeger ere y'a ihira. Aame y'iiney maŋ, y'a iise dooyiso đuwu adda boy wede Yawudiyagi ge dooyiso, wo kane đoŋ pay adda boy geŋ an ziida gígiraŋ. Kane an di ruute, an'đe: «Yoŋ y'uuno suuniyo k'ono ette ti too me, wo mummino yi d'isiyo sulđi k'armika kino me? ⁵⁵ Yo eŋ ulo ki wede k'âhuntu sarpaŋje đe me! Tode meedí tiŋ sundutú Mariyam đe te! Kane zembadí kuuli'ŋ sumbiyagaŋ Zak, Yusup, Simo wo Ziid đe me! ⁵⁶ Wo zembadí erayi toŋ kane an lekkiyo pay ti kine đe me! Toogo ti suuniyo k'ono kino eŋ, y'a uuno ti too me?» ⁵⁷ Kono k'inŋkino an di-tuuge k'ambu onamí me. Maŋ Isa y'an di ruute, y'ede: «Derec, nebi geŋ aame tuuku toŋ onamí an d'ollige, wo đe đoŋ a geeger ere y'a ihira ti đoŋ adda boozí đaŋŋal, onamí an k'olliga ye me.» ⁵⁸ Wo a ume geŋ sulđi k'armika Isa yi k'ize baadaŋ ye, kono kane an ki ziipe addaŋ a yode ye.

14

*Taaya k'unto ki Zaŋ Batis
(Markus 6.14-29; Lik 9.7-9; 3.19-20)*

¹ Aame geɗ yon Erod yon wede goole yi dokkiyo siido Galile, y'a illiga suma k'Isa ti moolo. ² Maɗ y'an di ruute don naabadi, y'ede: «Wede geɗ yon Zaɗ Batis! Yi bilɗo ti diine don unto, geɗ kono k'in kino i-d'ede toogo yi d'isiyo sulɗi k'armika me.»

³⁻⁴ Erod y'ilke in kino kono yi-ziida ere leemadi Pilip sundutu Erodiyas, wo Zaɗ Batis yi di ruute, y'ede: «Oogoro urzi ti k'ele ye k'a seeda erewo gette.» In kino maɗ Erod y'an di ruute a asigiryagi an ti y' ziido Zaɗ me, an ti y' gittite wo an ti y' zidde adda dangay. ⁵ Erod yi dehu Zaɗ asigiryagi an di y' t'ide, wo de y'an d'orgiso a Yawudiyagi kono kane pay an zuune adda k'addaɗ Zaɗ geɗ yon nebi. ⁶ Ozzine ti ozzine, onniyo k'ehiyo k'Erod t'aaniya maɗ, an d'isiyo tarnaape. In kino onniyo gette t'iina maɗ, uto koɗso k'Erodiyas t'a immira a daana ki don an'ni wiiko, wo a tode gette Erod addi i-d'ibi. ⁷ In kino maɗ y'a-ti nime tuddi, y'ede: «Munda wede tuuku mi dehu'ɗ mi rooto, wo ni di t'ela.» ⁸ Mettu Erodiyas ti di t'elite ono, maɗ uto koɗso ti di ruute Erod, t'ede: «Ankenno k'o ti dekki eego Zaɗ Batis, k'o di zaapi adda supira, wo k'o d'adi kenno!» ⁹ Aame geɗ mozigo y'a t'ize sommagi donon, wo de kono y'a ti nime tuddi a daana don an'ni wiiko geɗ, y'a iyye y'an di ruute a asigiryagi an di-dekko eego Zaɗ, an i t'ela. ¹⁰ In kino maɗ y'an igibe k'adda dangay an di dikko eego Zaɗ te. ¹¹ Eego an t'umbo adda supira, an i d'ele a uto koɗso wo tod' ti d'iide a mettú. ¹² Wo kane sanalliyagi Zaɗ an d'iido, nuune an t'umbe an t'ittiba. Saɗ an d'ingile

k'ume k'Isa, an iide'ŋ an i t'ïide taaya a munda wede ize.

Eliyo k'ombo a kuuli dupu paat
(Markus 6.30-44; Lik 9.10-17; Zan 6.1-15)

¹³ Aame Isa y'illiga taaya gettiyo maŋ, tiŋ geŋ yi di gili adda tooko y'a diipida bar kono y'a t'arga siidi k'adda balda. Wo kane doŋ duuru geŋ umayí an di y'illiga, an t'udfido t'adda geegiryagi doŋ go-goppon geŋ me, wo an di y' diine ti zoŋdaŋ. ¹⁴ Isa yi ti dũige ti tooko maŋ, yi woliyo doŋ duuru baadaŋ, wo i di t'ize sommagi a duwo geŋ me, y'an d'iise eliyo beeko a doŋ k'eeni a diinayaŋ.

¹⁵ A peedo ti t'aahe k'ooriyo maŋ, sanalliyagi k'Isa an a d'iide sirpadi wo an i di ruute, an'de: «K'ollo, ume eŋ balda wo peedo toŋ t'ingile, inokino maŋ duwo pay eŋ k'an eezo an t'ette k'adda k'illiyagi an d'owiltey munda k'ombo.» ¹⁶ Wo Isa y'an di ruute, y'ede: «I k'ise ye an d'eŋgile me, ombó an eelo kune batum.» ¹⁷ Maŋ kane an di ruute, an'de: «A enno kaye ay d'ede miŋ mappa paat wo puuni sire daŋŋal.» ¹⁸ Yo Isa y'an di ruute, y'ede: «Kane geŋ, kun o d'edi kenno.» ¹⁹ Maŋ y'an di ruute a doŋ duuru an di-koone adda soole, saŋ y'a-ziki mappa paat ti puuni sire geŋno, y'a t'umbe edayí k'awwa ki kandaane, y'a ruute koduwo a Raa. Maŋ mappa y'a burkite, y'an d'ele a sanalliyagi wo kane an an di dikkida a doŋ duuru geŋno. ²⁰ Kane pay geŋ an d'iimi wo an d'isse. Wo ombó ere uupite sanalliyagi an ti-tusse, a ûune dappa koomat

makumu sire. ²¹ Kane dɔŋ iimi geŋ, an t'îde kuuli suma dupu paat, daa kaza k'erayi wo inŋi.

Sooru k'Isa ti Piyer ekk'ahu
(*Markus 6.45-52; Zan 6.16-21*)

²² Saŋ maŋ kesiko Isa y'an di ruute a sanalliyagi, an di-kili adda tooko kono an d'oogume, an di doopida ti dar bar ti nee, koore yoŋ dɔŋ duuru yi-ti'n t'igiba geŋ me. ²³ Aame dɔŋ duuru yi ti'n igibe maŋ, yoŋ y'a-ti gili ekki kesse kono y'a tonde Raa siidí. Wo siidí y'a tunde Raa a ume geŋŋo, bini ume a-t'ize didɔfo. ²⁴ Aame geŋ tooko tod'te dokki botto ti zenje me. Wo maaye a giggiran, inŋino ahu i-kolzite baadan i d'obe dubusuk dubusuk ekki tooko. ²⁵ A didɔfo biza soohe maŋ Isa yi-t'udɔfo, yi sooru t'ekk'ahu yi d'ettiyo tukki sanalliyagi. ²⁶ Aame kane an yi wulle yi sooru t'ekk'ahu maŋ, orgiso t'anni ziida baadan wo an di ruute, an'de: «Eŋ beyye!» Wo a orgisadan gette an d'iise d'ollite. ²⁷ Kesiko Isa y'an di ruute, y'ede: «Kun ombon! Kun orgide ye, eŋ nuuno!» ²⁸ Maŋ Piyer y'a t'ihina bizí yi di ruute, y'ede: «Galmee'ki nuŋ, eŋ ki kotto kee maŋ, k'o eli urzi n'a ozire t'ekk'ahu, n'a ette k'ume kee.» ²⁹ Isa y'a ruute, y'ede: «Ki t'edi!»

Maŋ Piyer t'adda tooko yi-ti d'iige, y'a iise sooru t'ekk'ahu, yi d'ettiyo tukk'Isa. ³⁰ Wo aame y'uwwe maaye yi t'uke baadan maŋ, orgiso t'a yi ziida, y'a iise sooyiso k'adda k'ahu wo yi d'ollite, yi d'eesiyo: «Galmee'ki nuŋ, ki n'utti, ki n'utti!» ³¹ A kaamiki Isa y'a igibe beezí, y'a yi ziida Piyer me, wo yi di ruute, y'ede: «Kee zaapu k'addá a nuuno baata, ki moo me ki niiku

me?» ³² Wo aame kane sirwan an ti gili adda tooko man, maaye y'a ziifa. ³³ Injino man kane pay adda tooko gen an di dikke a daana k'Isa, wo an i di ruute, an'de: «Ki kotto kee'η Ulo Raa!»

*Eliyo beeko a don k'eeni a siido Zenezaret
(Markus 6.53-56)*

³⁴ An ti diipida bar man, an d'iiney a siido Zenezaret. ³⁵ Kane don siido gette Isa an di y' zuune, man rabiladi an ti-tiipe adda siido pay, wo don k'eeni pay an i di ziko. ³⁶ Kane duwo gen, an i d'obe bey kono don k'eeni an a-botte a bize kallayi danjal ton man, wo kane don pay a bottiyo gen an d'uttiyo.

15

*Dooyiso ere ki mongidagi
(Markus 7.1-13)*

¹ San man don miibi ti diine Pariziyen ti don suuniyo k'oogoro iido ti Zeruzalem, an d'iide k'ume k'Isa wo an di y' tunde, an'de: ² «Ki moo me sanalliyaga an a-ti doopide a dooyiso ere ki mongidagin an duuye te? K'ollo, ki poone an t'eesa ombo gen, beydan an k'opilso ye aa mongidagin an ruute me.» ³ Isa y'an di'n gime onaman, y'ede: «Wo kune'η, ki moo me kun a-ti doopide a urzi k'oogoro ere ki Raa, wo kun di sooru a urzi dooyisagun me? ⁴ Derec, Raa yi ruute ti kaaga, y'ede: “Ki elo suma a meega ti meeda*.” Wo son y'ede: “Wede yi duudiyoy

* 15:4 15.4 Kun wollo adda mattup ki Egzod 20.12.

meegí ise meedí koo maŋ, yoŋ geŋ ki tówwo†.”
⁵ Wo de kune’ŋ, kun dooyiso d’uwo, kun’de:
 “Wede tuuku yi rootiyo a meegí ise a meedí,
 y’ede: Munda wede n’a-di t’ele a gi di nooge,
 yoŋ ni ele sedeke a Raa. ⁶ Maŋ yode geŋ yi ki
 t’ize ye munda wede i-t’ele suma a meegí me.”
 Kun isiyo in’kino geŋ, kun ti tówwo ono d’oŋ Raa
 yi ruute kun d’ise me, wo kun di sooru a urzi
 dooyisaguŋ. ⁷ Kune d’oŋ biziguŋ sire sire,
 nebi Ezayi yi ruute ono d’oŋ Raa y’igibo a tukki kune
 geŋ d’erec, aame yi ruute ti kaaga, y’ede:
⁸ “Duwo eŋ an o eliyo suma t’ono bizaŋ,
 wo de ki kotto adda k’addaŋ kane dokki ti nuŋ
 Raa me.
⁹ Kane sulfi d’oŋ an isiyo kono an o ottilso geŋ ki
 bita,
 kono urziyagi k’oogoro d’oŋ an dooyiso geŋ ettiyo
 t’urzi d’uwo d’añjal‡.”»

*Sulfi d’oŋ a ki ti k’ise ganigi a d’aana Raa
 (Markus 7.14-23)*

¹⁰ Saŋ Isa y’a wiike d’oŋ duuru an t’iide k’ume
 yode, wo y’an di ruute, y’ede: «Kun ollo, wo
 ono eŋ itadaŋ kun di’n suuno: ¹¹ Sulfi d’oŋ pay
 wedusu y’oomi geŋ, i ki y’ise ganigi ye a d’aana
 Raa me, ki too maŋ i y’ise ganigi a d’aana Raa
 munda wede ad’fiya ti bizi geŋno.» ¹² In’kino
 maŋ kane sanalliyagi an a d’iide sirpa k’Isa
 wo an i di ruute, an’de: «Kee ki suune d’ey
 ko, kane Pariziyen a onamá d’oŋ an illiga geŋ,
 kane i’n uuŋe me?» ¹³ Y’an di’n gime onamaŋ,

† 15:4 15.4 Kun wollo adda mattup ki Egzod 21.17. ‡ 15:9 15.9
 Kun wollo adda mattup ki Ezayi 29.13.

y'ede: «Kane Pariziyen gen aakede inda don Meegó Raa a kandaane yi k'iite ye, wo kane pay gen y'an odɔɔpa. ¹⁴ Kane gen kun oolo, kane aakede konzayi, an dokkiyo konzayi eebaŋ! Wo de aame wede koosiyo y'arkudu koosiyo bakadi man, sirwan pay an di silditi adda k'olde.» ¹⁵ Man Piyer y'a t'ihina bizi wo yi di ruute, y'ede: «K'ay t'oofibi ita a ono ombide en me.» ¹⁶ Isa y'a ruute, y'ede: «Ki kotto, kune ton onamo eggun ti k'aane ti ki'n seeda ye pi me! ¹⁷ Kun ki suune ye ko, suldi don pay wedusu y'oomi gen i-ti deegu adda k'addi, wo san yi-ti'n naamiya me? ¹⁸ Wo ono don adɔɔya ti bize gen ettiyo ti biza k'ulbe, wo kane genno i-ti y'isiyo wede'ŋ ganigi a daana Raa me. ¹⁹ Derec, ti biza k'ulbe genno ettiyo elkiso ere oldo i-ti y'eliyo wede'ŋ a suldi don ulpi aakede: tōwwo duwo mirsi, moone t'ere bakadi ise ti kule bakatú, boliyo, oogire, rootiyo k'ono butte a tukki bakada a daana booro, wo kaldita tudde. ²⁰ Kane suldi genno don i-ti y'isiyo wede'ŋ ganigi a daana Raa me! Wo de urzi k'ombo daa k'opilso bey aa mongidagi an ruute gen, wede'ŋ i ki y'ise ganigi ye a daana Raa me.»

*Zaapu k'adde k'erewo Yawudowo ye
(Markus 7.24-30)*

²¹ San man tin gen Isa y'a t'iiziga, y'a ingile ki siido ere i duule geeger Tir kane ti Sidon. ²² Wo aame gen i d'ede erewo tod'te ti siido Kanahan ti lekkiyo adda siido gettiyo, t'a iido tukk'Isa t'a iise dollite, t'ede: «Galmeega, kee Wede ti biza bumbu Dawut, k'iso adde koduwo! Uto nun i-d'ede siitan a ettú wo ti dabirsa baadan.» ²³ Wo

yoŋ onamtú yi-ki'n gime ye. Kane sanalliyagí an a d'iide sirpadí wo an di y' tunde, an'de: «Erewo gette ki ti-kama, kono t'inni daaniya ti d'ollite wo ti k'annugu ye.» ²⁴ Isa y'an di'n gime onamaŋ, y'ede: «Nuŋ Raa yi n'igibo ki tukki doŋ k'Izirayel daŋŋal, kane aa dambami doŋ i digge.»

²⁵ Wo erewo gette t'iide'ŋ, t'a dikke a d'aanadí wo ti di ruute, t'ede: «Galmeega, k'edi k'a ni noogi!» ²⁶ Yoŋ yi di'n gime onamtú, y'ede: «Beehiye ye k'a t'ambe ombó k'inŋi, k'an di t'ele a gahiti me.» ²⁷ Maŋ tod' ti di ruute, t'ede: «Galmeega onamá geŋ derec, wo ki kotto kane gahiti geŋŋo toŋ ombó ere i soldite ti bey galmaawaŋ aame an ombó geŋ, an di pettiyo.» ²⁸ Inŋino maŋ Isa yi di'n gime onamtú, y'ede: «Erewo no, koŋ zaapu k'addí a nuuno baadaŋ geŋ, Raa yi elo munda wede addí i dehu.» Wo a kaamiki ututú t'a uune bee.

*Eliyo beeko a doŋ k'eeni baadaŋ
(Markus 7.31)*

²⁹ Saŋ maŋ t'ume geŋ, Isa y'a t'iiziga wo y'a inŋile ki biza bar ki Galile. Y'a-ti gili ekki kesse wo y'a-guune. ³⁰ Doŋ duuru baadaŋ an d'ettiyo ki tuddí, an di ziko ti kane doŋ jekese, doŋ koŋzayi, doŋ kesiyagaŋ soo soo, doŋ bizaŋ a t'ippe an k'orbe ye, wo doŋ k'eeni baadaŋ ti doolo toŋ ede. Kane geŋ, doŋ duuru an ti'n zippe a d'aana k'Isa wo yoŋ y'an d'ele beeko. ³¹ Kane duwo geŋ an ziida giggiraŋ aame an wulle doŋ bizaŋ a t'ippe an orbe, doŋ kesiyagaŋ soo soo an t'ikkima, doŋ jekese an di sooru beehiye, wo doŋ

konzayi an di wollyo. Wo kane pay geŋ an d'iise tamma Raa wede ki dɔŋ k'Izirayel.

Eliyo k'ombo a kuuli dupu pide
(Markus 8.1-10; Matiye 14.13-21)

³² Isa y'a wiike sanalliyagi wo y'an di ruute, y'ede: «Nuŋ dɔwo eŋ o t'ize sommagi kono kun wollo an lekkiyo ti nuŋ iide onniyo ado, wo aŋkenŋo munda k'ombo an k'ede ye. Ni ki dehu n'an ki ti'n t'igibe addaŋ guguba ye, para maŋ an d'oopey a urzi.» ³³ Kane sanalliyagi an di tunde, an'de: «De adda balda ette, ti too me in t'ona mappa baadaŋ a dɔŋ duuru kino eŋ an d'ooma an t'assa me?» ³⁴ Maŋ Isa y'an di'n tunde, y'ede: «Kune un d'ede mappa miibi me?» Wo kane an i di ruute, an'de: «Ay d'ede mappa sarat, ti puuni sunni miibi.» ³⁵ In'kino y'an di ruute a dɔŋ duuru geŋ, y'ede: «Kun ti koona siido!» ³⁶ Maŋ y'a ziki mappa sarat ti puuni geŋ a beezí, y'a ruute koduwo a Raa, y'a burkite wo y'an d'ele a sanalliyagi an an di-dikkida a dɔŋ duuru geŋŋo. ³⁷ Wede tuuku toŋ y'a iimi y'a isse isse a d'uupite, wo ombo ere uupite gette, an ti tussite a ûune dambayi deero sarat. ³⁸ Kane dɔŋ iimi geŋ kuuli dupu pide, daa kaza k'erayi t'inŋi. ³⁹ Aame dɔŋ duuru Isa yi ti'n igibe maŋ, yoŋ yi-ti gili adda tooko, wo y'a ingile ki siido Magadaŋ.

16

Tondiyo ki munda k'armika
(Markus 8.11-13; Matiye 12.38-39; Lik
11.16,29; 12.54-56)

1 Doŋ miibi ti diine kane Pariziyen ti Saduseyen geŋ, an a d'iide sirpa k'Isa kono an dehu an i d'ekke ikka t'urzi k'onamí. Injino maŋ an di y' tunde y'an d'ise munda k'armika wede a kize yon Raa yi y'igibo. ² Wo Isa y'an di'n gime onamaŋ, y'ede: «Aame peedo t'a t'ooriyo wo kandaane i t'isiyo teeze maŋ, kun d'eesiyo: “Ume y'isa tasse beehiye.” ³ Wo ti soohe walak kun d'eesiyo: “Aŋki mizzi yi koppa, kono kandaane teezikadí ki zimolo*.” Injino maŋ kun d'aaniya kun di suuniyo ita suldí doŋ kun wolliyiyo t'edaguŋ isiyo a kandaane, wo de ki moo me kun ki d'aaniya kun gi di y' suuniyo ye munda wede i-kaza ita suldí doŋ Raa y'isiyo ankenno en me! ⁴ Ita duwo doŋ ankenno en, kane doŋ ulpi wo an ki seedu urzi Raa ye, an tonديو munda k'armika a kize nuŋ Raa yi n'igibo. Wo armika ti doolo Raa y'an k'isa ye, daa ki armika ere Raa y'ize ti kaaga a nebi Zonas ye maŋ.» Injino kane geŋ Isa yi'n iili, y'a ingile.

Tookiyo kuude a urzi dooyiso ki Pariziyen ti Saduseyen

(Markus 8.14-21; Lik 12.1-6)

⁵ Kane sanalliyagi an doopide ti kese bar Galile ti nee geŋ, an dundo an d'ambo mappa me. ⁶ Aame geŋ Isa y'an di ruute, y'ede: «Kun koono mentikagi a orme wede ki Pariziyen ti

* **16:3** 16.3 Di kane Yawudiyagi aame an wolliyiyo peedo t'a t'ooriyo wo kandaane i t'isiyo teeze maŋ, an d'eesiyo ume y'isa tasse beehiye. Wo ti soohe walak aame an wolliyiyo kandaane teezikadí ki zimolo maŋ, an d'eesiyo anki mizzi yi koppa, geŋ a di kine injino ye.

Saduseyeŋ me.» ⁷ Kane sanalliyagi an d'iise rootiyo ti tuddaŋ, an'de: «Yi rootiyo inƙino kono in k'umbo mappa ye.» ⁸ Wo yo Isa rootiyadaŋ gette y'a ti zuune, inƙino maŋ y'anni tunde, y'ede: «Ki moo me kun di rootiyo ti tuddugaŋ, kun k'umbo mappa ye me? Ki kotto kune zaapu k'addugaŋ a Raa baata! ⁹ Ki kotto kune suldi d'ofaŋ ize geŋ, itadaŋ kun ki ti zuune ye botto! Kune un dunde baa a mappa paat wede an an di-dikkida a kuuli dupu paat, wo a onniyo gette oopiyo ki mappa dambayi miibi kun zikiti me? ¹⁰ Wo kune un dunde baa a mappa sarat wede an an di-dikkida a kuuli dupu pife, wo a onniyo gette oopiyo ki mappa dambayi deero miibi kun zikiti me? ¹¹ De mummino kune'ŋ ita k'onamó kun gi di'n suuniyo ye me? Aame n'un ruute, n'ede: "Kun koono mentikagi ti orme wede ki Pariziyen ti Saduseyeŋ" geŋ, n'un rootiyo ti mappa ye.»

¹² Inƙino maŋ kane sanalliyagi ita k'onamí an di'n zuune, yoŋ y'an ki rootiyo an di koone mentikagi ti orme wede an ki d'oodfibe mappa ye, kaciŋ y'an rootiyo ti dooyiso ere ki Pariziyen ti Saduseyeŋ.

Isa miŋ yoŋ wee wee?

(Markus 8.27-30; Lik 9.18-21)

¹³ Isa y'ingile ki geeger Sezare siido Pilip, aame y'iiney maŋ sanalliyagí y'anni tunde, y'ede: «A tukki nuŋ wede an n'ehe aa ulo wede eŋ, duwo an rootiyo nuŋ wee wee?» ¹⁴ Kane an i di'n gime onamí, an'de: «Doŋ soŋ an'de kee Zaŋ Batis, d'ofaŋ ongo an'de kee nebi Eli, wo d'ofaŋ ongo soŋ an'de kee nebi Zeremi koo ise nebi ti diine

nebiyagi dɔŋ ti kaaga koo maŋ.» ¹⁵ Wo yoŋ y'an di ruute, y'ede: «De kune me, kun'de nuŋ wee wee?» ¹⁶ Simo wede an yi waaku sundí soo te Piyer yi di'n gime onamí, y'ede: «Kee Almasi Raa yi biire, wo Ulo Raa zeere.» ¹⁷ Injino maŋ Isa yi di ruute, y'ede: «Simo ulo Zonas, uŋsuwo a kee kono dɛrec gette a-t'iidiba ita'ŋ wede tudde ye, a iidiba ita Meegó Raa a kandaane. ¹⁸ Wo aŋkeŋ n'a di rooto kereŋ, kee sundá Piyer, suma i-kaza “mokkolo”, wo geŋ ekki mokkolo gettiyo n'a ti'n kooná kane dɔŋ ogiyo ti sundó me, kono an t'ise aakede boyo wede nuŋ n'oozige. A kane dɔŋ ogiyo geŋ, ume ki dɔŋ i t'inda batum i-k'ede toogo y'a ki'n ceera ye. ¹⁹ N'a di t'ela kerle wede ki Moziko Raa a beezá: Munda wede tuuku a siido k'a ti gitta maŋ, a kandaane Raa y'a di ketey, wo munda wede tuuku a siido ki t'iiza maŋ, a kandaane Raa y'a t'eezey.» ²⁰ Maŋ Isa a sanalliyagi y'an d'undirde kono a wenda soo ton an i roota ye, yoŋ Almasi Raa yi biire me.

*Rootiyo k'Isa a urzi k'untadí ti baldiyadí
(Markus 8.31-33; Lik 9.22)*

²¹ Tin geŋ Isa y'an d'iise rootiyo kereŋ a sanalliyagi, y'ede: «I dehu nuŋ n'a t'ette ki Zeruzalem, wo a ummey geŋ kane dɔŋ i dokkiyo dɔŋziŋ, deero dɔŋ sedeke ti dɔŋ suuniyo k'oogoro, an t'eley urzi a dɔwo an di n' seedey, an di n' dabirey baadan, an a di n' t'idey. Wo onniyo sire k'aduwe maŋ Raa y'a ti n' baldiy.» ²² Maŋ Piyer y'a y'irga siidí, y'a y'iise aapudu, y'ede: «Aha Galmeega, kee Raa yi ki booho! Munda geŋ a aana ye!» ²³ Wo de yo Isa y'a-gime ki tukki Piyer

wo yi di ruute, y'ede: «Kee Meeda siitandfani t'a-t'ûune adda k'addá, ki lefdo dokki ti tuddó me! Kee a nuŋ morkolo morkiye a munda wede n'aase me kono elkisadá ti ere ki Raa soo ye, elkisadá ki doŋ tudde.»

Urzi daaniya k'Isa

(Markus 8.34-9.1; Lik 9.23-27)

²⁴ Saŋ Isa y'an di ruute a sanalliyagí, y'ede: «Wede yi dehu y'a daane urzi nuuno maŋ, tuddí batum y'a ti kiigira, ki unto toŋ y'a oyye y'a t'inda kono nuuno, wo y'a ni daane. ²⁵ Injino wede tuuku yi dehu boohiyo tuddí k'aggadí maŋ, y'a ti dagga, wo de wede tuuku y'ooliyo tuddí kono nuuno maŋ, y'a t'utta. ²⁶ A wede koduwatú moo me suldí duniya pay y'anni t'oone, wo tuddí y'a ti dagge me? Wo ki kotto wede geŋ tuddí zooyatú ooŋe, geŋ yi k'aane y'a ki t'ele munda y'a ki pelke tuddí ye! ²⁷ Derec, nuŋ wede an n'ehe aa ulo wede eŋ, n'aa kimo ti maaleekiyagó adda daryika ere ki Meegó Raa, wo aame geŋ wede tuuku toŋ y'a t'oona munda wede ni dehu ni-t'ela a naabadí ere y'ize gette. ²⁸ Derec injino wo n'un di rooto: Doŋ ongoŋ ti diine kane doŋ ankenno eŋ an ki ti t'inda ki poone pay ye, an di n' wolla nuŋ wede an n'ehe aa ulo wede eŋ, n'etto adda mozikadó me.»

17

Ume k'eda k'Isa a-gime

(Markus 9.2-9; Lik 9.28-36)

¹ Îide onniyo zoot k'ita maŋ, Isa y'a-wiike ti yode Piyer, Zak wo leemadí Zaŋ, y'an d'an

d'ingile siidanɗ k'ekki morkkolo sohero. ² An iiney maɗ, a dfaanadanɗ geɗ miɗ tuddi a-gime sittu, inɗkino ume k'edayi a iise ralita aa peedo wo kallagi a t'ize tuwardi kar aa toore. ³ A kaamiki, kane sanalliyagi ado geɗ an wolleiyo bibiraw Muusa ti nebi Eli* an rootiyo t'Isa. ⁴ Inɗkino maɗ Piyer y'a t'ihina bizi, yi di ruute Isa, y'ede: «Galmee'ki nuɗ, beehiye'ɗ kine in di lekke a enno! Ki dehu maɗ, a eɗ n'un d'okkima daabagi ado, a kee soo, a Muusa soo, wo a Eli soo.» ⁵ Aame onami y'a ki ti'n denge ye botto geɗ, i d'iido dondirso ti-tooriyo ti di'n ippe kane geɗ me. Wo t'adda dondirso gette an d'illiga golla, t'ede: «Eɗ Ulo nuuno ni y' giyye baadan, ulbo unse ti yode me. Kun y'ollo!» ⁶ Aame sanalliyagi an illiga golla gettiyo maɗ, orgiso t'anni ziida baadan an di zilditi kan ossiso. ⁷ Isa y'a d'iide sirpadan, y'an d'an buttite wo y'an di ruute, y'ede: «Kun t'oozon, kun orgide ye!» ⁸ Maɗ kane an d'umbe edayan, wo an wolleiyo Isa siidi, wenda ti doolo umbo. ⁹ A deeguzan t'ekki morkkolo, Isa y'an di ruute, y'ede: «Kun ollo, a munda wede iido kun wulle geɗ, a wenda soo ton kun rootey ye, bini baldiya ki nuɗ wede an n'ehe aa ulo wede eɗ ti diine don unto.» ¹⁰ Maɗ kane sanalliyagi an di y' tunde, an'de: «Ki moo me don suuniyo k'oogoro an di rootiyo, an'de: "Ki poone i kimo Eli doo miɗ, san Almasi Raa yi biire kollo" me?» ¹¹ Isa y'an di'n gime onaman, y'ede: «Derec, Eli geɗ y'a etto, wo suldi

* **17:3** 17.3 Muusa ti Eli geɗ kane nebiyagi, an likke ti kaaga, ki poone Isa y'a aana duniya.

pay y'an okkima a urzizaŋ. ¹² Wo kun ollo, n'un di rooto, Eli geŋ yon yi t'iido baa, d'fuwo an gi di y' zuune ye, yon wede a etto me, wo an i-d'ize ulsu aa addaŋ i dehu. Geŋ inŋkino kay nuŋ wede an n'ehe aa ulo wede eŋŋo toŋ, an di n' dabira.» ¹³ Inŋkino maŋ kane sanalliyagi an di zuune, yon y'an rootiyo a tukki Zaŋ Batis, a tukk'Eli ye.

Eliyo beeko a ulo i-d'ede siitan a eedi
(Markus 9.14-29; Lik 9.37-43)

¹⁴ Isa ti sanalliyagi aɔo an iiney a ume doŋ duuru maŋ, a ume geŋ i d'ede wede y'a d'iide sirpa k'Isa, y'a-dikke a daanadi ¹⁵ wo yi di ruute, y'ede: «Galmee'ki nuŋ, k'iso adde koɔwo a ulo nuŋ, yon i-d'ede amputput, yi dabirsa baadaŋ, onniyo ti y'ambu maŋ, ti-ti y' sedɔiyo adda k'uwo ise adda k'ahu toŋ maŋ. ¹⁶ N'an di y'umbo a sanalliyagá, wo de kane an k'iine an i k'ele beeko ye.» ¹⁷ Maŋ Isa y'a t'ihina bizi, y'a ruute, y'ede: «Kune doŋ ulpi wo kun ki ziipe addugun a Raa ye. Nuŋ ti kaagine ni lekkiyo ti kune, wo de a nuŋ kun ki d'umbe ye! Geŋ n'a ombiŋa ki daayum koo ti kune me? Ulo kun o d'edi keŋŋo.» ¹⁸ Isa y'a t'idɔise siitan gette, maŋ tod' t'a t'udɔe ti tukk'ulo me. Wo a kaamiki yon y'a uune bee. ¹⁹ Inŋkino maŋ sanalliyagi an a d'iide sirpa k'Isa wo an di y' tunde siidaŋ, an'de: «Wo de ki moo me siitan gette kaye ay ki d'iine lommatú ye me?» ²⁰ Yon y'an di ruute, y'ede: «Kun k'iine lommatú ye kono kune'ŋ zaapu k'addugun a Raa baata. Derec inŋkino wo n'un di rooto: Ise zaapu k'addugun a Raa gette t'aase neŋko aa ulo k'undumu sundi mutard toŋ

maɲ, kun aane kun i di roote a tokomo ette, kun t'eese: "T'umayí eɲ mi-d'eeto k'ummey", toɲ maɲ tod' t'a-d'eete. Munda wede kun k'aane ye umbo. ²¹ Wo geɲ ita siitan ere kino ette, adɗiyatú t'urzi tondiyo Raa wo ti lekkiyo ere onniyo muno daa k'ombo ɗaɲɲal.»

Rootiyo k'Isa ere ki sirwe a urzi k'untadí ti baldiyadí

(Markus 9.30-32; Lik 9.43-45)

²² Onniyo soo kane sanalliyagi an t'ugiyi pay a siido Galile, maɲ Isa y'an di ruute, y'ede: «Nuɲ wede an n'ehe aa ulo wede eɲ, an di n' t'eley a bey ɗuwo. ²³ Kane an di n' t'idey, wo onniyo sire k'aduwe maɲ Raa y'a ti n' baldey.» Inkino kane sanalliyagi an t'ize sommagi donɗoɲ.

Eliyo jibaaye ki Boy Raa

²⁴ Isa ti sanalliyagi an iiney geeger Kaper-nayim. Aame geɲ kane ɗoɲ sedɗu jibaaye ki Boy Raa† an a d'iide sirpa Piyer wo an di y' tunde, an'de: «Wede dooyisaguɲ jibaaye y'eliyo ko ki Boy Raa te?» ²⁵ Yo Piyer y'a ruute, y'ede: «Eyye, y'eliyo.» Saɲ Piyer yi-t'iide k'adda boy, wo ki poone y'a t'ihina bizi geɲ, Isa y'a ruute, y'ede: «Simo kee elkisadá moo me? Wee wee a t'ele jibaaye wo patanti a mozagi ɗoɲ a duniya ette? Doɲ siido kunuɲ, torgagi ko?» ²⁶ Piyer yi

† **17:24** 17.24 Jibaaye ki Boy Raa: Tode gette eliyo Yawudiyagi ɗoɲ kuuli wo ki daayum aame an tówwo ozzine ada sire ɗoo. Tamma ere ki t'ele ki jibaaye gette, tod'te zooyatú ki naabo k'onniyo sire ki wede. Kun wollo adda mattup ki Egzod 30.13-14.

di'n gime onamí, y'ede: «Torgagi a t'ele me‡.»
 Mañ Isa yi di ruute, y'ede: «Injino mañ d'of siido an ki t'ele ye. ²⁷ Wo minj kane d'of seddu jibaaye in ki ti'n kulkuwa ye geñ, k'odo ki biza bar, k'a seddoy tiwili k'adda k'ahu, wo puuniso ere k'ambey ki poone gette k'a t'ohinoy bittú, ki-t'ooney tamma soo§ ere a t'idey ki jibaaye, k'a t'amboy wo ti tode gette k'a eloy jibaaye ki nuuno wo ki kee.»

18

Wede goole a jiire a Moziko Raa *(Markus 9.33-37; Lik 9.46-48)*

¹ Aame geñ kane sanalliyagi an a d'iide sirpa k'Isa wo an di tunde, an'de: «Wee wee goole a jiire a Moziko Raa te?» ² Mañ Isa yi wiike ulo ñenku, y'a y'ihira a diinayan, ³ wo y'a ruute, y'ede: «Derec injino wo n'un di rooto: Aame kun ki ti gima lekkiyagun wo kun ki t'iza aa inñi sunni ye mañ, Moziko Raa kun ki t'etta ye. ⁴ Injino mañ wede yi-t'iza tuddi ñenku aa ulo enno mañ, yode geño goole a jiire a Moziko Raa te. ⁵ Wede tuuku yi seedu ulo aa yode en bey sire a sundó mañ, geñ aa yi seedu nun batum.»

Sulfi d'of i-t'eliyo wedusu adda k'oldiko *(Markus 9.42-48; Lik 17.1-2)*

⁶ «Wede tuuku yi t'eliyo adda k'oldiko wede soo ti diine kane d'of tasse a urzi zaapu k'adde a nuuno mañ, a wede injino geñ, dabar ere

‡ **17:26** 17.26 A ozzinagi geñ, eliyó jibaaye ti patanti torgagi, d'of siido ye. § **17:27** 17.27 Tamma soo: I-tôwwo eliyó jibaaye ki d'of sire.

an i di kette assa meeda a golladí an ti y' sedfde adda moyta bar gette, soodo sey ti ere yi t'ooney a dfaana Raa te. ⁷ Dabar a dfoŋ duniya, kono i d'ede suldfi baadaŋ an t'eliyo dfuwo adda k'oldfiko. Derec, kane suldfi daayum ede dfoŋ i t'eliyo dfuwo adda k'oldfiko me, wo dfe dabar a yode wede i t'eliyo bakadí adda k'oldfiko. ⁸ Aame beezá ise zindá koo a-da t'ettiyo k'adda k'oldfiko maŋ, k'a-dfekko k'a sedfdo dokki ti kee. Beehiye i jiire a kee zindá soo ise beezá soo wo k'a t'ooney lekkiyo ere ki daayum, bee miŋ k'a lekke beydŋ sirwaŋ ise zoŋdŋ sirwaŋ wo an ki ti sedfdey adda k'uwwwo ere t'oggiyo ki daayum. ⁹ Wo aame ersadá t'a-da t'ettiyo k'adda k'oldfiko maŋ, k'a t'oodo k'a sedfdo dokki ti kee me. Beehiye i jiire a kee t'ersadá soo wo k'a t'ooney lekkiyo ere ki daayum, bee miŋ k'a lekke edayá sire wo an ki ti sedfdey adda k'uwwwo ere ki dabar.»

*Ono ombife a tukki damsa i digge
(Lik 15.1-7)*

¹⁰ «Kun koonaa mentikagi, wenda yi kiigira wede soo ye ti diine kane dfoŋ tasse a urzi zaapu k'adde a Raa me. Kun ollo, n'un di rooto, kane geŋ maaleekiyagaŋ an lekkiyo jep a dfaana Meegó Raa a kandaane me. [¹¹ Derec, nuŋ wede an n'ehe aa ulo wede eŋ, n'iido'ŋ n'an t'ele uttiyo a dfoŋ i digge adda k'oldfikadaŋ.]

¹² Kun ollo taaya ettiyo wo kun d'elkito eego. Aakede wede'ŋ i-d'ede dambami meeda wo ere soo ti diinayaŋ t'a digge. Inkiyo wede geŋ y'aase mummino me? Ki kotto dfoŋ ada gessat makumu gessat geŋ yi d'ooli a ita tokomo, y'a t'ette dehutu

ki ere i digge. ¹³ Derec in̄kino wo n'un di rooto: Aame wede geŋ yi t'uuno maŋ, uŋsuwadí ere a tukki damsa gette t'aase baadaŋ a ceere ki dŋŋ ada gessat makumu gessat i ki digge ye geŋŋo. ¹⁴ Geŋ in̄kino Meegugaŋ Raa a kandaane yi dehu wenda soo toŋ i ki dagge ye ti diine kane dŋŋ tasse a urzi zaapu k'adde a yode me.»

Aapuɗu tudde

¹⁵ «Aame leemadá wede i ziipe addí a Raa geŋ yi t'ize oldíko ti kee maŋ, k'odo ki y'oonoy wo ki rootoy munda geŋ siggaŋ. Aame yi-k'illigey maŋ, leemadá ki ti y' gimo k'urzi wede beehiye. ¹⁶ Aame yi ki k'illigey ye maŋ, k'a waako wede soo ise dŋŋ sire toŋ maŋ, kun di y'oonoy sey, kono suldí pay geŋ kun ti'n t'íde a d̄aana dŋŋ sire t'adó i wulle wo illiga d̄oo*. ¹⁷ Aame kane geŋ y'an ki'n illigey ye maŋ, k'an t'òodo taaya a dŋŋ ogiyo ti sundó. Wo ki d̄angu, aame kane geŋ yi ki'n illigey ye sey maŋ, ki y' wollo yoŋ geŋ aakede wede i ki suune Raa soo d̄aŋŋal ye, wo aakede wede seɗɗu jibaaye.

¹⁸ Derec in̄kino wo n'un di rooto: Munda wede tuuku a siido kun a ti gitta maŋ, a kandaane Raa y'a di kettey, wo munda wede tuuku a siido kun t'iiza maŋ, a kandaane toŋ Raa y'a t'eezey.

¹⁹ Kun ollo, n'un di rooto sey: Aame a siido geŋ dŋŋ sire ti diinagaŋ an ti gitte onamaŋ kaŋ soo an di tonde Raa a munda tuuku toŋ maŋ, geŋ Meegó Raa a kandaane y'an di y' t'ela. ²⁰ Derec, a ume

* **18:16** 18.16 Kun wollo adda mattup ki Deeterenom 19.15.

tuuku dɔŋ sire t'ado wo a gili geŋ an t'ugiyɛ ti sundó maŋ, nuŋ a diinayaŋ.»

Ono ombiŋe a urzi tambobino
(Lik 17.4)

²¹ Inkiŋo maŋ Piyer y'a d'iide sirpa k'Isa wo y'a yi tunde, y'ede: «Galmee'ki nuŋ, aame leemadó y'o t'ize oldiko maŋ, taŋ miibi ni-d'ise tambobino me? Bini taŋ sarat ko?» ²² Isa yi di'n gime onamí, y'ede: «Aha, n'a-ki roote bini taŋ sarat ye, wo n'a di roote bini ada sarat sarat, taŋ sarat. ²³ Kun ollo, Moziko Raa tod' ti deeyiso aa naabo mozigo yi dehu y'a wolle soŋko ere dɔŋ naabadí an i di t'ele. ²⁴ Inkiŋo maŋ yi-t'iise, ki poone an i di wiiko wede i di t'ele soŋko baadaŋ baadaŋ ki k'aane ki ti kize ye. ²⁵ Wede geŋ, i-k'ede munda ye yi di t'ele soŋko ki galmeegí me. Inkiŋo maŋ galmeegí y'an di ruute a dɔŋzí, y'ede: “Wede eŋ kun ti y'owol, eddí, inñizí wo sulɔzizí pay kono a-ti t'ide a soŋkadó.” ²⁶ Maŋ wede naabo geŋ y'a iire a zoŋ galmeegí, wo yi di ruute, y'ede: “K'ambo ombiŋe a nuuno me, soŋkadá nuŋ n'a-ti kima pay.” ²⁷ Galmee'ki wede naabo geŋ i di t'ize sommagi, soŋko ere yi di t'ele yi-d'iili mentú, maŋ wede naabo y'a ingile. ²⁸ Aame wede naabo geŋ ti di mozigo yi t'udɔde maŋ, an a-t'ikkima ti wede ume naabadaŋ soo, yoŋ geŋ i-d'ede see ki soŋko miibi dɔŋŋal. Y'iide'ŋ yi di ziida golladí biŋ wo yi di ruute, y'ede: “Seezá k'o y'eli.” ²⁹ Maŋ yo wede ume naabadaŋ soo geŋ, y'a iire a zoŋɔí wo yi-d'obe bey, y'ede: “K'ambo ombiŋe ti nuuno, seezó n'a yi t'ela.” ³⁰ Wo de

yo wede geɗ y'a-tuuge, wo ulsu a jiire sey yi-ti y' zidde dangay koore seezi yi di y' t'ela geɗ me. ³¹ Aame kane donɗ ume naabadaɗ soo geɗ an wulle inkiɗo maɗ, an t'ize sommagi dondonɗ, an iide'ɗ a galmeegaɗ an i di t'iide taaya a suldi donɗ pay ize geɗ me. ³² Inkiɗo maɗ galmeega geɗ wede naabo y'a yi wiike, wo yi di ruute, y'ede: "K'o ibi bey moɗ seezá pay n'a-di y'iide miɗ, kaciɗ kee wede naabo ulsu kino too! ³³ Ki too maɗ kee k'a dehe k'aase adde koduwo a wede naabo aa kee, aakede nuɗ batum n'ize adde koduwo a kee." ³⁴ Wo galmeegi adda kulkuwadi ere baadaɗ gette y'an di y'ele a bey k'asigiryagi, an di y' dabire adda dangay koore sonkadí yi di t'ela pay geɗ me.»

³⁵ Isa y'an di ruute sey, y'ede: «Geɗ inkiɗo kay Meego Raa a kandaane y'un isa me, aame wede tuuku ti diinaguɗ yi k'iza tambobino a leemadi t'adde soo ye maɗ.»

19

Dooyiso k'Isa a urzi peeriyo (Markus 10.1-12; Lik 16.18)

¹ Aame Isa ti dooyiso duwo y'a ti dinge maɗ, ti siido Galile y'a t'iiziga y'a-diipida ti siido Ziide ere ti dar k'ooye Zurden ti nee. ² Donɗ duuru baadaɗ an di y' diine wo a ume geɗ y'an d'ele beeko a donɗ k'eeni ti diinayaɗ. ³ Donɗ miibi ti diine Pariziyen an a d'iide sirpadi kono an dehu an i d'ekke ikka t'urzi k'ono. Maɗ kane an di y' tunde, an'de: «Oogiradiɗ t'ele ko urzi ki peeriyo k'erewo, aame kule yi uune munda tuuku eddi

t'ize wo ulbí i-k'ize unse ye man?» ⁴ Isa y'an di'n gime onaman, y'ede: «Ki kotto kune kun gire ono don an riine ti kaaga adda mattup ki Raa, an'de: "T'ume k'eesiyo Raa yi ziipe suldi pay gen, y'ikkima an kule t'ere*." ⁵ Wo Raa y'a ruute sey, y'ede: "Kono kamo kule yi d'oola meegi ti meedi, y'a di ketta bin ti eddi. Wo kane sire gen an t'isa tudde soo†." ⁶ Injino man kane gen sire ye baa, an t'ize tudde soo. Gen injino munda wede Raa y'a ti gitte gen, wede tudde yi ki t'eeze ye.» ⁷ Kane Pariziyen an di y' tunde, an'de: «De ki moo me ti kaaga Muusa y'a ele urzi, aame wede yi-peere eddi man, yi di dekke mattup ki peeriyo yi di t'ele a beytu me‡?» ⁸ Isa y'an di ruute, y'ede: «Muusa y'un ele urzi ki peeriyo k'eraygun kono a eego zakidi ere un d'ede gettiyo, para man t'ume k'eesiyo injino ye. ⁹ Wo kono k'injino ton n'un di rooto: Ki peeriyo k'erewo ulu, wo wede yi peere eddi gen, aame ti moone ti kule bakatu danjal! Para man yi ti biira wo yi ziida erewo ti doolo man, Raa yi yi wolliyo yon wede i moone t'ere bakadi.»

¹⁰ Kane sanalliyagi an i di ruute, an'de: «Aame wede yi peere eddi t'urzi soo danjal genno man, gen ki ki ziida ye ton bee.» ¹¹ Isa y'an di'n gime onaman, y'ede: «Don pay an k'aane an k'ambe ye a dooyiso ette, aane ambe kane don soo Raa y'an ele urzi danjal. ¹² I d'ede urziyagi miibi don i-t'eegirso kuuli an k'aane

* **19:4** 19.4 Kun wollo adda mattup ki Zenez 1.1,27. † **19:5** 19.5 Kun wollo adda mattup ki Zenez 2.24. ‡ **19:7** 19.7 Kun wollo adda mattup ki Deeterenom 24.1.

an ki seɗɗe erayi ye me. Ki ɗoŋ oŋgo moytaŋ umbo t'ume k'ehiyadaŋ too, ɗoŋ oŋgo kokkiso t'urzi ɗuwo wo ɗoŋ soŋ kane batum an ti seɗɗu tuddaŋ aa moytaŋ umbo kono Moziko Raa. Geŋ wede y'aane suuniyo k'ita k'ono eŋŋo maŋ, yi ni suuno.»

Isa ti inŋi sunŋi

(Markus 10.13-16; Lik 18.15-17)

¹³ Saŋ maŋ ɗuwo an i di ziko inŋi sunŋi a Isa kono y'an di zaape beezí a eedaŋ wo y'a tonde Raa kono kane, miŋ kane sanalliyagi an ki dehu ye, an di'n eɗɗisito ɗuwo geŋ me. ¹⁴ Maŋ Isa y'a ruute, y'ede: «Kun oolo inŋi eŋ an d'etto ki tuddó, kun ti'n eegire ye, kono Moziko Raa tod'te ki ɗoŋ i deeyiso aa kane kino.» ¹⁵ Aame geŋ y'an di ziipe beezí a eedaŋ, maŋ t'ume geŋ y'a inŋile ki ɗaana.

Isa ti obulsu ki laale

(Markus 10.17-31; Lik 18.18-30; 13.30)

¹⁶ Saŋ i d'ede wede soo y'a d'iide sirpa k'Isa wo y'a yi tunde, y'ede: «Wede dooyisadey, munda wede beehiye n'aase moo me kono n'a t'oono lekkiyo ere ki daayum te?» ¹⁷ Isa yi di ruute, y'ede: «Ki moo me ki di n' ton-diyo a munda wede beehiye me? Beehiye Raa soo ɗaŋŋal. Aame ki dehu k'a t'oono lekkiyo ere ki daayum maŋ, ki sooɗo urziyagi k'oogoro Raa.» ¹⁸ Wede geŋ yi di ruute, y'ede: «Kane miŋ ɗoŋ tuuku me?» Isa yi di'n gime onamí, y'ede: «Kane eŋŋo: Ki tówwo wedusu mirsi ulu, ki moone t'ere bakadá ise ti kule bakatú ulu, k'oogire ulu, ki rootiyo k'ono butte a tukki bakadá a ɗaana

booro ulu, ¹⁹ ki elo suma a meegá ti meedá, wo ki d̄an̄gu ki geyyo bakadá aa ki geyyiso tuddá batum§.» ²⁰ Obulsu yi di ruute, y'ede: «Kane geŋ pay ni'ni seedu, wo o biite moo sey me?» ²¹ Isa yi di ruute, y'ede: «Aame ki dehu k'a-t'ette a munda wede aa Raa yi dehu maŋ, k'odo, suldī d̄oŋ a-d'ede'ŋ ki t'owiltoy pay wo soŋko k'an d'eloy a d̄oŋ an k'ede munda ye, in̄kino k'a t'ooney laale wede ki kotto a kandaane. Saŋ k'a t'edi wo k'a ni daana.» ²² Aame obulsu geŋ y'illiga ono geŋno maŋ, y'a t'ize sommagi dondoŋ kono yoŋ maaladí baadaŋ, saŋ y'a in̄gile.

²³ Maŋ Isa y'an di ruute sanalliyagí, y'ede: «Derec in̄kino wo n'un di rooto: Ooŋe baadaŋ a wede laale yi t'ettey adda Moziko Raa te. ²⁴ Kun ollo, n'un di rooto sey: Ooŋe a ziŋzo ti-t'adde ti buldo rippile me, wo geŋ ooŋe baadaŋ a ceere sey a wede laale yi-t'ettey a Moziko Raa te.» ²⁵ Aame kane sanalliyagi an illiga ono geŋno maŋ, an di ziida giggiraŋ wo an di ruute, an'de: «In̄kino maŋ, geŋ a utta wee wee?» ²⁶ Isa yi di'n wolliyo yerere adda k'edayaŋ wo y'an di ruute, y'ede: «Munda eŋ d̄uwo an k'aane ye, wo de a Raa suldī pay i-k'ooŋe ye, y'aane.»

²⁷ In̄kino maŋ Piyer y'a t'ihina bizí wo yi di ruute, y'ede: «An̄keŋ k'ollo, kaye'ŋ suldizey pay ay d'iilo wo ay di daaniya kee. De geŋ ki kaye aasa mummino me?» ²⁸ Isa y'an di ruute, y'ede: «Derec in̄kino wo n'un di rooto:

§ 19:19 19.19 Kun wollo adda mattup ki Egzod 20.12-16; Deeterenom 5.16-20 wo Lebitik 19.18.

A onniyo ere sulɗi pay i t'isa awirdfi geɗ, nun wede an n'ehe aa ulo wede eɗ n'a di kooney a kaakido moziko adda daryikadó. Wo aame geɗ kune ɗoɗ kun ni daaniya, kune toɗ kun di konditey ekki kaakidagi koomat makumu sire ɗoɗ ki moziko, kun ɗekkey booro a tukki boha bumbiyagi koomat makumu sire ki ɗoɗ k'Izirayel. ²⁹ Wo wede tuuku yi iila boyɗizi, ise zembadi kuuli erayi, meegi ti meedi, innizi wo dombizi kono sundo man, kane geɗ y'anni t'oona taɗ baadaɗ a ceera wo y'a t'ooney lekkiyo ere ki daayum. ³⁰ Doɗ baadaɗ ankenno kane ki biza, saɗ an t'isa ɗoɗ k'ita, wo ɗoɗ baadaɗ ankenno kane k'ita, saɗ an t'isa ɗoɗ ki biza.»

20

Ono ombide a tukki ɗoɗ naabo doome

¹ Isa y'a ruute sey, y'ede: «Kun ollo, Moziko Raa tod' ti deeyiso aa naabo wede boy y'a t'udfe ti soohe walak, kono yi-deho ɗoɗ naabo y'a ti'n t'igiba k'adda doomizi k'inda sundaɗ biɗ. ² Aame ɗoɗ naabo yi uune man, an di ruute ti kane geɗ, y'an t'ela ranɗadaɗ, a wede soɗ a naabo k'onniyo soo soo, wo y'an igibe k'adda doomizi. ³ A peedo t'ize k'aadumu mesuwe man, y'a udfey, yi wolliyo ɗoɗ doolo an ti guune a bere ɗoɗ duuru, naabo an k'uune ye an delliyo. ⁴ Man yoɗ y'an di ruute, y'ede: "Kune toɗ man kun t'odo naabo k'adda doomizo, wo n'un t'ela munda wede derec a ranɗagun." ⁵ Man kane an d'ingile. Wede boy geɗ, a peedo t'ize diine wo a peedo t'ibbira toɗ inokino, y'a

udde sey don naabo yi d'uune, wo y'an di'n igibe k'adda doomizi. ⁶ A lohe man y'a udde sey, yi d'uuney don doolo an ti guune a bere don duuru. Wo y'an di ruute, y'ede: "Ki moo me onnugun kun di y'engilso a enno daa naabo me?" ⁷ Man kane an i di ruute, an'de: "Wenda y'ay ki ti'n ziki naabo ye." Yon y'an di ruute, y'ede: "Aa de gen, kune ton kun engilo naabo k'adda doomizo."

⁸ A peedo t'a t'iire man, wede boy yi di ruute a wede yeeriyadi, y'ede: "K'odo, don naabo ki'n oozigi wo wede tuuku ton ki-d'elo ranndadi te, ki-t'eeso ti don a t'iide k'ita, k'a ti denngo ti don iide ki biza." ⁹ Inkinno man kane don iise naabo a lohe gen an d'iido, wo wede yeeriyon gen y'an d'ele ranndadan a wede son a naabo k'onniyo soo soo. ¹⁰ Aame iina kaaba ki kane don iise naabo ti soohe walak man, an elkiyo an t'oona baadan baaki, kacin kane ton an d'uune ranndadan tin wede son a naabo k'onniyo soo soo pay. ¹¹ Aame wede yeeriyon gen y'an ele ranndadan man, an d'iise gurgirso a tukki wede boy, ¹² an'de: "Kane don a t'iido k'ita wo an niibe peedo soo ton, kee k'an d'ele ranndadan aa ki kaye don iido ti soohe, ay niibe kee kee adda malla, ay d'urme bini peedo k'ooriyo." ¹³ Wo wede boy gen, a wede soo ti diinayan yi di'n gime onami, y'ede: "Lanze ki nun, n'a-k'isiyo ulsu ye, ki kotto kee in ti ruute ti nun, n'a-t'ela rannda ki naabadá k'onniyo soo. ¹⁴ Inkinno ki t'ambon gettin ranndada k'engilo. Don iido k'ita ton ni dehu ranndadan n'an t'ele aa ki kee. ¹⁵ Derec, nun ti maalado ette o ede urzi n'aase munda wede aa addo i dehu kunun, a beehiyko ere n'isiyo gette kee ki kolbiso

ko?"» ¹⁶ Wo Isa y'a ruute sey, y'ede: «Inkino man don ankenno kane k'ita, san an t'isa don ki biza, wo don ankenno kane ki biza, san an t'isa don k'ita.»

Ono k'Isa don k'aduwe a urzi k'untadi ti baldiyadi

(Markus 10.32-34; Lik 18.31-34)

¹⁷ Isa yi-kili ki Zeruzalem man, y'a-wiike sanalliyagi kane koomat makumu sire, y'an irga siidan, a urzi y'an di ruute, y'ede: ¹⁸ «Kun ollo, in ti kili ki Zeruzalem wo nun wede an n'ehe aa ulo wede en, an di n' t'eley a bey deero don sedefe ti don suuniyo k'oogoro. Kane gen t'urzi k'onaman nun booro t'a ni seedey ki towwo, ¹⁹ wo an di n' t'eley a bey don kane Yawudiyagi ye, kono an di n' t'okkey maade, an di n' gorpipay ti marpa wo an ti n' taakey ekk'undumu wede zaapu t'ekki bakadi kan tontilko. Wo onniyo sire k'aduwe man, Raa y'a ti n' baldey.»

Tondiyo ki mekk'inni Zebede

(Markus 10.35-45; Lik 22.25-27)

²⁰ Inkino man mekk'inni kuuli ki Zebede, t'innitú gen t'a d'iide sirpa k'Isa, wo t'a dikke daanadi kono t'a yi tonde. ²¹ Man Isa y'a ti tunde, y'ede: «De kon mi dehu moo me?» Tod' ti di ruute, t'ede: «Ni dehu k'a t'ele urzi, onniyo ki t'iida mozikada man, innizo sire en k'a ti'n zappey son a ammidada, son a geelada.» ²² Isa y'an di'n gime onaman, y'ede: «Munda wede kun tondiyo, kun ki y' suune ye. Kun aana kun sifa ko kop ki dabar wede nun ni sifa me?» Man kane an i di ruute, an'de: «Eyye, ay aana.» ²³ Yon

y'an di ruute, y'ede: «Derec, kop ki dabar wede ni siba geŋ kun siba. Wo de ki ume konso wede a ammidadó soŋ a geeladó geŋ, urzi yoŋ a bey nuuno ye, ume geŋ yoŋ ki kane doŋ Meegó Raa y'an ikkima.»

²⁴ Aame kane sanalliyagi doŋ koomat geŋ an illiga maŋ, an di-gulkuwe ti kane zemba sire geŋno. ²⁵ Maŋ Isa y'a ti'n wiike sanalliyagi geŋ pay ki daanadí, wo y'an di ruute, y'ede: «Kune kun suune, mozagi siidiyagi pay an d'ombo t'ekki doŋzaŋ ti toogo, wo kane doŋ deero an d'ombo t'ekki doŋzaŋ t'urzi dokkiyo ere an d'ede. ²⁶ Wo geŋ a diinaguŋ i dehu inokino a k'ise ye. Ki too maŋ, wede tuuku yi dehu y'a t'ise goole ti diinaguŋ maŋ, yoŋ geŋ yi t'iso wede naabaguŋ, ²⁷ wo wede tuuku ti diinaguŋ yi dehu y'a t'ise ki biza maŋ, yoŋ geŋ yi t'iso bulaguŋ. ²⁸ Geŋ inokino, nuŋ wede an n'ehe aa ulo wede eŋ, n'iido'ŋ kono duwo on o-ki naabe ye, wo de n'iido'ŋ n'an di naabe duwo wo n'a oyye n'a t'inda kono n'a t'adde doŋ baadaŋ t'adda k'oldfikadaŋ.»

*Ohine k'eda koŋzayi sire a Zeriko
(Markus 10.46-52; Lik 18.35-43)*

²⁹ Isa ti sanalliyagi t'adda Zeriko an a t'adde maŋ, doŋ duuru baadaŋ an di'n daaniya. ³⁰ Maŋ i d'ede koŋzayi sire an ti guune a biza k'urzi. Aame an illiga enjilso geŋ Isa maŋ, an d'iise doŋlilite, an'de: «Galmeegey, kee Wede ti biza bumbu Dawut, k'iso adde koduwo a kaye!» ³¹ Kane doŋ duuru an di'n eddisito kono an d'anniga, wo kane koŋzayi an a d'olle baadaŋ i

ceeriyo, an d'eesiyo: «Galmeegey, kee Wede ti biza bumbu Dawut, k'iso adde koduwo a kaye, k'iso adde koduwo a kaye!» ³² Mañ Isa y'a t'ihira, y'anni wiike wo y'an di ruute, y'ede: «Kune kun dehu n'un d'ise moo me?» ³³ Kane an di ruute, an'de: «Galmeegey, ay dehu edayey a-t'ihina.» ³⁴ Isa i di t'ize sommagi, y'an di buttite a edayan. A kaamiki, edayan a t'ihina an di wolleyo, mañ an di y' diine.

21

Ettiyo k'Isa ki Zeruzalem

(Markus 11.1-11; Lik 19.28-40; Zaŋ 12.12-16)

¹ Isa ti sanalliyagi an iiney goppon ki Zeruzalem, a sirpa k'ille sundutú Betpaze, wo a sirpa makkolo k'Inda k'Olibiye. A ume geñ yi d'igibe sanalliyagi sire, ² wo y'an di ruute, y'ede: «Kun'do k'adda k'ille ere a dfaanagun gettiyo. Kun iiney, kesiko kun t'ooney buuru kettiyo, t'ulutú a sirpa. Kun t'eezi, kun o di'n arkidi. ³ Aame wenda y'un ruutey munda mañ, kun d'eesoy: “Burdari eñ i dehu Galmeege.” Mañ kesiko wede geñ burdari y'un d'oolo, kun d'enگیlo.»

⁴ Geñ a iina kono a-t'ette a ono d'of nebi yi ruute ti kaaga, y'ede: ⁵ «Kun an rooto a d'of geeger Siyon geñ: Enno mozigagun me, y'ettiyo ki tuddugun ti buuru, yon addi tasse y'a ti gilo ekk'ulo buuru, seysu ki sarkiya k'attidi*.»

* **21:5** 21.5 Kun wollo adda mattup ki Ezayi 62.11 wo Zakari 9.9.

6 Injino mañ kane sanalliyagi sire geñ an d'ingile, wo an t'izo munda wede Isa y'an ruute an d'iso me. 7 An t'irkido buuru t'ulutú an d'iido, an a-ti gikkite kallagan ñon deero a dar burdari wo Isa y'a-ti gili eego. 8 Kane ñon duuru geñ, ñon baadan ti diinayan an di gikkite kallagan ñon deero a urzi, ñon ongon an dimbo puutagi k'inda an di gikkite a urzi kay†. 9 Kane ñuwo ñon i sooru ñaanadí ti ñon i yi daaniya geñ, pay kan soo an di ñollite, an d'eesiyo: «Tamma a Wede ti biza bumbu Dawut! Beeko Raa ti koonaa a ekki wede ettiyo ti suma Galmeega Raa‡! Tamma a Raa t'awwa a kandaane!»

10 Aame Isa yi t'iide adda Zeruzalem mañ, kane ñon geeger pay an d'iise okkito kenno kenno, an di tondiso ti tuddan, an'de: «De yo en wee wee?» 11 Mañ kane ñon duuru an an di ti'n gime onaman, an'de: «En nebi Isa, ti geeger Nazaret ki siido Galile.»

*Lomme ñon suuk t'adda booro Boy Raa
(Markus 11.15-19; Lik 19.45-48; Zan 2.13-16)*

12 Sañ Isa yi-t'iide a booro Boy Raa, wo y'an ilmiti kane ñon isiyo suuk ti ñon k'owilte pay a ume genno. Y'an di gippirde taabulyagi ki ñon pelkiyto sonko ere ettiyo ti siidiyagi doolo, wo ti kaakidagi ñon k'owilte deere. 13 Mañ y'an di ruute, y'ede: «Kun ollo, ono en an riije ti kaaga adda mattup ki Raa, an'de: “Boozó en an di y'

† **21:8** 21.8 Kakkisa kallagi ti dambu puutagi k'inda a urzi geñ, i-kaza an i eliyó suma a Isa. ‡ **21:9** 21.9 Kun wollo adda mattup ki Soom 118.26.

waaka boy wede ki tonɗiyo Raa§.” Wo de kune, kun di y’ize urmi k’ombide donj k’oogire*!»

¹⁴ Aame geɗ i d’ede donj konɗayi ti donj jekese, an a d’iide k’ume k’Isa a booro Boy Raa, wo y’an d’ele beeko. ¹⁵ Kane deero donj sedeke ti donj suuniyo k’oogoro an wulle sulɗi k’armika donj Isa y’ize me. Wo soɗ an wulle inɗi an dollite a booro Boy Raa, an d’eesiyo: «Tamma a Wede ti biza bumbu Dawut!» Inɗkino maɗ, an di gulkuwe, ¹⁶ wo an i di ruute, an’de: «K’ollige dey ko, munda wede an rootiyo me?» Wo Isa y’an di ruute, y’ede: «Eyye n’ollige, wo kune ki kotto kun gire munda wede an riine ti kaaga adda mattup ki Raa, an’de: “Kee k’aaze kono ti bize k’inɗi sunɗi ti donj odiyo uɗu tonj, ki d’uɗde tamma+”?» ¹⁷ Maɗ yi’n iili, wo ti geeger yi t’uɗde, y’a ingile ki ille Betani y’a onno.

Duud’iyo k’undumu sundi pigiyee
(Markus 11.12-14,20-25)

¹⁸ Soggo ti soohe Isa yi kama ki Zeruzalem maɗ, aame geɗ mosogo t’a yi ziida. ¹⁹ Maɗ yi wulle undumu sundi pigiyee a biza k’urzi, y’aa d’iide wo de y’iide’ɗ inɗi umbo, yi d’uuney puutagi danɗal. Inɗkino y’a ruute a undumu geɗ, y’ede: «Ti anki, inɗi ki ki t’eha ye baa!» A kaamiki pigiyee geɗ a-biiha. ²⁰ Kane sanalliyagi an wulle inɗkino maɗ, an ziida giggiran wo an di ruute, an’de: «De mummino a kaamiki en miɗ, pigiyee en a-biiha kino me?» ²¹ Isa y’an di’n

§ 21:13 21.13 Kun wollo adda mattup ki Ezayi 56.7. * 21:13 21.13 Kun wollo adda mattup ki Zeremi 7.11. † 21:16 21.16 Kun wollo adda mattup ki Soom 8.3.

gime onaman, y'ede: «Derec in̄kino wo n'un di rooto: Aame un d'ede zaapu k'adde a Raa wo adda k'addugun̄ kun ki niikiyo ye man̄, kun aane kun d'ise munda wede aa ni ize a pigiyee en̄no. Wo kun aane sey kun i di roote a tokomo ette, “T'umayí en̄ mi t'oozo mi t'ooro adda bar” ton̄, gen̄ a t'ise. ²² Sulđi đon̄ pay kun tonda Raa t'urzi zaapu k'adde a yode gen̄, kun di'n t'oona.»

Isa yi naabiya t'urzi k'aaye?

(Markus 11.27-33; Lik 20.1-8)

²³ Man̄ Isa yi-t'iide a booro Boy Raa, aame gen̄ y'a iise dooyiso đuwu. In̄kino man̄ kane deero đon̄ sefeke ti đon̄ i dokkiyo Yawudiyagi, an d'iido tuddí wo an di y' tunde, an'de: «Kee k'isiyto sulđi en̄ t'urzi k'aaye? Wo urzi en̄ a ele wee wee?» ²⁴ Isa y'an di'n gime onaman, y'ede: «Nuñ ton̄ n'un di'n tondo a munda soo đan̄jal. Aame onamó kun o ti'n gima man̄, nuñ ton̄ n'un ti y' kiza urzi wede ni d'isiyto sulđi en̄ me. ²⁵ Aame Zan̄ đuwu y'anni zuyye batem gen̄, urzi iido ti Raa kunun̄ ti đuwu ko?» Man̄ an d'iise rootiyto ti tuddan̄, an'de: «Aame kine in ruuta: “Iido'ñ t'urzi Raa” man̄, yon̄ y'in di roota: “In̄kino ki moo me kun ki d'umbe a ono Zan̄ ye me?” ²⁶ Wo aame kine in ruuta: “Iido'ñ t'urzi đuwu” man̄, kine in d'ede orgiso a đon̄ duuru kono kane pay gen̄ an elkiyo'ñ Zan̄ yon̄ nebi.» ²⁷ In̄kino man̄ Isa onamí an i-ti'n gime, an'de: «Ay ki suune ye.» Wo yode Isa ton̄ y'an di ruute, y'ede: «Nuñ ton̄ man̄ n'un ki y' roote ye kay, wede o ele urzi ni d'isiyto sulđi en̄ me.»

Ono ombide a tukk'in̄ni sire

28 Isa y'a ruute sey, y'ede: «Kun ollo taaya ettiyo wo kun d'elkito eego. I d'ede wede soo injino innizí kuuli sire. Yoŋ y'iide'ŋ a ulí ki kabba yi di ruute, y'ede: "Ulo ki nuŋ, aŋki k'odo k'in ti wolle doome k'inda biŋ." 29 Yo ulo geŋ yi-ti'n gime onamí, y'ede: "Aha, ni k'ette ye", wo taŋ boolon maŋ i di t'ize attifi, y'a t'iide ki doome me. 30 Maŋ meega y'a iide tukku'ulí wede soo me, wo yi di ruute injino kay. Maŋ yo ulo geŋ yi-ti'n gime onamí, y'ede: "Eyye mee'ki nuŋ, k'oolo n'a t'ette ki doome me." Wo kacin y'a guune, doome y'a k'iide ye.» 31 Maŋ Isa y'a ruute, y'ede: «Ti diine kane sire geŋ, wee wee i t'ize munda wede meegí yi dihe me?» Kane deero Yawudiyagi an i di'n gime onamí, an'de: «Wede ki kabba.» Injino maŋ Isa y'an di ruute, y'ede: «Derec injino wo n'un di rooto: Kane doŋ seŋdu jibaaye ti erayi doŋ ooniyo ombo bizaŋ t'itadaŋ geŋ, an un uugume ki Moziko Raa te. 32 Ni rootiyo injino kono Zaŋ Batis y'iido k'ume kune, y'un di gize urzi lekkiyo ere ki diine aa Raa yi dehu toŋ, kun ki d'umbe ye a onamí me, wo de kane doŋ seŋdu jibaaye ti erayi doŋ ooniyo ombo bizaŋ t'itadaŋ geŋ, an d'umbe a onamí me. Wo kune, kun wulle duwo geŋ an umbe me, wo toŋ lekkiyagun kun ki ti gime ye kono kun d'ambe a onamí me.»

*Ono ombide a tukki doŋ naabo doome doŋ ulpi
(Markus 12.1-12; Lik 20.9-19)*

33 «Kun ollo ono ombide ti doolo enno: I d'ede wede doome injino yi d'iite doome k'inda sudaŋ biŋ. Doome geŋ y'a ti y' d'uule ti waaya

monjali, y'a d'ittiba sôole ki ñayyu k'inñi k'inda biñ geñño, y'a d'ippe boy sohuru ki boddfiyo. Mañ doome geñ y'an d'ele ñuwo an di naabe sañ yoñ aggadí y'a t'amba, wo yoñ tuddí y'a inñgile torquwo. ³⁴ Aame onniyo ki rakku k'inñi k'inda biñ t'iina mañ, y'a igibe ñoñ naabadí ki tukki ñoñ naabo doome geñño, kono an i di t'elo aggadí ere k'inñi k'inda biñ an rikke te. ³⁵ An iiney mañ, kane ñoñ naabo doome'ñ an ti'n zidde ñoñ naabadí me: soñ an di y' gusse baadañ, soñ an di y'iide, wo wede k'aduwe an ti y' gikkite ti monjali y'a inda. ³⁶ Wede doome'ñ yi d'igibe ñoñ naabadí baadañ ti doolo a jiiire ñoñ ti poone, wo kane geñño toñ ñoñ naabo doome an an d'ize inñkino kay. ³⁷ K'ita mañ y'an t'igibe ulí wo y'a ruute t'adda k'addí, y'ede: "Yoñ eñ ulo k'addó, an i d'ottiley." ³⁸ Wo ñe aame kane ñoñ naabo doome'ñ ulo an yi wulle mañ, an d'iise rootiyo ti tuddañ, an'de: "Enño ulo wede doome i oopa me! In y'ôodo kono doome eñ y'in d'oopa." ³⁹ Mañ ulo geñ an di y' ziiida, t'adda doome an di y'irkife ki toogo ki paate, wo an di y'iide.»

⁴⁰ Mañ Isa y'a tunde, y'ede: «Inñkino geñ aame wede doome k'inda biñ y'iina mañ, y'an d'isa mummino a ñoñ naabo doome geñ me?»

⁴¹ Wo kane deero ñoñ sefeke ti ñoñ i dokkiyo Yawudiyagi geñ an i di'n gime onamí, an'de: «Kane ñoñ ulpi geñ wede doome y'iido mañ, yi ki wolla sommagañ ye, y'a ti'n t'ida wo doome k'inda biñ geñ, y'an t'ela a ñoñ doolo an di naaba, wo kane geñ aggadí an i t'ela aame iina

ume rakku k'inni k'inda biñ mañ.»

⁴² Isa y'an di ruute, y'ede: «Ki kotto kune kun gire ono ñon an riije ti kaaga adda mattup ki Raa, an'de:

“Mokkolo ere ñon k'oozige boy an di zidde mentú gette,
tode gettiyo a t'ize mokkolo ere majjaanawa a jiire k'oozige boy te.

Mundá geñ iido ti Galmeega Raa,
wo a kine in di wolleyo'ñ mundá geñ i jiire eego‡.”

⁴³ Kono kamo kun ollo, n'un di rooto: Raa Mozikadí ti beezañ y'a-t'amba wo y'an t'ela a ñon doolo, ñon aana isa naabo beehiye ere yon yi dehu. ⁴⁴ Wede tuuku y'a t'iira ekki mokkolo gettiyo mañ, y'a-damba, wo aame mokkolo gette ti-di t'iira a wenda mañ, t'a ti y' ñoguma.»

⁴⁵ Kane deero ñon sefeke ti Pariziyeñ an illiga ono ombide Isa yi rootiyo geñño mañ, an di zuune kereñ yi rootiyo ti kane me. ⁴⁶ Inkino mañ an di dihe urzi an di y' seeda, wo ñe an d'urgide a ñon duuru kono kane ñuwo geñ an elkiyo'ñ Isa yon nebi.

22

Ono ombide a tukki tarnaape seedu

(Lik 14.15-24)

¹ Mañ Isa y'an di ruute sey t'ono ombide, y'ede: ² «Moziko Raa tod' ti deeyiso aa naabo mozigo y'ize tarnaape a seedu k'ere k'ulí. ³ Yi d'igibe ñon naabadí an di waako ñon yi'ni wiike

‡ **21:42** 21.42 Kun wollo adda mattup ki Soom 118.22-23.

a tarnaape seedu k'ere k'ulí, wo kane an di-tuugo k'ettiyo me. ⁴ Injino maŋ yi d'igibe doŋ naabadí ti doolo, y'an di ruute, y'ede: "Kun'do kun an rooti a doŋ ni'ni wiike geŋ, kun'de: Galmeegey y'ede: Ombo ettú t'îide baa, kun t'edi tarnaape seedu. Buŋgarzó ti inŋi buŋgarí doŋ bokkidagi îide k'aadumu mozagi ni-wildite." ⁵ Wo kane doŋ yi'ni wiike geŋ seezaŋ ye, an di tiipe wede tuuku toŋ k'ume naabadí naabadí, soŋ k'adda doomizí, soŋ k'ume suukadí ⁶ wo doŋ soŋ an di zidde doŋ naabo mozigo, an an d'ize ulsu wo an a di'n îide. ⁷ Injino mozigo y'a gulkuwe, y'a igibe asigiryagi an t'îido kane doŋ i t'îide doŋ naabadí, wo geegirzaŋ an a-t'uyyo. ⁸ Maŋ y'an di ruute doŋ naabadí, y'ede: "Ombo tarnaape seedu ettú t'îide, wo de kane doŋ ni'ni waaku geŋ an ki t'îide ye k'ombo me. ⁹ Injino maŋ kun'do k'urziyagi k'okkime, wo doŋ pay kun t'ooney a daanagaŋ geŋ kun ti'n waaki an d'isa tarnaape seedu." ¹⁰ Doŋ naabo geŋ an d'ingile k'urziyagi k'okkime, wo doŋ an uune pay a daanadaŋ geŋ an ti'n wiiko, doŋ beehiye ise doŋ ulpi toŋ maŋ. Geŋ injino biino ki tarnaape seedu duwo an d'ûune boo. ¹¹ Saŋ maŋ mozigo yi-t'îide adda biino y'a-t'eese doŋ yi'ni wiiko, aame geŋ yi wolliyo maŋ wede soo yi ki t'usso'ŋ kalle ki tarnaape seedu ye. ¹² Mozigo yi di ruute, y'ede: "Lanze ki nuŋ, kee ki-t'îido daa kalle ki tarnaape seedu mummino me?" Wo yo wede geŋ y'a k'ihina bizí ye. ¹³ Injino maŋ mozigo y'an di ruute doŋ naabo, y'ede: "Wede eŋ kun yi soodo, kun ti kettito beydí ti zoŋdí wo

kun di seɗɗi ti paate adda zimolo, ume wede ki ɗollite m̄oŋo wo k'aadumu sina.”» ¹⁴ Maŋ Isa y'a ruute, y'ede: «Ki kotto ɗoŋ Raa yi'ni waaku kane baadaŋ, wo ɗe ɗoŋ yi biire i-t'etta Mozikadi kane baata.»

Eliyo jibaaye a mozigo goole ki Romen
(Markus 12.13-17; Lik 20.20-26)

¹⁵ Inkiŋo maŋ kane Pariziyen an a d'irga siidaŋ, an di ruute a tukk'Isa kono an i t'ekka ikka t'urzi k'onamí. ¹⁶ Saŋ maŋ an d'igibe ɗoŋ miibi ti diine sanalliyagaŋ ti kane ɗoŋ a ita k'Erod. An iide'ŋ an i di ruute a Isa, an'de: «Wede dooyisadey, ay suune kee ki rootiyo ono ɗoŋ ɗerec, ki dooyiso urzi Raa t'ono ɗoŋ ɗerec, ki k'orgiso eda ɗuwo ye, wo ki'ni wolliyo ɗuwo geŋ pay kaŋ soo. ¹⁷ Inkiŋo k'ay ki ti rooti doo, elkiyada moo a ono eŋ me: A urzi k'oogiradiŋ miŋ jibaaye a mozigo goole ki Romen geŋ k'eliyo kunuŋ, k'eliyo ye ko?» ¹⁸ Wo Isa metiŋkadaŋ y'a ti zuune, maŋ y'an di ruute, y'ede: «Kune ɗoŋ biziguŋ sire sire, ɗe ki moo me kun o d'ekkiyo ikka me? ¹⁹ Kun o k'eeli soŋko tamma ere k'eliyo jibaaye n'a ki wolle ɗo?» Maŋ an i-d'eele tamma soo. ²⁰ Wo Isa y'anni tunde, y'ede: «Undiso ti suma ekki tamma ette k'aaye?» ²¹ Kane an i di'n gime onamí, an'de: «Ki mozigo goole ki Romen.» Maŋ Isa y'an di ruute, y'ede: «Inkiŋo maŋ munda wede ki mozigo goole ki Romen yon ki yode, kun i y'elo, wo munda wede ki Raa yon ki yode, kun i y'elo.» ²² Aame an illiga ono geŋno maŋ, an di ziida gigaŋ. Maŋ kane an di y'illi a umayí, an d'ingile.

Tondiyo a urzi baldiya
(Markus 12.18-27; Lik 20.27-38)

²³ A onniyo gettiyo batum don miibi ti diine don an'ni waaku sudaŋ Saduseyeŋ geŋ, an d'iide sirpa k'Isa. Kun suune kane Saduseyeŋ an rootiyo don i t'inda geŋ an ki ti balda ye. Inkiŋo Isa an di y' tunde, an'de: ²⁴ «Wede dooyisadey, Muusa yi riine ti kaaga adda mattup k'oogoro, y'ede: "Aame wede yi ziida erewo wo y'a inda daa magiŋe maŋ, mandaayawa gette leemadi y'a ti seeda kono an t'ehe inŋi a suma ki wede inda geŋŋo*." ²⁵ Inkiŋo aakede di kaye i d'ede zamba kane sarat. Wede ki poone geŋ y'a ziida erewo wo y'a inda daa magiŋe, inkiŋo leemadi wede ki sirwe y'a ti ziida mandaayawa gette. ²⁶ Wo leema geŋŋo toŋ y'a inda daa magiŋe kay, wede k'aduwe toŋ inkiŋo, maŋ kane zamba sarat geŋ an ti duude wo an t'inda pay. ²⁷ Aame kane sarat geŋ pay an t'inda maŋ, tode erewo gettiyo toŋ t'aa d'inda. ²⁸ Inkiŋo maŋ a onniyo ere don i t'inda an ti balda geŋ, ti diine kane don sarat geŋ erewo gette t'aasa k'aaye, kono kane pay geŋ miŋ kulutu me?» ²⁹ Isa y'an di'n gime onamaŋ, y'ede: «Kune kun ti digge a elkiyaguŋ, kono kun ki'n suune ye ita k'ono don an riine ti kaaga adda mattup ki Raa, ise toogo Raa toŋ maŋ. ³⁰ Derec, a onniyo ere don i t'inda an ti balda geŋ, kuuli ti erayi an ki seeda tuddaŋ ye baa, wo de an di

* **22:24** 22.24 Kun wollo adda mattup ki Deeterenom 25.5-6. Di Yawudiyagi leema yi ziida erewo wo y'inda daa magiŋe maŋ, leemadi y'a ti seeda, wo ulo wede an t'eha ki kaŋba geŋ, an i di zaape sundi a suma ki leema wede inda geŋŋo, wo korbitayi toŋ a yode.

lekkey daa sedfu aa maaleekiyagi a kandaane. ³¹ Wo a urzi baldiya ki dɔŋ i t'inda geŋ, ki kotto kun gire ono dɔŋ an riije ti kaaga adda mattup ki Raa, an'de: ³² "Nuŋ Raa k'Ibirayim, k'Isaaka wo ki Yakup†."» Isa y'a ruute sey, y'ede: «Raa geŋ yoŋ Raa ki dɔŋ unto ye, yoŋ Raa ki dɔŋ zeere‡.» ³³ Kane dɔŋ duuru illiga dooyisadí gette, an i ziida an di biyiso biyiso baa.

Urzi k'oogoro wede goole a jiire
(Markus 12.28-34; Lik 10.25-28)

³⁴ Aame Pariziyen geŋ an illiga Saduseyen Isa y'an iide, bizaŋ an ki ti y'ohine ye maŋ, kane an iide'ŋ an t'ugiyen kaŋ soo. ³⁵ Wo wede soo ti diinayan, yoŋ wede suuniyo k'oogoro, y'a d'iide sirpa k'Isa, yi dehu yi-d'ekke ikka t'urzi k'ono, wo y'a yi tunde, y'ede: ³⁶ «Wede dooyisadey, adda mattup k'oogoro Muusa, urzi k'oogoro wede goole a jiire tuuku me?»

³⁷ Isa yi di'n gime onamí, y'ede: «"Ki geyyo Galmeega Raazá ti addá pay, ti undá pay wo ti elkiyadá pay§." ³⁸ Geŋ urzi k'oogoro wede goole a di jiire pay. ³⁹ Wo enno wede ki sirwe toŋ, yoŋ goole aa bakadí kay, "Ki geyyo bakadá aa ki geyyiso tuddá batum*." ⁴⁰ Ono dɔŋ pay an riije ti kaaga adda mattup k'oogoro Muusa, ti

† **22:32** 22.32 Kun wollo adda mattup ki Egzod 3.6. ‡ **22:32** 22.32 Isa yi rootiyo, Raa geŋ yoŋ Raa ki dɔŋ unto ye, yoŋ Raa ki dɔŋ zeere: i-kaza kane dɔŋ afo Ibirayim, Isaaka wo Yakup geŋ an t'inda ti kaagine ozzinagi baadan ki poone Raa yi di roota a Muusa botto. Aame yi rootiyo kane zeere maŋ, geŋ i-kaza baldiya ede. § **22:37** 22.37 Kun wollo adda mattup ki Deeterenom 6.5.

* **22:39** 22.39 Kun wollo adda mattup ki Lebitik 19.18.

ɗoŋ ki nebiyagi geŋ, toogadan tiŋ urzi k'oogoro sire eŋŋo.»

*Almasi ti Dawut
(Markus 12.35-37; Lik 20.41-44)*

⁴¹ Koore kane Pariziyen an lekkiyo ogiyso geŋ, Isa y'an di'n tunde, y'ede: ⁴² «Elkiyagun moo me a tukki Almasi Raa yi biire me? Yoŋ y'adɗo ti biza bumbu k'aaye?» Kane an i di'n gime onamí, an'de: «Yoŋ y'adɗo ti biza bumbu Dawut.» ⁴³ Isa y'an di ruute, y'ede: «De geŋ mummino Dawut t'urzi k'Unde Raa y'a yi wiike Almasi “Galmeegi” me? Ni rootiyo inkinno kono Dawut y'a ruute ti kaaga, y'ede:

⁴⁴ “Galmeega Raa yi di ruute a Galmeegó, y'ede: K'edi ki-koona a ammidadó kino, bini ɗoŋ k'aduzá n'an isa aa munda ki bita ti ɗandí zoŋɗá†.”

⁴⁵ Inkinno maŋ Dawut yi yi waaku Almasi “Galmeega.” De geŋ mummino Almasi y'a adɗo ti biza bumbu Dawut ɗaŋŋal me‡?» ⁴⁶ Ti diine kane Pariziyen, wenda soo toŋ i di kime onamí umbo. Wo ti onniyo gettiyo an d'urgide, an di y' tondite ti doolo sey me.

23

*Tookiyo kuude ɗoŋ duuru ekki Pariziyen
(Markus 12.38-40; Lik 20.45-47; 11.39-52)*

† **22:44** 22.44 Kun wollo adda mattup ki Soom 110.1. ‡ **22:45** 22.45 Mummino Almasi y'a adɗo ti biza bumbu Dawut ɗaŋŋal me: Geŋ i-kaza Almasi y'etto ti sirpa Raa, ti biza bumbu Dawut ɗaŋŋal ye.

1 Saŋ maŋ Isa y'an di ruute ɗoŋ duuru ti sanalliyagí, y'ede: 2 «Doŋ suuniyo k'oogoro ti Pariziyen, an d'ede urzi ki dooyiso k'oogoro Muusa. 3 Inŋino maŋ kun ollo onamaŋ wo munda wede an un ruute geŋ kun t'iso. Wo ɗe a urzi naabadaŋ kun ozire ye, kono munda wede an dooyiso geŋ an ki sooru eego ye. 4 Kane geŋ an di'n isiyo ɗuwo ki toogo an di daane urziyagi k'oogoro ɗoŋ ti doolo kane batum an a zaapu t'eedaŋ t'ekki ɗoŋ ki Raa, sarkiyatú ooŋe aakede an kettiso attidí an a di zaapu a dar ɗuwo. Wo ɗe a attidí geŋ, kane batum ti yilsadaŋ soo toŋ an ki dehu an a ki botte ye ki noogiyo ɗuwo geŋ me. 5 Kane geŋ naabadaŋ pay gette an isiyo kono ɗuwo an di'n wolle. Inŋino an d'isiyo munda aakede laaya a ise goole ti ɗoŋ oŋgo an t'eliyto mattup k'oogoro adda an a di kettiso a zumbamaŋ wo a mayɗayzaŋ*, wo a boha kallagaŋ toŋ an a d'isiyo gozubo soŋhirti i ceeriyo†. 6 Adda tarnaapagi a ume k'ombo, an geyyiso an koone a ume wede suma, wo adda boyɗí ɗoŋ in di dooyiso, an geyyiso an koone a ume wede suma pây. 7 A bere ɗoŋ duuru

* **23:5** 23.5 Munda aakede laaya an t'eliyto mattup k'oogoro adda: I-kaza munda wede kane Yawudiyagi ɗoŋ i seedu urzi Raa zakidí geŋ an okkime ki baace an t'eliyo mattup k'oogoro ere ki Raa adda, an di kettiso a mayɗayzaŋ wo ti zumbamaŋ, t'urzi geŋ an d'elkiyo a oogoro gette. Kun wollo adda mattup ki Egzod 13.1-16 wo Deeterenom 6.4-9; 11.13-21. † **23:5** 23.5 Kane Yawudiyagi ɗoŋ i seedu urzi Raa zakidí geŋ, a booha kallagaŋ an a d'isiyo gozubo soŋhirti ki kuube wede bicici, t'urzi geŋ an d'elkiyo a oogoro ere ki Raa. Kun wollo adda mattup ki Nombire 15.37-41.

ton, an dehu duwo an di'n t'eesite ti ottilso, wo an di'n waake "Wede dooyiso, wede dooyiso." ⁸ Wo kune ti diinaguɗ wenda y'ooya ye an di y' waake "Wede dooyiso" me, kono kune pay miɗ zamba kaɗ soo, wo wede dooyisaguɗ miɗ yoɗ soo daɗɗal. ⁹ A siido ette wenda soo ton kun di y' waake "Meegey" umbo, kono kune un d'ede Meega soo daɗɗal, yoɗ a kandaane. ¹⁰ Wo kune ti diinaguɗ wenda y'ooya ye an di y' waake "Mozigo" me, kono kune un d'ede Mozigo soo daɗɗal, yoɗ Almasi Raa yi biire. ¹¹ Wede goole a jiire ti diinaguɗ geɗ miɗ yi koono wede naabo ki kune. ¹² Wede tuuku tuddi yi ti koliyo maɗ, yoɗ geɗ Raa y'a y'isa neɗku, wo wede tuuku tuddi yi ti t'isiyo neɗko maɗ, yoɗ geɗ Raa y'a y'isa goole.»

Dabar a kane don suuniyo k'oogoro ti Pariziyen

¹³ Isa y'a ruute sey, y'ede: «Dabar a kune don suuniyo k'oogoro ti Pariziyen, kune don biziguɗ sire sire! Kune'ɗ a duwo kun an t'appiya a biza k'ettiyo ki Moziko Raa te. Kune batum miɗ kun ki t'ettiyo ye, wo a don i dehu i-t'ette geɗ kun an t'eegirso.

[¹⁴ Dabar a kune don suuniyo k'oogoro ti Pariziyen, kune don biziguɗ sire sire! Kune'ɗ bey mandaydayi kun t'ombo pay, wo kun eesiyo tonɗiyo Raa maɗ ki noko nokot, kono duwo an un di'n wolle. Kono kamo booraguɗ t'a kooney wehini a ceerey.]

¹⁵ Dabar a kune don suuniyo k'oogoro ti Pariziyen, kune don biziguɗ sire sire! Kune'ɗ k'ume tuuku ton kun d'engilso torguwo, a siido

wo t'ekk'ahu pây, k'ooniyo wede soo d'anjâl yon Yawudusu ye wo kun d'isiyo y'a t'ise Yawudusu. Wo aame yi t'isiyo Yawudusu mañ, kun di y'isiyo wede i t'iide k'ettiyo k'adda k'uwwo i d'ooliyo tañ sire a jiire ti ere ki kune batum.

¹⁶ Dabar a kune d'oj aa koñzayi i dokkiyo d'uwu, kun di rootiyo, kun'de: "Aame wedusu y'alzu ti Boy Raa mañ, yon geñ onamí yi ki'n ziida zakidí ye toñ i k'ise munda ye, wo aame y'alzu ti dap ere adda Boy Raa mañ, yon geñ i dehu onamí y'anni seeda zakidí." ¹⁷ Kune d'oj elkisagun umbo wo aa koñzayi, a jiire miñ dap kunuñ Boy Raa wede i-ti t'isiyo dap gette kamileñ a d'aana Raa ko? ¹⁸ Wo kun di rootiyo sey, kun'de: "Aame wede y'alzu ti ume sedefe mañ, yon geñ onamí yi ki'n ziida zakidí ye toñ i k'ise munda ye, wo aame y'alzu ti munda sedefe zaapu ekk'ume sedefe geñno mañ, yon geñ i dehu onamí y'anni seeda zakidí." ¹⁹ Kune d'oj aakede koñzayi no, a jiire miñ munda sedefe kunuñ, ume sedefe wede i-ti t'isiyo sedefe kamileñ a d'aana Raa ko? ²⁰ Geñ injkino wede y'alzu t'ume sedefe mañ, geñ y'alzu t'ume sedefe geñno wo ti suldí pay d'oj eego. ²¹ Wede y'alzu ti Boy Raa mañ, geñ y'alzu ti Boy geñno, wo ti Raa wede i lekkiyo adda pây. ²² Wo wede y'alzu ti kandaane mañ, geñ y'alzu ti kaakido moziko Raa wo ti Raa wede i lekkiyo eego batum.

²³ Dabar a kune d'oj suuniyo k'oogoro ti Pariziyen, kune d'oj bizigun sire sire! Kune'ñ a urzi zakka, kun d'eliyo zakka a Raa ki ita suldí d'oj sunni sunni i d'eliyo unsuwo a zaami, ise

puutagi don ki zaami ton man. Wo de suldi don a jiire adda k'oogoro ki Raa, aakede munda wede kun d'ise ki diine a duwo, isiyo k'adde koduwo a duwo, ti seedu daayum zakidi a urzi Raa, kane gen kun d'ooliyo a kese. Ki too man ki poone kane genno don kun d'ozire eego me, wo suldi don sunni sunni ton kun ki'n ooli ye. ²⁴ Kune don aa konzayi i dokkiyo duwo, kune aame kun sobo ahu gen, tuude yi tooriro ton kun di y'ambu, wo kaciŋ zinzon ton kun ti soho.

²⁵ Dabar a kune don suuniyo k'oogoro ti Pariziyen, kune don bizigun sire sire! Kune'n kulso ti bogoro kun t'opilso daaran beehiye, wo adda'n onniyo boo ti tama wo ti suldi don ulpi tuddugun ti dehu. ²⁶ Kune Pariziyen don aakede konzayi no, ki poone kulso kun t'opilo addutu kamilen doo min, inkino man dartu ton a-t'isa kamilen pay.

²⁷ Dabar a kune don suuniyo k'oogoro ti Pariziyen, kune don bizigun sire sire! Kun deeyiso aa muuziyagi don an an t'eliyo buuye tuware‡ k'a wolle beehiye, kaciŋ t'adda'n onniyo boo t'ossagi ki don i t'inda, ti ita suldi don pay ruumiyo. ²⁸ Wo kune ton inkino, a eda duwo kun ti t'isiyo tuddugun kune ki diine a daana Raa, kaciŋ bizigun sire sire wo addugun onniyo boo ti suldi don ulpi.

‡ **23:27** 23.27 Muuziyagi ki Yawudiyagi gen an an t'eliyo buuye tuware, kono a diddo ton k'a ti wolle kereŋ, k'a ki ti kili t'eego ye. Wo son a urzi k'oogoro aame muuzo ki ti butte man, a ki ti k'ise kee wede ganigi a daana Raa. Kun wollo adda mattup ki Nombire 19.16.

²⁹ Dabar a kune dɔŋ suuniyo k'oogoro ti Pariziyen, kune dɔŋ biziguŋ sire sire! Kun aabuɗu muuziyagi majjandani ki nebiyagi ti kaaga, wo a kane dɔŋ ki diine muuziyagan kun ti'n raaniya murkic ti buuye, ³⁰ wo kun d'eesiyo: "Aame ti eda mongidagey gen kaye ede maŋ, ay a ki ti kette kaŋ soo ye ti dɔŋ tɔwwo nebiyagi me." ³¹ A onamguŋ ti sulɗi dɔŋ kun isiyo gen, i-kaza kune itaguŋ soo ti dɔŋ iide nebiyagi me. ³² De inkinno maŋ, kun d'odo t'inokino aakede ki maawuguŋ g'aaze! ³³ Kune aa mimbayi wo dɔŋ ulpi aakede maŋkikagi, ki kotto kun ki t'alda ye, booro t'un di'n seeda k'adda k'uwwo. ³⁴ Kono kamo kun ollo, n'un t'igibo nebiyagi ti dɔŋ suuniyo k'oogoro, wo dɔwwo dɔŋ un di'n dooya urzi Raa. Dɔŋ soŋ kun ti'n t'ida, dɔŋ oŋgo kun ti'n taakita ekk'inda dɔŋ zappu ekk'eeban kaŋ tontilko, dɔŋ oŋgo soŋ kun di'n gorpipa ti marpa adda boyɗi dɔŋ kun di dooyiso, wo kun di'n limmita geeger ti geeger. ³⁵ T'ume k'eesiyo duniya bini anki, kune Yawudiyagi kun iide dɔŋ ki diine baadan, wo kono ki puuzadan gette kune Raa y'un ti'n t'ela dangay. Ki poone kun iide Abel wede ki diine, saŋ dɔŋ ti doolo bini Zakari ulo Barasi wede kun y'iide adda booro Boy Raa, a diine Boy Raa ti ume sedeke. ³⁶ Derec inkinno wo n'un di rooto: Kane dɔŋ ankenno eŋ Raa yi ti'n t'ela dangay kono ki puuzo kane pay gette.»

*Môolo k'Isa kono Zeruzalem
(Lik 13.34-35)*

³⁷ «Wayya kune dɔŋ Zeruzalem no! Wayya kune dɔŋ Zeruzalem no! Kune dɔŋ i tɔwwito

nebiyagi, wo dɔŋ Raa y'un akkisa kun ti'n kakkisa ti mongali kun ti'n tōwwo. Nuŋ taŋ baadaŋ baadaŋ n'a dihe n'un ti'n tusse aa ôsso ti tussiyo inñitú adda kambartú, wo dɛ kun ki dihe ye! ³⁸ Inŋkino maŋ boyguŋ Raa y'un di y'oolaŋ. ³⁹ Wo kun ollo n'un di rooto, ti aŋki nuŋ kun ki n' wolla ye baa, bini a t'ida onniyo ere kun di roota: "Beeko Raa ti koonaa a ekki wede ettiyo ti suma Galmeega Raa*."»

24

Ono a urzi ruugiyo Boy Raa (Markus 13.1-4; Lik 21.5-7)

¹ Isa yi t'ufde t'adda booro Boy Raa wo yi dehu y'eŋgile maŋ, kane sanalliyagi an a d'iide sirpadí kono an i di kize majjaanika k'oozige Boy Raa. ² Maŋ Isa y'an di ruute, y'ede: «Pay eŋ kun woliyo dɛ'ŋ? Wo dɛrec n'un di rooto, mukkolo soo toŋ t'ekki bakatú i ki lekka ye, pay a ruuga.»

Eesiyo ki dabar ere baadaŋ

³ Isa y'iiney ekki mukkolo k'Inda k'Olibiye, maŋ y'a-guune siidí. Aame geŋ sanalliyagi an a d'iide sirpadí wo an di y' tunde, an'de: «Kee k'ay ki ti rooti d'oo, suldí geŋ an aana woogo me? Wo moo me munda wede a kiza urzi kamada ti onniyo ere duniya ti danga me?»

⁴ Isa y'an di'n gime onamaŋ, y'ede: «Kun koonaa mentikagi, wenda soo toŋ y'un ti'n dagga ye.

⁵ Dɛrec, i d'etto dɔŋ baadaŋ an t'ambo sundó,

§ 23:38 23.38 Kun wollo adda mattup ki Zeremi 22.5. * 23:39 23.39 Kun wollo adda mattup ki Soom 118.26.

wede tuuku ton y'a t'eesa: "Nun Almasi Raa yi biire!", wo kane gen an di dagga duwo baadan. ⁶ Kun d'olliga tarkuuse ki arka goppon, wo kun d'olliga rabila k'arka dokki. Aame gen kun koono mentikagi, kun addira ye. I dehu suldi gen an d'aane, wo aame gen a ki t'isa dangiya duniya ye botto. ⁷ Don siido soo ti siido soo te an deyya ti tuddan, don mozigo soo ti mozigo soo me an deyya ti tuddan kay. I d'isa mosogo ti nonnirso siido adda siidiyagi baadan. ⁸ Wo kane suldi pay gen, aakede kakkisa ere ki poone k'erewo addutu i t'umbe k'ehiyo. ⁹ Inkinon man duwo an un di'n t'ela bey don k'adugun kono an un di'n dabira wo an un ti'n t'ida. Wo kane don siidiyagi pay an un di'n olmidan kono kun umbe a sundo. ¹⁰ Aame gen don baadan urzi zaapu k'addan a nun an d'oola, kane gen an d'odfipa ita tuddan ki sefduzan, wo an d'olmidan tuddan. ¹¹ I d'adfa don baadan an ti t'isa tuddan aa nebiyagi, wo kane gen an dagga don baadan. ¹² A ume tuuku ton suldi don ulpi gen an d'aagila k'aagulu, inkinon geyyiso tudde ton t'a t'isa baata. ¹³ Wo de wede y'a ziida zakidi a urzizo bini dangun man, yode gen Raa y'a y'utta. ¹⁴ I dehu Rabila Majjaanawa ki Moziko Raa gette an di kizite adda siidiyagi pay, wo kane ita duwo pay ton an di t'olliga ti kuudan doo min, san duniya t'a danga kollo.»

*Onniyagi don etto ki dabar baadan
(Markus 13.14-23; Lik 21.20-24)*

¹⁵ «Kune kun di wolla munda wede ulsu k'a y'azzira wo yi lattiya, gen a-t'etta a ono don ti

kaaga nebi Daniyel yi ruute, munda geɗ an ti y' zaapa adda Boy Raa a ume wede kamilen. Wede i gariya ono eɗ eedí ti'ni soodo beehiye. ¹⁶ Aame geɗ kane dɔŋ adda siido Ziide an t'ombo k'ekki moŋgali. ¹⁷ Wede y'a ti gili yi-guune t'ekki dangayadi* maɗ, yoŋ geɗ yi-dɛega ambu munda adda dangay ye, yi t'ombo. ¹⁸ Wo wede yoŋ adda doome maɗ, yi t'ombo, yi kima boy ambu kallayí wede goole ye. ¹⁹ A onniytagi geɗ aasa dabar baadaɗ a kane erayi dɔŋ mahuwagi ti dɔŋ inɗizan an oodiyoy! ²⁰ Kun tondo Raa kono okkagun t'a k'isa a ume reele, ise a onniyo ere ki puukiyadiɗ ye. ²¹ Inkiyo maɗ dabar gette t'aasa ooŋe baadaɗ. T'ume k'eesiyo duniya bini ankenno, dabar inkiyo i k'ize ye, wo ki daana toɗ i k'isa ye. ²² Aame onniytagi dɔŋ ki dabar geɗ Raa y'a ki'n ihira goppon ye maɗ, wede tudde soo toɗ umbo a lekka zeere me. Wo ki kotto onniytagi geɗ y'an ohira goppon kono dɔŋ yi biire ki yode. ²³ Inkiyo maɗ aame wenda y'iisa: "Almasi Raa yi biire, yoŋ a enno!" ise "Yoŋ a ummey!" maɗ, kune onami kun amba ye. ²⁴ Ni rootiyo inkiyo kono i d'adfa duwo an ti t'isa tuddaɗ aa Almasi Raa yi biire, wo ti duwo an ti t'isa tuddaɗ aa nebiyagi. Kane geɗ an d'isa suldi k'armika ti suldi dɔŋ i ceeriyo eego, aame urzi ede maɗ kane an di dagga duwo dɔŋ Raa yi biire ki yode, wo an ki d'aana ye. ²⁵ Kun ollo, suldi eɗ n'un ti'n ruute ki poone an d'aana.

* **24:17** 24.17 Yi-guune t'ekki dangay: I-kaza a siido k'Izirayel geɗ duwo dangaydayzan awhizan patal, kono a ume muno an a di koliyo t'eego, an di lekkiyo wo an d'isiyo naabadaɗ.

²⁶ Injokino maṅ, aame an un ruuta, an iisa: “Kun ollo, Almasi Raa yi biire, yoṅ adda balda!” maṅ, kun’ta ye, ise wenda y’un ruuta, y’iisa: “Kun ollo, yoṅ yi t’umbida a enno!” toṅ maṅ, kun amba ye a onami me. ²⁷ Derec, aa kun wolliyo mizzi y’omile i-ti tooriyo kandaane ti kese peedo ge-koliyo bini peedo k’ooriyo geṅ, aaniya ki nuṅ wede an n’ehe aa ulo wede enno toṅ, t’aasa injokino kay. ²⁸ A ume wede nuune yi t’udiga geṅ, zumbi toṅ ti t’ogiya angenno.»

*Kama ki yo wede an y’ehe aa ulo wede
(Markus 13.24-31; Lik 17.23-24; 21.25-31)*

²⁹ «Onniytagi don ki dabar geṅ an t’ingila lewwet maṅ, peedo ti ki toora ye, tere yi ki toora ye, moldali an sildita ti kandaane, wo suldi don an d’ede toogo a kandaane, Raa y’a ti’n gozziga. ³⁰ Aame geṅ a kandaane i d’isa munda a kiza kama ki nuṅ wede an n’ehe aa ulo wede enno. Injokino ita duwo pay adda duniya an dillita molo wo an di n’ wolla nuṅ wede an n’ehe aa ulo wede en, ni kama ti kandaane ekki dondirso ti toogo ere pay wo ti daryika ere o d’ede. ³¹ Maaleeka y’a baaha parre ti kandaane, n’a t’igiba maaleekiyago k’adda siidiyagi don a duniya itatu pide, an di t’ogiya don ni biire.»

*Ono ombide a tukki tormo
(Markus 13.28-31; Lik 21.29-33)*

³² «Kun wollo wo kun elko a ono ombide don a tukki tormo ettiyo: Aame tormo t’eesiyo od’ize wo puutagutu eesiyo roobiyo maṅ, geṅ kune kun suune adda k’addugun kizini yoṅ goppon. ³³ Geṅ injokino kay, kune toṅ kun wulla suldi pay geṅ an

iina maŋ, kun suuno kama ki nuŋ wede an n'ehe aa ulo wede eŋ tod'te goppon, aakede nuŋ a biza bumbugun. ³⁴ Derec injino wo n'un di rooto: Doŋ ankeŋno eŋ an ki ti t'inda pay ye, ki poone suldi pay geŋ an d'aana me. ³⁵ Kandaane kane ti siido an t'eŋgila, wo kane onamó an ki t'eŋgila ye, an di lekka ki daayum.»

Raa siidí i ti suune onniyo te

(Markus 13.32,35; Lik 17.26-27,34-35; 12.39-40)

³⁶ «Wo suldi geŋ an aana a onniyo tuuku koo, a peedo ere tuuku koo maŋ, i suune yode Meega Raa siidí. Wenda doolo yi ki suune ye, ise maaleekiyagi a kandaane, ise Ulo Raa toŋ maŋ. ³⁷ Munda wede ize ti kaaga a ozzinagi d'ofŋ ki Nowe geŋ, a kama ki nuŋ wede an n'ehe aa ulo wede enno toŋ, aasa injino kay. ³⁸ Adda k'onniytagi d'ofŋ ti kaaga ki poone mizzi goole y'a koppa, ahu an t'ooma siido geŋ, duwo an d'ombo, an sobo, an seddu ti tuddaŋ bini onniyo ere Nowe yi-t'iide adda tooko ere meeda a jiire. ³⁹ Kane ulbaŋ an k'oodiyo a munda ye bini mizzi goole y'a guppe, ahu an t'iimi siido, injino duwo geŋ pay an t'inda adda k'ahu†. Geŋ aasa injino kay a kama ki nuŋ wede an n'ehe aa ulo wede eŋ me. ⁴⁰ Injino maŋ kuuli sire kane adda doome soo, wede soo geŋ an di y'amba wo wede soŋ an di y'oola. ⁴¹ Erayi sire an massu kaŋ soo, ere soo an ti t'amba wo ere soo an di t'oola. ⁴² Injino kun lekko zeere, kono kun ki suune ye onniyo ere

† **24:39** 24.39 Taaya ki Nowe k'a ti t'oone adda mattup ki Zenez 6.9-7.24.

tuuku nuɲ Galmeegugun ni kimo te. ⁴³ Ono en kun ollo koduwo: Aame wede boy gen yi suune peedo ere tuuku a diddo wede k'oogire y'etto maɲ, y'a lekke zeere, yi k'ooli wede k'oogire yi-ki t'ette k'adda boozí ye. ⁴⁴ Gen inkinno kune ton maɲ kun koona mentikagi, kono nuɲ wede an n'ehe aa ulo wede en, n'etto a peedo ere tuuku kun ki ti suune ye.»

Wede naabo i seedu zakidí a naabadí
(Lik 12.42-46)

⁴⁵ «Inkinno maɲ wede naabo wede i seedu zakidí a naabadí wo i-d'ede elkiyo gen, a yode genno galmeegí yi oola attidí pay ki don naabadí ongon me, kono y'an t'ela ombadan aame peedo t'iida maɲ. ⁴⁶ Unsuwo a wede naabo gen me, aame galmeegí a kamadí yi y'uuna y'isiyo naabo gettiyo maɲ. ⁴⁷ Derec inkinno wo n'un di rooto: Wede inkinno gen galmeegí yi di t'ela attidí ki suldízi pay a beezí. ⁴⁸ Wo de aakede wede naabo ulsu gen y'ilka adda k'addí, y'iisa: “Galmeegó en yi t'úso”, ⁴⁹ wo yi t'iida taazu don an naabiya kan soo, wo yi t'ussa a ombo ti sobito t'eebí don i sobo i ceeriyo eego. ⁵⁰ Maɲ galmeegí y'a aana a onniyo ere wede naabo gen yi k'elkiyo ye, wo a peedo ere yi ki ti suune ye. ⁵¹ Galmeegí yi di t'ela dangay ere zakidí wo yi-t'ela aggadí aa ki don bizaɲ sire sire, a ume wede ki dollite moolo wo k'aadumu sina.»

25

Ono ombide a tukki konazi koomat

¹ Isa y'a ruute sey, y'ede: «Inkino maŋ Moziko Raa tod' ti deeyiso aa naabo konazi kane koomat an di zikiti lampiyagaŋ an t'iide okkime ki kule yi seedu erewo. ² Ti diine kane konazi geŋ, doŋ paat soŋ elkiyadaŋ umbo wo doŋ paat soŋ an d'ede elkiyo. ³ Kane konazi doŋ elkiyadaŋ umbo geŋ lampiyagaŋ an t'ûunite t'egey wo ti doolo an a ki d'umbe ye a beezaŋ me. ⁴ Wo kane konazi doŋ an d'ede elkiyo geŋ, lampiyagaŋ an t'ûunite wo an a d'iipe egey adda kuŋgilagaŋ. ⁵ Wo yo wede i seedu erewo geŋ yi-t'usso y'a k'iina kesiko ye, inkino maŋ kane konazi geŋ moone t'an di'n ziida pay, an d'udige kuy. ⁶ A diddo meeda maŋ an d'illiga d'olle, an'de: "Kun ollo, kule wede i seedu erewo y'ettiyo! Kun t'adfi okkimayi!" ⁷ Inkino maŋ kane konazi pay geŋ an t'innite wo lampiyagaŋ an di'n ikkima. ⁸ Kane doŋ elkiyadaŋ umbo geŋ, an tunde a bey doŋ an d'ede elkiyo, an'de: "Kun ay eeli egayguŋ kono lampiyagey i t'unto." ⁹ Wo kane doŋ an d'ede elkiyo geŋ an an di'n gime onamaŋ, an'de: "Aha, in ki t'ida ye! Kun'do k'ume k'owilte, kun owili a kune me." ¹⁰ Kane an d'ingile an d'owilo egey me, koore geŋ yo kule wede i seedu erewo, y'a iina. Maŋ kane konazi doŋ paat i t'ikkima tuddaŋ geŋ, an t'iide k'adda boy tarnaape seedu ti yode kaŋ soo, wo biza y'an t'ippe ti kerle. ¹¹ Saŋ maŋ kane konazi doŋ elkiyadaŋ umbo geŋ an d'iina, an d'iise d'ollite, an'de: "Galmeegey, Galmeegey, k'ay t'ohon!" ¹² Wo de yoŋ y'an di'n gime onamaŋ, y'ede: "Derec inkino wo n'un di rooto: Kune aŋ wenda n'un ki'n suune ye."»

13 Maŋ Isa y'a ruute, y'ede: «Inkino maŋ kun lekko zeere, kono onniyo tuuku ise peedo tuuku ere n'etto kun ki ti suune ye.»

Ono ombide a tukki doŋ naabo ado
(Lik 19.12-27)

14 «Wo soŋ Moziko Raa gette tod' ti deeyiso aa naabo wede boy inkino, yi dehu y'engile torguwo. Ki poone y'a engila geŋ, y'a wiike doŋ naabadí y'an d'ooli laalayí a beezan. 15 A wede soŋ yi d'ele tammiyagi ki dap dupu paat, a wede soo yi d'ele tammiyagi ki dap dupu sire wo a wede soŋ yi d'ele tammiyagi ki dap dupu soo*, a wede tuuku toŋ yi-d'eele a toogadí toogadí, maŋ yoŋ tuddí y'a ingile. 16 Wede galmeegí yi ele tammiyagi dupu paat geŋ, kesiko y'a ingile yi naabiya eego t'aa d'aagulu wo y'a d'uune t'eego tammiyagi dupu paat sey. 17 Wede galmeegí yi ele tammiyagi dupu sire toŋ inkino, y'a ti niibe y'a d'uune t'eego tammiyagi dupu sire. 18 Wo wede galmeegí yi ele tammiyagi dupu soo geŋ, y'a ingile y'iide'ŋ yi d'ittiba olde a siido wo soŋko galmeegí yi-t'umbida adda.

19 Galmee'ki doŋ naabo geŋ yi likko bini maŋ, saŋ y'a aaho wo y'a dihe y'a wolle soŋko ere doŋ naabadí an i di t'ele. 20 Wede galmeegí yi ele tammiyagi dupu paat geŋ, y'a d'iide sirpadí, yi-d'ele tammiyagi dupu paat doŋ y'uune t'eego geŋno, wo yi di ruute, y'ede: "Galme'e'ki nuŋ, kee k'o iili tammiyagi dupu paat n'a niibe, n'aa d'uune tammiyagi dupu paat ti doolo, anken

* **25:15** 25.15 Tammiyagi ki dap dupu soo: I-kaza gurus baadan suma wedusu y'a naabe k'ozzine koomat.

enno ki wollo.” ²¹ Man galmeegí yi di ruute, y’ede: “Geŋ koduwo kee wede naabo beehiye ki seedu zakidí a naabadá, kee a naabo ere boolon gettiŋ k’a ti ziidá zakidí, ankeŋ n’a-ki ti zaapo a naabo ere baadaŋ. K’edi, k’isa unsuwo ti nuŋ galmeegá.” ²² Saŋ man wede galmeegí yi ele tammiyagi dupu sire geŋ, y’a d’iide sirpadí yi di ruute, y’ede: “Galmeeki nuŋ, kee k’o iili tammiyagi dupu sire n’a niibe, n’aa d’uune tammiyagi dupu sire ti doolo, ankeŋ enno ki wollo.” ²³ Man galmeegí yi di ruute, y’ede: “Geŋ koduwo kee wede naabo beehiye ki seedu zakidí a naabadá, kee a naabo ere boolon gettiŋ k’a ti ziidá zakidí, ankeŋ n’a-ki ti zaapo a naabo ere baadaŋ. K’edi, k’isa unsuwo ti nuŋ galmeegá.” ²⁴ Man wede galmeegí yi ele tammiyagi dupu soo geŋ, y’a d’iide sirpadí yi di ruute, y’ede: “Galmeeki nuŋ, ni suune kee wehini a naabo me, ki d’aydu a ume wede ki ki giira ye, wo ki sokiyo a ume wede ki ki zire ye ton man.” ²⁵ Inkiŋo n’a urgide, n’iide’ŋ ni d’ittiba olde a siido, tammiyagi dupu soo geŋ ni t’umbida adda, ankeŋ laalayá enno ki wollo.” ²⁶ Wo galmeegí yi di’n gime onamí, y’ede: “Kee wede naabo ulsu wo golge, ki suune ni d’aydu a ume wede ni ki giira ye, wo ni sokiyo a ume wede ni ki zire ye.” ²⁷ Inkiŋo ki moo me soŋkadó k’o gi di ziipe adda baŋki ye me, t’o d’aagila, a kamadó geŋ n’iido n’a-t’ambe ti jugulu.” ²⁸ Inkiŋo y’an di ruute a kane doŋ a sirpadí geŋ, y’ede: “Tammiyagi dupu soo geŋ kun ti soodo, kun i elo a wede i-d’ede tammiyagi dupu koomat.” ²⁹ Derec, a wede i-

d'ede geɲ, an i-t'eela t'eego i di t'isa baadan a ceera, wo de a wede i-k'ede ye geɲ, mundazí wede boolon y'elkiyo yi t'oona ton an i-t'amba. ³⁰ Wo ki yo wede a naabo kontilme geɲ, kun di seɗɗi ti paate adda zimolo, ume wede ki ñollite m'oolo wo k'aadumu sina."»

Booro ere a onniyo k'ita

³¹ «A onniyo k'ita nuɲ wede an n'ehe aa ulo wede eɲ, n'a-kimo adda mozikadó ti maaleekiyagi pay geɲ, n'a di koonaa a kaakido moziko adda daryikadó. ³² Ita ñuwo pay an di t'ogiya a ñaanadó, wo ñuwo n'a ti'n dokkida sire aakede wede k'elso y'âhuntu moode ti dambami. ³³ N'an ooya kane ñon aa dambami a beezó k'ammade, wo kane ñon aa moode a beezó ki geelo. ³⁴ In'kino maɲ nuɲ mozigo n'an di roota a kane ñon a ammidadó, n'a t'eesa: "Kun'di kune ñon Meegó Raa y'un ti ziipe beeko, kun t'odo a Moziko Raa, tod'te yon y'un t'ikkima a kune, t'ume k'eesiyo duniya too. ³⁵ N'un rootiyo in'kino kono aame nuɲ mosogo, ombo kun o d'eele, aame nuɲ ôrme, ahu kun o d'eele, aame nuɲ torgusu, kun di n' ziiɗa bey sire. ³⁶ Aame nuɲ bontilin, kun di n' usse, aame nuɲ tuddó eeni kun t'iide tondiyadó, wo aame nuɲ adda dangay ton kun t'iide wollyadó." ³⁷ In'kino maɲ kane ñon ki diine an o ti'n kima onamó, an t'eesa: "Galmegey, woogo me kaye ay gi di wulle kee mosogo wo ay a d'eele ombo me, ay gi di wulle kee ôrme wo ay a d'ele ahu me, ³⁸ ay gi di wulle kee torgusu wo ay gi di ziiɗa bey sire me, ay gi di wulle kee bontilin wo ay ki ti k'usse

me? ³⁹ Woogo me kaye ay d'illiga kee tuddá eeni wo ay d'iide tondiyadá me, ay d'illiga kee adda dangay wo ay d'iide wollyadá me?" ⁴⁰ Wo nuñ mozigo n'an di'n kima onamañ, n'a t'eesa: "Derec inkinno wo n'un di rooto: Aame tuuku kun ize munda soo a wede soo ti diine zembadó ñuwo an i k'eliyo suma ye geñ, geñ kun ize a nuuno."

⁴¹ Sañ mañ nuñ mozigo n'an di roota a kane ñoñ a geeladó, n'a t'eesa: "Kune ñoñ eggun duuñyo, kun ti leñño ti tuddó me, kun engilo k'adda k'uwo ere t'oggiyo ki daayum, Raa yi muññe a Meeda siitandani ti maaleekiyagutú.

⁴² Dabar gette kun uune kono aame nuñ mosogo, ombo kun o k'eele ye, aame nuñ ôrme, ahu kun o k'eele ye. ⁴³ Aame nuñ torgusu geñ kun ki n'ziida bey sire ye, aame nuñ bontiliñ geñ kun gi di n'usse ye, aame nuñ tuddó eeni wo adda dangay geñ wollyadó kun k'iide ye." ⁴⁴ Inkinno mañ kane toñ an o ti'n kima onamó, an t'eesa: "Galmegey, woogo me kaye ay gi di wulle kee mosogo ise ôrme, torgusu ise bontiliñ, ise ay d'illiga kee tuddá eeni ise adda dangay wo ay gi di nuuge ye me?" ⁴⁵ Mañ nuñ mozigo n'an di'n kima onamañ, n'a t'eesa: "Derec inkinno wo n'un di rooto: Aame tuuku munda soo kun k'ize ye a wede soo ti diine kane ñoñ ñuwo an i-k'eliyo suma ye geñ, kune kun k'ize ye a nuuno." ⁴⁶ Wo kane geñ an t'etta k'adda dabar ere ki daayum, wo kane ñoñ ki diine an t'oona lekkiyo ere ki daayum.»

*Dehutu k'urzi ki tôwwo k'Isa
(Markus 14.1-2; Lik 22.1-2; Zan 11.47-49,53)*

¹ Isa dooyisadí pay gette y'a ti d'inge maŋ, y'an di ruute a sanalliyagí, y'ede: ² «Kune kun suune tarnaapayin ki Pak geŋ a guute onniyo sire maŋ y'a ad'á, aame geŋ nuŋ wede an n'ehe aa ulo wede eŋ an di n' seeda, an di n' t'ela a bey d'ŋ k'olmidayó, an ti n' taaka ekk'undumu wede zaapu t'ekki bakadí kaŋ tontilko.»

³ A onniyo gettiyo batum deero d'ŋ sedefe ti kane d'ŋ i dokkiyo Yawudiyagi an t'ugiyee adda boy ki mozigo goole d'ŋ sedefe sundí Kayip. ⁴ Kane geŋ an t'iide onamaŋ pay kaŋ soo, Isa an di y' seeda ti metin'ko ki tôwwadí. ⁵ Wo kane an di ruute, an'de: «Yoŋ in ki y' seeda adda tarnaape kino ye, para maŋ d'ŋ duuru an in di'n t'ooziga ono.»

*Obe k'egey d'ŋ eediyadaŋ unŋe ekk'Isa
(Markus 14.3-9; Zan 12.1-8)*

⁶ Isa yoŋ a ille ki Betani adda boy ki Simo wede ti poone yoŋ ki bitide, ⁷ an di guune ombo. Aame an ti guune geŋ, i d'ede erewo t'a d'iide sirpa k'Isa, a beytú ulo d'ingile an ikkima ki mukkolo sundutú albaatir, adda egey d'ŋ eediyadaŋ unŋe zooyayaŋ ooŋe baadaŋ, ti-t'ibi ekk'Isa. ⁸ Kane sanalliyagi an wulle in'kino maŋ, ulbaŋ an ki t'ize unŋe ye, an di rootiyto diinayaŋ, an'de: «De ki moo me ti ti'n lattiya egey me? ⁹ Egey geŋ in aane in t'owila ti zooye wede ooŋe baadaŋ, wo in an t'ele soŋko gette a d'ŋ an k'ede munda ye.»

¹⁰ Isa y'a zuune munda wede an rootiyo me, maŋ y'a ruute, y'ede: «Erewo kun i-t'oofo

ulbutú ye, kono munda wede t'o ize geɲ a nuɲ unse. ¹¹ Kane dɔɲ an k'ede munda ye geɲ an lekka daayum ti kune, wo de nuɲ ni ki lekka daayum ti kune ye. ¹² Tod' t'ibi egey dɔɲ eediyadaɲ unse a tuddó eɲ, aakede ti n'ikkima ki poone an di n' t'ela adda muuzo. ¹³ Derec injino wo n'un di rooto: A omagi pay adda duniya an kizita Rabila Majjaanawa geɲ, erewo ette duwo an t'ida taaya a naabo ere tod' t'ize, wo sundutú a ki danda ye.»

Ziidas ti deero dɔɲ sedefe

(Markus 14.10-11; Lik 22.3-6)

¹⁴ I d'ede wede soo ti diine sanalliyagi kane koomat makumu sire yoɲ sundí Ziidas Iskariyot. Yoɲ y'iide y'a uuney kane deero dɔɲ sedefe, ¹⁵ wo y'an di ruute, y'ede: «Kun o-t'ela moo me, aame Isa n'un y'ela a beyguɲ maɲ?» Maɲ kane geɲ an i di ruute an i di t'ela tamma ada g'ado*. ¹⁶ T'ume geɲ Ziidas y'a iise dehutu k'urzi wede kaɲ mummino y'an di y' t'ela Isa a beezan me.

Isiyo k'ombo tarnaape ki Pak

(Markus 14.12-16; Lik 22.7-13)

¹⁷ Onniyo ere ki poone ki tarnaape Yawudiyagi wede an d'ombo mappa daa k'orme gette t'iina maɲ, kane sanalliyagi an aa d'iide k'ume k'Isa an di y' tunde, an'de: «A too me ki dehu ay in d'isey ombo tarnaapayin ki Pak te?» ¹⁸ Yoɲ y'a ruute, y'ede: «Kun'do k'adda geeger di wede kino, kun t'odoy di yode wo kun i di rootoy, kun d'eesoy:

* **26:15** 26.15 Tamma ada g'ado: Di kane inɲi k'Izirayel geɲ a t'ide suma raɲɲa ki wede naabo ki tere pife. Kun wollo adda mattup ki Zakari 11.12.

“Wede dooyisadey y’ede, yoŋ onniyadi goppon, wo di kee ay isa tarnaapayiŋ ki Pak ti sanalliyagi me.”» ¹⁹ Kane sanalliyagi an t’ize munda wede Isa y’an ruute me, iŋkino ombo tarnaape ki Pak an t’ize.

²⁰ A peedo t’a t’iire maŋ, Isa ti sanalliyagi kane koomat makumu sire geŋ an di guune ombo. ²¹ Aame an ombo geŋ Isa y’a ruute, y’ede: «Derec iŋkino wo n’un di rooto: Wede soo ti diinaguŋ y’a ni t’ela bey doŋ k’olmidayó.»

²² Kane sanalliyagi an t’ize sommagi dondon, wo wede tuuku toŋ yi di y’ ton-diyo, yi d’eesiyo: «Galmee’ki nuŋ, nuuno ko, nuuno ko?» ²³ Yoŋ y’an di’n gime onamaŋ, y’ede: «Wede ay igibe beezey kaŋ soo adda k’ooko eŋ, yode i ni t’ela bey doŋ k’olmidayó me. ²⁴ Derec, nuŋ wede an n’ehe aa ulo wede eŋ n’a t’inda, geŋ a-t’etta a ono doŋ an riŋe ti kaaga adda mattup ki Raa a tukki nuuno. Wo de dabar a yode wede i ni t’ela bey doŋ k’olmidayó, nuŋ wede an n’ehe aa ulo wede eŋ me! Yode geŋ, an ki y’ehe adda duniya ye toŋ bee!» ²⁵ Ziidas wede i t’ela Isa a bey doŋ k’olmidayí geŋ, y’a yi tunde, y’ede: «Wede dooyisadó, nuuno ko?» Isa yi ti’n gime onamí, y’ede: «Geŋ aa ki ruute.»

*Ombo ti sobo i-kaza tudde ti puuzo k’Almasi
(Markus 14.22-25; Lik 22.15-20; 1 Korent 11.23-26)*

²⁶ Aame an ombo geŋ, Isa y’a t’umbe mappa, y’a ruute koduwo a Raa kono k’ombo gette, maŋ y’a furke, y’an d’ele sanalliyagi wo y’a ruute, y’ede: «Ooho kun soodo, kun t’oomo, ette

tuddó.» ²⁷ Saŋ y'a t'umbe kop ti sofo adda, y'a ruute koduwo a Raa kono sofo gette, maŋ y'an d'ele wo y'a ruute, y'ede: «Ooho kun soodo, wede soŋ yi d'oobo d'oobo. ²⁸ Ette puuzadó, puuzo ki taasawa ere Raa y'a ketta ti duwo, to t'oba ki doŋ baadaŋ kono an t'oona tambobino k'oldikadaŋ. ²⁹ Wo kun ollo, n'un di rooto, n'a t'iibe ti aŋki, ki daana ni ki siba ye baa toote k'inŋi biŋ me, bini onniyo ere ni siba ti kune sey geŋ toote wede aware k'inŋi biŋ a moziko Meegó Raa.» ³⁰ Aame an t'iimi an aa t'iibe maŋ, an d'ûure ôrdari tarnaape ki Pak†, saŋ an t'udde an d'ingile k'ekki makkolo k'Inda k'Olibiye.

Rootiyo k'Isa a urzi koogirayí

(Markus 14.26-31; Lik 22.33-34,39; Zaŋ 13.37-38)

³¹ Maŋ Isa y'an di ruute a sanalliyagí, y'ede: «A diddo ettiyo batum, kune pay kun di n' kiigira a munda wede o aana geŋ me, kono ono eŋ an riine ti kaaga adda mattup ki Raa, an'de: “Wede k'elso n'a yi t'ida, wo torɗo dambami a-teepa‡.”»

³² Isa y'a ruute sey, y'ede: «Wo de saŋ Raa yi ti n' bilda maŋ, n'un d'ooguma kun di n' t'ooney a siido Galile.» ³³ Maŋ Piyer y'a t'ihina bizí, y'a ruute, y'ede: «Aame doŋ pay an ki giigira a munda wede a aana toŋ, nuŋ ti kee tak ni ki kiigira ye.» ³⁴ Isa yi di ruute, y'ede: «Derec inŋino wo n'a di rooto: A diddo ettiyo batum, ki

† **26:30** 26.30 Ôrdari tarnaape ki Pak: Kane geŋ k'anni t'oone adda mattup ki Soom 113-118. ‡ **26:31** 26.31 Kun wollo adda mattup ki Zakari 13.7.

poone uzu y'a ôola geŋ, k'a roota ki ki n' suune ye, suune ye taŋ afo.» ³⁵ Maŋ Piyer yi di ruute, y'ede: «Ato, ni ki kiigira ye, aame ise k'unto toŋ n'a t'inda ti kee!» Wo kane sanalliyagi foŋ soo toŋ an a-ti ruute inŋino kay.

Isa yoŋ a Zesimaane

(Markus 14.32-42; Lik 22.40-46)

³⁶ Saŋ Isa ti sanalliyagi an d'iiney a ume sundí Zesimaane, wo y'an di ruute, y'ede: «Kun ti koono kino, koore n'a-ledfoe n'a tondey Raa geŋ me.» ³⁷ Maŋ ti yode y'a-wiike Piyer t'inŋi kuuli sire ki Zebede. Aame geŋ y'a t'ize sommagi dondoŋ wo ulbí i-d'oodiyo baadaŋ. ³⁸ Inŋino yo y'an di ruute, y'ede: «Nuŋ eŋ sommagi dondoŋ aa n'a t'inda, kun ti koono kino wo kun di lekko zeere ti nuuno.» ³⁹ Wo yo y'a-lifoe dokki boolon ti kane me, maŋ y'a t'uttile zumayí a siifo, y'a iise tondiyo Raa, y'ede: «Mee'ki nuŋ, aame i t'ise maŋ kop ki dabar eŋ k'o ti y' ledfoe ti tuddó me, wo toŋ maŋ pay geŋ a ki t'ise aa nuŋ ni dehu ye, wo a t'ise aa kee ki dehu.» ⁴⁰ Saŋ y'a-gime ki tukki sanalliyagi foŋ afo geŋno, wo yi'n uuna an udige. Maŋ Isa y'a t'inne Piyer wo yi di ruute, y'ede: «Kune'ŋ ki peedo soo toŋ kun k'iine kun ki likke zeere ti nuŋ ye!» ⁴¹ Kun lekko zeere wo kun tondo Raa, kono kun ki t'ooro adda naamiya daggiya ye. Wede tudde geŋ a elkiyadi yi dehu y'aase munda wede beehiye, wo fo tuddí toogatú baata.»

⁴² Ki sirwe Isa y'a-lifoe siidí sey, wo y'a iise tondiyo Raa, y'ede: «Mee'ki nuŋ, aame kop ki dabar eŋ k'o ti y' ledfoe ti tuddó i ki t'ise ye n'a

dabire dfo maŋ, i t'iso aa kee ki dehu.» ⁴³ Maŋ y'a-gime k'ume sanalliyagi sey, yi'n uuna an urme, edayan an ziidfa moone. ⁴⁴ K'aduwe Isa yi'n ili y'a-lidde siidi sey, wo y'a iise ton-diyo Raa inki-no sey. ⁴⁵ Maŋ y'a-gime ki tukki sanalliyagi wo y'an di ruute, y'ede: «Kune kun moone pi, wo kun d'udigo baa! Anken peedo i guute goppon, wo nun wede an n'ehe aa ulo wede en, an n'ele a bey dŋ k'oldiko. ⁴⁶ Kun t'oozo, in engile! Kun wollo, wede i ni t'ela a bey dŋ k'olmidayó yi t'udfo.»

Seedu k'Isa

(Markus 14.43-52; Lik 22.47-53; Zan 18.2-11)

⁴⁷ Isa onamí y'a ki ti'n dinge ye botto, aame gen Ziidas wede soo ti diine sanalliyagi kane koomat makumu sire gen, yi t'udfo ti dŋ duuru a itadí, a beydan kasigara ti dalyagi. Kane gen i'n igibo deero dŋ sefeke ti dŋ i dokkiyo Yawudiyagi. ⁴⁸ Yo wede y'an di y' t'ela Isa a bey dŋ k'olmidayí gen, y'an di ruuto dŋ duuru a munda wede y'aasey kono an di suuney en Isa me, y'ede: «Wede kun wulley ni izey puuc a tobbisadí maŋ, gen yode kun di y' soodoy.» ⁴⁹ Kesiko Ziidas y'a y' zikke Isa kabban wo yi di ruute, y'ede: «Toosadá wede dooyisadó!» Maŋ yi d'ize puuc a tobbisadí. ⁵⁰ Isa yi di ruute, y'ede: «Lanze ki nun, munda wede k'iido k'aase, ki y'iso.» Inki-no maŋ kane dŋ duuru an d'iiziga tuddí, an di y' ziidfa. ⁵¹ Maŋ wede soo ti diine dŋ i daaniya Isa, y'a t'iidiba kasigaradí, y'a-diikida wede naabo ki mozigo goole dŋ sefeke, kuudí a dikke. ⁵² Inki-no maŋ Isa yi di ruute, y'ede:

«Kasigaradá ki ti t'elo saapatú, kono don pay i deyyiso ti kasigara gen untadan ton ti kasigara. ⁵³ Kee ki k'elkiyo ye, para'n ni dehu ni deyye man, n'a tonde Meegó Raa wo a kaamiki y'o-t'igibo maaleekiyagi dupiyagi baadan? ⁵⁴ Wo de n'aase in'kino man, gen ono don an riine ti kaaga adda mattup ki Raa a tukki nuuno a ki t'ette ye. Gen i t'iso aa an rootiyo.»

⁵⁵ Aame gen Isa y'an di ruute a don duuru, y'ede: «De ki moo me kun d'ettiyo seedfuzó wo tuddugun kun t'ikkimo ti kasigaryagi wo ti dalyagi, aa nun wede k'oogire me? Para man nun min daayum ni ti konso ni dooyiso a booro Boy Raa, wo kun gi di n' ziida ye. ⁵⁶ Wo de suldi pay gen a iina kono a-t'ette a ono don nebiyagi an riine ti kaaga adda mattup ki Raa.» Man kane sanalliyagi pay an di y'iili, an t'umbe.

Isa a daana deero booro Yawudiyagi
(Markus 14.53-65; Lik 22.54-55,63-71; Zan 18.12-18)

⁵⁷ Kane don i ziida Isa gen an di-t'iide di Kayip mozigo goole don sedefe, a ume wede don suuniyo k'oogoro ti don i dokkiyo Yawudiyagi an t'ugiyee. ⁵⁸ Wo Piyer yi di y' daaniya Isa ti dokki, bini y'a iiney boy ki mozigo goole don sedefe, man yi-t'iide y'a-guune a booro ti don naabo kono y'a wolle mummino a ti danga me.

⁵⁹ Kane deero booro Yawudiyagi pay ti deero don sedefe, an di dehutu duwo an di rootite ono butte a tukk'Isa kono booro t'a yi seeda ki towwadí. ⁶⁰ Don baadan an iide'n an di ruutite ono butte a tukki yode, wo ton munda an ki

d'uune ye wede i di t'ide k'unto me. K'ita mañ i d'iido don sira ⁶¹ an di ruute, an'de: «Ay y'illiga wede en yi ruute, Boy Raa en y'aane y'a kossite, wo adda k'onniyo ado y'a y'ooziga sey.» ⁶² Mañ mozigo goole don sedefe y'a t'iiziga, yi di ruute a Isa, y'ede: «Ono duwo an rootiyo a tukki kee en, kee ki ki roote munda ye ko?» ⁶³ Wo yo Isa yi d'annugu defdek. Mañ mozigo goole don sedefe yi di ruute, y'ede: «Nuñ ni dehu k'a di n'ame tudda ti suma Raa zeere, k'ay ki ti rooti do, kee Ulo Raa, wo Almasi Raa yi biire ko?» ⁶⁴ Isa yi di'n gime onami, y'ede: «Geñ aa ki ruute. Wo kun ollo, n'un di rooto: Ti anki kun di n' wolla nuñ wede an n'ehe aa ulo wede en, n'a-kooney a ammade Raa toogadi t'a jire pay wo kun di n' wolla n'a-kimo ekki dondirso a kandaane.» ⁶⁵ Inkiño mañ mozigo goole don sedefe yi-ti gulkuwe, kallagi y'a zittite, wo y'a ruute, y'ede: «Yoñ geñ yi gilde suma Raa. In ki dehe wenda ti doolo wede illiga y'in ki roote sey ye baa! Kun illiga ti kuudugun yi gilde suma Raa me. ⁶⁶ Kune elkiyagun moo me?» Kane an i di'n gime onami, an'de: «Munda wede yoñ y'ize en i-ide ki towwo.» ⁶⁷ Inkiño mañ an d'iise padfita lee a edayi wo an di gohiso kutuba. Don ongo an di y' battisa, ⁶⁸ an d'eesiyo: «Kee Almasi Raa yi biire, kee nebi mañ, ki y'unto wede i ki diine me!»

Piyer y'a kiigira Isa

(Markus 14.66-72; Lik 22.56-62; Zan 18.17,25-27)

⁶⁹ Aame geŋ Piyer yi-guune ti paate a booro boy, maŋ i d'ede ere naabo t'a d'iide sirpadí ti di ruute, t'ede: «Kee toŋ ti Isa wede ti siido Galile, kune soo.» ⁷⁰ Wo de Piyer y'a yi giigira a daana duwo pay, y'a ruute, y'ede: «Koŋ munda wede mi rootiyo geŋ ti nuuno ye!» ⁷¹ Saŋ maŋ y'a t'iiziga y'a t'adde, y'a t'ette ki biza bumbu, aame geŋ ere naabo ti doolo t'a yi wulle wo t'an di ruute a kane doŋ a sirpatú, t'ede: «Yode eŋ ti Isa wede ti geeger Nazaret, kane soo.» ⁷² Piyer y'a yi giigira sey wo y'a-ti nîime tuddí, y'ede: «Wede eŋ ni ki y' suune ye!»

⁷³ Taŋ booloŋ maŋ doŋ a ume geŋ an aa d'iide sirpa Piyer, an i di ruute, an'de: «Ki kotto, kee toŋ wede soo ti diine kane sanalliyagi k'Isa, ay ki zuune t'urzi golladá.» ⁷⁴ Injino maŋ Piyer y'a-ti nîime tuddí, y'ede: «Wede eŋ ni ki y' suune ye! Para maŋ ono doŋ ni rootiyo eŋ derec ye maŋ, a golladó!» Wo a kaamiki uzu y'a îile. ⁷⁵ Aame geŋ Piyer y'a ilke a ono doŋ Isa yi ruute, y'ede: «Ki poone uzu y'a ôola geŋ, k'a roota ki ki n' suune ye, suune ye taŋ adó.» Maŋ t'adda boy Piyer yi-t'udde ti paate wo y'a iise môolo baadaŋ.

27

Isa an di-t'ette k'ume Pilat
(Markus 15.1-2; Lik 22.66; 23.1; Zaŋ 18.28)

¹ A biza soohe maŋ kane deero doŋ sedefe pay ti doŋ i dokkiyo Yawudiyagi, an t'ugiyee an di ruute a tukk'Isa, a urzi wede booro t'a yi seeda ki tôwwadí. ² Maŋ an ti y' gittite, tiŋ geŋ an di

t'iide, an i di y'ele a bey Pilat, yonj Romenj goole siido.

Unto Ziidas

³ Ziidas wede y'an d'ele Isa a bey donj k'olmidayí genj, yi wolliyonj Isa booro ti y' ziida ki tôwwo, manj i di t'ize attidi. Y'a ziki tamma ada g'ado gette, y'an d'iide deero donj sedefe ti donj i dokkiyo Yawudiyagi, ⁴ wo y'an di ruute, y'ede: «Nun ni t'ize oldfiko, n'un di y'ele wede i k'ize oldfiko ye a beygunj.» Wo de kane an di ruute, an'de: «Kaye seezey ye, a wollo kee baa.» ⁵ Injino manj Ziidas sonjko y'a zibbe adda Boy Raa, wo y'a injile, y'iide'nj y'a zuuye. ⁶ Sonjko gette kane deero donj sedefe an ti ziki wo an di ruute, an'de: «Sonjko ette, oogiradinj ti k'ele urzi ye in a-t'obi a korbite Boy Raa me, kono tod'te zooye ki puuzo.» ⁷ Injino an t'iide onamanj kanj soo, manj sonjko gette an t'iwila doome ki wede k'aabuđu, kono k'ottibe torgagi anjennjo. ⁸ Genj kono k'injino bini anjki tonj, doome genj an di y' waaku sundí «doome puuzo.» ⁹ Genj a iina kono a-t'ette a ono donj Raa y'a ruute ti kaaga ti bize nebi Zeremi, y'ede: «An t'umbe sonjko ere tamma ada g'ado te, genj zooye wede donj k'Izirayel an ti wulle manj, an d'iyye eego wede enj zooyayí i t'ide ki sonjko ettiyo danjal. ¹⁰ Wo ti sonjko gette an t'iwila doome ki wede k'aabuđu, genj a-t'ette a munda wede Galmeega Raa y'o ruute n'aase*.»

* **27:10** 27.10 Kun wollo adda mattup ki Zeremi 32.6-15, wo Zakari 11.12-13.

Isa a d'aana Pilat
(Markus 15.2-15; Lik 23.2-5,13-25; Zan 18.28-19.16)

¹¹ Isa an di-t'iide ki d'aana goole siido. Aame geŋ goole siido y'a y'iise tondiso, y'ede: «Kee mozigo Yawudiyagi ko?» Isa yi di'n gime onamí, y'ede: «Geŋ aa ki rootiyo.» ¹² Wo de a ono d'ŋ deero d'ŋ sedefe ti d'ŋ i dokkiyo Yawudiyagi an rootiyto a eedí geŋ, yoŋ yi k'ohine bizí ye. ¹³ In'kino maŋ Pilat yi di ruute, y'ede: «Ki k'ollige ye ko, ono d'ŋ pay an rootiyto a tukki kee eŋ me?» ¹⁴ A ono d'ŋ an rootiyto pay geŋ, a ono soo toŋ Isa yi k'ihina bizí ye, in'kino maŋ goole siido y'a ziida giggirí baadaŋ.

¹⁵ Aa daayum goole siido yi d'isiyo a tarnaape ki Pak maŋ, y'an d'ad'fiya t'adda daŋgay we-dusu soo wede d'ŋ duuru an dehu. ¹⁶ Wo aame geŋ adda daŋgay i d'ede wede soo sundí Barabas, sundí ti môolo. ¹⁷ In'kino Pilat y'a tunde d'ŋ duuru i t'ugiye, y'ede: «Kun dehu miŋ n'un t'ad'fo Barabas kunuŋ, ni-d'eezo Isa wede an yi waaku Almasi Raa yi biire ko?» ¹⁸ Pilat yi rootiyo in'kino kono yi suune, kane deero d'ŋ sedefe Isa an i y'ele beezí kono an kolbiso ti yode. ¹⁹ Koore yoŋ konso ekki kaakido booro geŋ, eddí ti-d'igibe ti di ruute, t'ede: «A ono ki wede ki diine eŋ, ki t'ela eedá ye, kono nuŋ te a did'fo ni dibire baadaŋ a urzi suniye a tukki yode.»

²⁰ Kane deero d'ŋ sedefe ti d'ŋ i dokkiyo Yawudiyagi geŋ, an an t'elite ono a d'ŋ duuru an d'iyye an di roote Pilat y'an t'ad'fe Barabas wo Isa ki tôwwadí. ²¹ Yo goole siido y'a tunde d'ŋ duuru, y'ede: «Ti diine kane sire eŋ, kun

dehu n'un t'adfo wee wee?» Maṅ kane an i di'n gime onamí, an'de: «K'ay t'adfi Barabas!»
²² Pilat y'anni tunde, y'ede: «De Isa wede an yi waaku Almasi Raa yi biire geṅ, kun dehu ni-d'ise mummino me?» Maṅ kane pay an i ti'n gime onamí, an'de: «Ki ti y' taako ekk'undumu wede zaapu t'ekki bakadí kaṅ tontilko!»
²³ Pilat y'anni tunde sey, y'ede: «De munda ulsu miṅ y'ize moo me?» Wo kane an di d'ollite baadaṅ ki baadaṅ, an'de: «Ki ti y' taako ekk'undumu wede zaapu t'ekki bakadí kaṅ tontilko!»
²⁴ Aame Pilat yi wulle onamí an k'ollige ye wo i t'ooziga deyyiso maṅ, yi d'eezi ahu y'a t'upile beezi a daana doṅ duuru, wo y'a ruute, y'ede: «Wede i k'ize munda ye eṅ n'un di y'elo, wo puuzadí ti k'ooapa eedó ye.»
²⁵ Kane doṅ duuru pay an i ti'n gime onamí, an'de: «Eyye, kaye t'inṅizey pay puuzadí t'oope edey.»
²⁶ Inṅino maṅ Pilat y'an di y'ud'fe Barabas me, wo y'an di ruute a asigiryagi Isa an ti y' girpipe ti marpa, saṅ y'an di y'ele an ti y' taake ekk'undumu wede zaapu t'ekki bakadí kaṅ tontilko.

Isa asigiryagi an y'okko maade

(Markus 15.16-20; Lik 23.11; Zaṅ 19.2-3)

²⁷ Inṅino maṅ kane asigiryagi ki goole siido, an di-t'iide Isa k'adda boy ki goole siido, wo eebaṅ asigiryagi ti doolo toṅ baadaṅ an a-ti'n wiiko pay, an di ti d'uule.
²⁸ Kallagí an t'id'dipe wo an d'umbe kalle wede goole teeze†, an i di t'usse.
²⁹ An di gini kaḍumul k'ahimagi‡ an i-

† **27:28** 27.28 Kalle wede goole teeze: I-kaza kalle moziko.

‡ **27:29** 27.29 Kaḍumul k'ahimagi: I-kaza kaḍumul moziko.

t'usse eedí, wo a beezí k'ammade an i d'ele koyileŒ. Mañ an di dikkite a daanadí, an di y'okko maade, an d'eesiyo: «Toosadá mozigo Yawudiyagi no! Toosadá mozigo Yawudiyagi no!»³⁰ An di padfita lee a tuddí, wo koyile wede a beezí an di ziida an di y'oggiso eedí.³¹ Aame an ti y'ukke maade mañ, kalle wede goole an t'iidfiba wo an i di t'usse kallagí. Mañ Isa kane an ti y' dukke, an di t'ette kono an ti y' taakey ekk'undumu wede zaapu t'ekki bakadí kañ tontilko.

Taakiya k'Isa ekk'undumu

(Markus 15.21-32; Lik 23.26-43; Zan 19.16-24)

³² A adfiyadañ ti geeger, an a-t'ikkima ti wede soo injkino yoñ ti geeger Sireñ, sundí Simo. Asigiryagi an di y'ize ki toogo y'a t'umbe undumu taakiya k'Isa.³³ Mañ an d'iiney a ume wede sundí Golgota, i-kaza ume aa osse k'eego.³⁴ A ume geñ, a Isa an i d'eele toote k'inñi biñ kalsiya ti munda kadfigi y'a sife. Yi y'uwwwe mañ, y'a-tuuge ki sobo me.³⁵ Kane asigiryagi an ti y' tiike ekk'undumu wede zaapu t'ekki bakadí kañ tontilko, sañ kallagí an di dikkiida t'urzi k'arbu teltel muntelliyo [kono a-t'ette a ono don nebi yi ruute ti kaaga, y'ede: «Kallagó an di dikkiida, wo kallayó wede goole an t'irbe teltel muntelliyo*].³⁶ Mañ an di guune angenño, an di y' boohiyo.»³⁷ T'ekk'eedí an tiike pakirte wo an a-ti riine, an'de: «Yode eñ Isa, mozigo Yawudiyagi.» Geñ

Œ 27:29 27.29 Koyile: I-kaza dalka moziko. * 27:35 27.35 Kun wollo adda mattup ki Soom 22.19.

mundá wede i-d'îide untadí. ³⁸ Wo a sirpadí an a-tiike d'oj k'oogire sire, wede soj t'undumzí a kese k'ammídadí, wo wede soj t'undumzí a kese geeladí.

³⁹ Doj adíya tin genno, an di y' kaldíta wo an denilso eedan, ⁴⁰ wo an d'eesiyo: «Kee wede k'ede Boy Raa k'a kossita wo adda k'onniyo afo k'a y'ooziga gen, kee Ulo Raa kotto man, k'utto tuddá batum wo t'ekk'undumu wede zaapu t'ekki bakadí kan tontilko, ki ti deegi!» ⁴¹ Kane deero doj sedefe, doj suuniyo k'oogoro ti doj i dokkiyo Yawudiyagi ton, an di y'okko maade kay, an d'eesiyo: ⁴² «Yon doj doolo y'an di'n utte min, yi k'aane tuddí batum yi ki t'utte ye! Yon mozigo ki doj k'Izirayel kotto man, ankenno t'ekk'undumu gen yi ti deegi, inkino ay zaapa addey a yode. ⁴³ Yon yi ziipe addí a Raa wo Raa yi y' giyye kotto man, anken yi y'utto baa, kono yi ruute, yon Ulo Raa!» ⁴⁴ Kane doj k'oogire doj an tiike a sirpadí ton, an di y' kaldíta inkino kay.

Unto k'Isa

(Markus 15.33-39; Lik 23.44-48; Zan 19.28-30)

⁴⁵ T'ume peedo t'ize diine gen, adda siido pay ume a t'ize zimolo dil a likke bini eesiyo peedo lohe. ⁴⁶ A eesiyo peedo lohe man, Isa y'a idili ti golla awwa, y'ede: «Eli, Eli, lama sabaktani.» Gen i-kaza: «Raa ki nun, Raa ki nun, moo me ki ni giigira me?» ⁴⁷ Doj ongo ti diine doj i lekkiyo angenno gen, an d'illiga wo an di ruute, an'de: «Kun ollo kay, yi waaku nebi Eli.» ⁴⁸ Kesiko wede soo ti diinayan y'a ukke yi d'umbe sooso, yi di

† **27:46** 27.46 Kun wollo adda mattup ki Soom 22.2.

zulpe adda toote suddo k'in̄ni k'inda biñ, mañ yi-t'ele a biza koyile, yi-t'usse bize k'Isa y'a suuye. ⁴⁹ Wo kane ñoñ ongo an di ruute, an'de: «K'a dello, in gi di wolla ño Elizi wenda y'etto yi y'utta mañ.»

⁵⁰ Isa y'a idili sey ti golla awwa, mañ y'a iili undi t'a t'udde, y'a-t'ihe. ⁵¹ Aame geñ alboy wede i ñikke adde Boy Raa soñ k'adda soñ ki paate geñ, a t'ihina tar t'awwa a ti ñiige les. Siido t'a ñunñire, zombali a t'ihinte, ⁵² muuziyagi a t'ihinte, wo ñoñ ki Raa baadañ ñoñ i t'inda geñ an di bilde. ⁵³ Kane ñoñ i t'inda toñ ti muuziyagan an t'udfite wo aame Isa yi bilde mañ, an t'iide ki Zeruzalem geeger ere kamileñ wo ñoñ baadañ an di'n wulle. ⁵⁴ Goole k'asigiryagi meeda ki Romen ti ñoñ a itadi i boohiyo Isa, an wulle ñoñirso siido ti suldi ñoñ ize geñno mañ, orgiso t'anni ziida baadañ wo an di ruute, an'de: «Wede eñ Ulo Raa ki kotto!» ⁵⁵ A ume geñ i d'ede erayi baadañ ñoñ i diino Isa ti siido Galile nee kono an i di naabiya, kane an t'ihirte ti dokki an di wolliyo munda wede isiyo. ⁵⁶ Ti diinayan i d'ede Mariyam ere ti siido Magdalla, Mariyam mekki Zak ti Yusup, wo soo te mekk'in̄ni kuuli ki Zebede.

Eliyo nuune k'Isa adda muuzo

⁵⁷ A peedo t'ette k'ooriyo mañ, wede sundi Yusup ti geeger k'Arimate geñ y'a iina, yoñ geñ wede bey wo sanallusu k'Isa Almasi pay. ⁵⁸ Yode geñ y'iide'ñ, y'a uuney goole siido Pilat, y'a tunde nuune k'Isa kono y'a t'ottiba. In̄kino mañ Pilat y'a iyye, y'an di ruute a asigiryagi nuune an

i-d'ele. ⁵⁹ Yusup y'iide'η, nuune'η y'a t'umbe, y'a n̄ilpe ti sotor aware tuwarwa kar. ⁶⁰ Yi-t'ele adda muuzo aware ere ki yode batum, tod'te aa urmi an ittiba mokkolo. Mañ y'a-ti d̄uñkile a biza muuzo zumbulu yeepiyo wo y'a ñgile. ⁶¹ Aame geñ Mariyam ere ti siidfo Magdalla wo ti bakatú Mariyam kay, an di-guune an̄geñño, edayan̄ ki biza muuzo.

Boohiyo muuzo k'Isa

⁶² Sulđi geñ ize a onniyo jima d̄uwo an okkime tuddañ kono onniyo ere ki puukiyo Yawudiyagi ti t'eesa‡. A onniyo ere ki puukiyo mañ, kane deero d̄oñ sedeke ti Pariziyen̄ geñ an d'ingile kañ soo di Pilat. An iide'η ⁶³ an di ruute, an'de: «Galmeegey, kaye ay ilke yo wede daggiya d̄uwo eñ, yi ruute aame yo zeere, y'ede sañ yi d'isa onniyo sire k'aduwe y'a balda. ⁶⁴ In̄kino mañ k'an rooto a asigiryagi an di boohay muuzo bini onniyo k'aduwe, koo sanalliyagi nuune an t'oodiba wo a d̄uwo an t'eesa: "Isa yi bilde ti diine d̄oñ unto me." Mañ daggiya d̄uwo ere k'ita ette t'a ceera ere ki poone.» ⁶⁵ Pilat y'an di ruute, y'ede: «Asigiryagi en̄ño, kun'do muuzo kun boohoy aa kun ollige.» ⁶⁶ In̄kino mañ an d'ingile wo biza muuzo an a-ti l̄nye wo an di zippe asigiryagi an di boohiyo.

‡ **27:62** 27.62 Di Yawudiyagi onniyo t'eesiyo ti peedfo t'ambe k'ooriyo ere ki an̄ki bini peedfo t'ambe k'ooriyo ere ki soggo, wo onniyo ere ki puukiyo toñ in̄kino kay.

28

Baldfiya k'Isa Almasi

(Markus 16.1-8; Lik 24.1-11; Zañ 20.1,11-18)

¹ Onniyo ere ki puukiyo Yawudiyagi i t'ingile. A onniyo dumas ti soohe mañ, Mariyam ere ti siido Magdalla ti bakatú Mariyam an t'iide an di wollo muuzo. ² A kaamiki, siido t'a n̄un̄n̄ire baadañ, maaleeka ki Galmeega Raa y'a d̄iigo ti kandaane, y'iide'ñ zumbulu ti biza muuzo y'a ti y' d̄un̄kile kese wo y'a-ti guune t'eego. ³ Yoñ tuddí i ralita aa omile mizzi, wo kallayí tuware kar aa kuube. ⁴ Mañ kane asigiryagi i boohiyo muuzo, orgiso t'anni ziida baadañ, an d'iise n̄on̄n̄irso wo a t'ibi a siido aa an t'inda. ⁵ Maaleeka y'a t'ihina bizí wo y'an di ruute erayi, y'ede: «Kune'ñ, kun orgide ye. Ni suune kun dehu Isa wede an yi tiike ekk'undumu wede zaapu t'ekki bakadí kañ tontilko me. ⁶ Yoñ a en̄no ye, Raa yi ti y' bilde ti diine d̄on̄ unto me, aakede y'a ruute. Kun'di, kun wolla ume an ziipe nuunayí toñ en̄no. ⁷ An̄ken̄ kun'do kesiko, kun an ti kazoy sanalliyagí, kun d'eesoy: “Yoñ ti diine d̄on̄ unto Raa yi ti y' bilde, wo an̄ken̄ y'unni delliyo a siido Galile, a ume geñ kun di y' wolley.” Geñ in̄kino ono d̄on̄ o d'ede n'un di ruute.»

⁸ Mañ erayi ti biza muuzo kesiko an di-gime, addañ i-t'úune t'orgiso wo t'un̄suwo baadañ, an d'ukke kono an an d'ette ti rabila a sanalliyagi k'Isa. ⁹ A kaamiki Isa y'iide'ñ, y'an ikkima wo y'an di ruute, y'ede: «Toosagañ.» Kane erayi an a d'iide sirpadí, an di dikke, an a-ti ziide zon̄dí

wo an i d'uttille. ¹⁰ Inkinno maŋ Isa y'an di ruute, y'ede: «Kun orgide ye, kun'do kun an ti rootoy a zembadó geŋ an t'odoy ki siido Galile, an di n' wolley a ummey.»

Taaya ki d'ofŋ i boohiyo muuzo

¹¹ Koore kane erayi a urzi botto geŋ, asigiryagi miibi ti diine d'ofŋ a buuhe muuzo geŋ an t'iide k'adda geeger, an an t'iide taaya a deero d'ofŋ sedefe a suldi d'ofŋ pay ize geŋ me. ¹² Maŋ kane deero d'ofŋ sedefe ti d'ofŋ i dokkiyo Yawudiyagi an t'ugiyee an t'iide onamaŋ kaŋ soo, saŋ an an d'ele soŋko baadaŋ a asigiryagi, ¹³ wo an an di ruute, an'de: «Kun rooto a d'uw'oŋ: "Sanalliyagi wede eŋ an iido a did'do, nuune an t'uugira aame kaye ay moone geŋ me." ¹⁴ Aame ono geŋ goole siido y'illiga toŋ maŋ, kaye ay d'isa t'urzi tuuku toŋ addi a yi-ti'n t'assa kono munda un ki d'aana ye.» ¹⁵ Kane asigiryagi geŋ soŋko an di ziida, wo an di diine ono d'ofŋ an an ruute. Inkinno maŋ, rabila gette a-tiipe a diine Yawudiyagi bini aŋki.

Isa yi kaza tuddi a sanalliyagi

¹⁶ Maŋ kane sanalliyagi k'Isa d'ofŋ koomat makumu soo geŋ, an d'ingile siido Galile k'ekki mokololo ere Isa y'an ruute an d'ette. ¹⁷ A ume geŋ Isa an di y' wulle, maŋ an t'uttille wo d'ofŋ ongo ti diinayan an d'ede niiku adda k'addaŋ. ¹⁸ Isa y'a d'iide sirpadaŋ wo y'an di ruute, y'ede: «Toogo pay Raa y'o ele a kandaane wo a siido toŋ maŋ. ¹⁹ Inkinno maŋ kun'do ki tukk'ita d'uw'o pay kun di'n isoy sanalliyagó, kun ti'n suyyoy batem ti suma Meega, ti suma k'Ulo wo ti suma

k'Unde Kamilen. ²⁰ Wo kun di'n dooyoy an seedfa suldi dɔŋ pay n'un ruute kun d'ise, wo nuŋ n'a lekka daayum ti kune, bini onniyo ere duniya ti dɔŋga.»

**Mattup ki Taasuwa ere Aware
Mukulu: Mattup ki Taasuwa ere Aware (New
Testament)**

copyright © 2019 Wycliffe Bible Translators, Inc.

Language: (Mukulu)

Contributor: Wycliffe Bible Translators, Inc.

All rights reserved.

2020-11-19

PDF generated using Haiola and XeLaTeX on 21 Feb 2024 from source
files dated 29 Jan 2022

523c1c0a-f8ac-5d2f-aebe-7063b0de6b23